

# দিনান্তের আগুন

শ্রীশশিভূষণ দাশগুপ্ত

প্রাপ্তিস্থান—শ্রীগুরু লাইব্রেরী  
২০৪, কর্ণওয়ালিস্ ট্রাট,  
কলিকাতা ।

৯৮।৪, রমা রোড, কলিকাতা (২৬) হইতে

এছকার কতৃক প্রকাশিত।

সর্বস্বত্ব এছকার কতৃক সংরক্ষিত।

প্রথম প্রকাশ—১লা বৈশাখ, ১৩৫৬

মূল্য—আড়াই টাকা

১, রমেশ মিত্র রোড, কলিকাতা (২৫)

দি নিউ প্রেস হইতে

শ্রীমীলকণ্ঠ ভট্টাচার্য কতৃক মুদ্রিত।

শ্রীযুক্ত মনোরঞ্জন গুপ্ত, এম্, এল্, এ  
শ্রদ্ধাস্পদেষু—

অগ্নির রক্তবর্ণ হিংস্র লেলিহান শিখা  
এবং ঘনকৃষ্ণধূম্রজালের অভ্যন্তরে  
একটি জ্যোতির্ময় সুবর্ণকান্তি রূপ  
রহিয়াছে—তাহাই বিশ্বের পাষক—  
তাহাই কল্যাণতম। সমগ্র জীবন  
দিয়া এ সত্যকে আপনি অনুভব  
করিয়াছেন, এই কথা স্মরণ করিয়া  
এই গ্রন্থখানির সহিত আপনার নামটি  
যুক্ত করিয়া রাখিলাম।

বিনীত  
শ্রীশশিভূষণ দাশগুপ্ত

এই লেখকের অন্যান্য বই :-

বাঙলা-সাহিত্যের নবযুগ

বাঙলা-সাহিত্যের একদিক

সাহিত্যের স্বরূপ

ত্রয়ী { বাল্মীকি ও কালিদাস  
কালিদাস ও রবীন্দ্রনাথ

উপমা কালিদাসস্মৃতি

ভারতীয় সাধনার ঐক্য

এপারে-ওপারে ( কবিতা )

সীতা ( কবিতা )

নিশাঠাকুরের কড়চা ( কথিকা )

রাজকন্যার ঝাঁপি ( নাটক )

বিদ্রোহিণী ( উপন্যাস )

জঙলা-মাঠের ফসল ( উপন্যাস, যন্ত্রস্থ )

## নিবেদন

নাটক-রচনায় কোন ভূমিকা না করাই ভাল ; এখানে শুধু লক্ষ-প্রতিষ্ঠ নাট্যকার শ্রীযুত মন্থথ রায়, এম্, এ এবং অধ্যাপক শ্রীযুত বিশ্বপতি চৌধুরী, এম্, এ মহাশয়গণের নিকট হইতে এই নাটক রচনায় যে উৎসাহ এবং উপদেশ লাভ করিয়াছি তাহাই শ্রদ্ধার সহিত স্মরণ করিতেছি ।

কলিকাতা  
১লা বৈশাখ, ১৩৫৬

}

বিনীত  
প্রণয়কার

## পাত্র-পাত্রীগণ

বিষ্ণুরায়	ছাতিমপুরের জমিদার
নন্দ রায়	বিষ্ণুরায়ের পুত্র
ব্রজহরি ঘোষাল	গরিব বজমানী ব্রাহ্মণ
করিম সর্দার	বিষ্ণুরায়ের বর্গাদার, বর্ধিষ্ণু চাষী
আইজদ্দি	করিম সর্দারের পুত্র
পটল ডাক্তার	গ্রাম্য হাতুড়ে ডাক্তার
কানাই	পার্শ্ববর্তী গ্রামের কর্মী যুবক
মেছের	বিষ্ণুরায় কতৃক প্রতিপালিত চাষীযুবক
বাহারাম	চাকর
শ্যাপা ও ভ্যাপা	বিষ্ণুরায়ের পড়শী, ঘরামি কাজ করে
ফটিক	গ্রাম্য ফচকে ছোড়া

কাতেম পিয়াদা, মোস্তাজ, কাজল বয়াতি, এক্রাম, গোপাল, রজ্জব,  
তাহের, বেঙ্গু কুলু, কিনারাম, ঈশান ডুলী, জগন্তারণ, বালকগণ,  
দারোগা, কন্ঠবল, ফকির, যাত্রি-ত্রয়, মাঝিগণ

আরও অন্যান্য ।

হরমুন্দরী	বিষ্ণুরায়ের স্ত্রী
কেমকরী	ব্রজহরির স্ত্রী
অতসী	ব্রজহরির কন্যা
উষা	পটল ডাক্তারের স্ত্রী
চপলা	বাহারামের তৃতীয় পক্ষের স্ত্রী
দুর্গা	বিধবা ব্রাহ্মণ কন্যা
জহলা ও মজলা	অতসীর প্রতিবেশিনী বালিকাছয়
শশির মা	

## প্রথম অঙ্ক

### প্রথম দৃশ্য

শেষ রাত্রি, শীত কাল, শোবার ঘরে নন্দলাল রায় দড়াদড়ি লইয়া একটা  
লণ্ঠনের মিটমিটে আলোতে একা একা বিছানাপত্র বাঁধিতেছে।

নন্দ—যা ভাবছিলুম তাই ; বাটা বাজারামই আমাকে ডোবাবে।  
আকাশ ফসাঁ হয়ে গেল কখন, এগন পর্যন্ত হারামজাদা পাঞ্জির  
দেগা নেই। ঝাঁটিয়ে দিতে হয় যত কুঁড়ের হাঁড়িগুলোকে !  
[ পূর্বের জানালা খুলিয়া খানিকক্ষণ তাকাইয়া রহিল ; সজোরে  
আবার জানালা বন্ধ করিয়া দিয়া মালপত্র গুছাইতে লাগিল।  
ভিতরের একটা দুয়ার দিয়া হরসুন্দরীর প্রবেশ। ]

হরসুন্দরী—নন্দ, এসব তোমার কি হচ্ছে ? তুই কি সত্যি ফেপেছিস্ ?  
রাত দুপুর থেকে তুই এ-সব কি ঘুট্ঘাট্ আরম্ভ করেছিস্।

নন্দ—তোমাদের ঐ দোম মা, ব'সে ব'সে খালি সমস্তাপুরণ। যাই কি  
না যাই, আজ যাই কি কাল যাই—এই ক'রে আজ একমাস চ'লে  
গেল। আমি আর কাজকর্ম ফেলে কত দিন বাড়ি ব'সে থাকব ?

হর—তুই বাবা সব ব্যাপারেই বড্ড তড়বড় করিস, ছেলেবেলা  
থেকেই দেখে আসছি তাই। এতদিনের ঘর-সংসার বিষয়  
সম্পত্তি—সব ছেড়ে চ'লে যাব—এত বড় কাজ—দু'দিন ভেবে  
চিন্তেই করতে হয়।

নন্দ—ভাবনা-চিন্তা অনেক ক'রেছ মা ; এত দিন ব'সে ভাবনা চিন্তা-

ক'রেইত ঠিক করলে আজ রওনা হবে। এখন যদি তোমাদের আবার ভাবনা চিন্তায় পেয়ে বসে তবে আগাকে তোমরা ছেড়ে দাও, তোমাদের যা ইচ্ছে হয় ক'রো।

হর—আরও ভাবতে হয় বৈ কি। কাল সারাটা রাতে ঘুমোই নি, ব'সে ব'সে ভে'বছি। আমি বলি কি নন্দ, আর কিছুদিন এখানে থেকেই দেখি না।

নন্দ—আবার সব পুরোণো তর্কই তুললে। তুমি ত ঘরে ব'সে থাক মা, সব কথা ত জান না। আমিও অনেক ভেবে দেগেছি। যেদিন বাঙলা দেশকে কেটে ভাগাভাগি ক'রে নেওয়া হয়েছে, সেইদিনই জানি, এ দেশ-গাঁ ছেড়ে চলে যেতে হবে।

হর—তো'র যেতে হয় তুই চলে যা।

নন্দ—শুধু আমি গেলেই হবে না। আমি স্পষ্ট দেখতে পাচ্ছি, বাবাও আর এখানে দু'দিনও তিষ্ঠোতে পারবেন না। তুমি ভাবতে পার মা, আমাদের সাত-পুরুষের খামের প্রজা আইজদি সেদিন আমাকে হাটের ভেতরে দেগে পাঁচজন সাগ্রেদ্ জুটিয়ে আমাকে দেখিয়ে দেগিয়ে সিগারেট ধরাল—আর তাই ফুঁকে ধোওয়া ছেড়ে ছেড়ে ফচ'কেমি করতে লাগল!

হর—নোতুন নোতুন এসব হচ্ছে, আবার হয়ত দু'দিন পরে শুধরে যাবে। চ্যাণ্ডা মানুস, সব কি বুঝে করে? দু'পয়সা হাতে পড়েছে—আর কষ্টিনষ্টি করে। ওর বাপ করিম মিঞাকে ত দেগেছি—এখনও বোমা ছাড়া ডাকটি নেই, মাটির মানুস।

নন্দ—তুমি ঝোঝ না মা, এসব আর শুধরাবার নয়। ঐ সব মাটির মানুস আবার ইটপাটকেল হ'য়ে যেতে দু'দিন লাগবে না।

হর—খয় ত একটা আছে উপরে।



নন্দ—সে সবে তোমরা বিশ্বাস কর, আমরা করি না। তারপরে মহলের খবর জান ? একটি পয়সা আদায় নেই, নায়েব মুহুরির পর্যন্ত মাইনে চলছে না। এবার লাটের খাজনা সব ব্যাঙ্ক থেকে তুলে দিতে হবে। কি লাভ এখন এই বিময়-সম্পত্তি আঁকড়ে ধরে থেকে ?

[ বাহিরের দুয়ারে খট্ খট্ শব্দ ]

নন্দ—কে, কে ?

দুর্গা—( বাহির হইতে ) বৌঠান উঠেছ নাকি, বৌঠান—

হর—কে, দুর্গা ঠাকুর ঝি নাকি ?

( বাহিরে ) হ্যাঁ গো হ্যাঁ—

হর—এত রাত থাকতে ! ( দুয়ার খুলিয়া দিল )

[ মধ্যবয়সী ব্রাহ্মণ বিনবা দুর্গার প্রবেশ ]

দুর্গা—দেখ এসে নন্দ, পচ্চিমের ভিটার নারকেলগুলো কারা সব দাপুড় ছুপুড় ক'রে পেড়ে নিয়ে যাচ্ছে। 'কে' বলে ডেকে এগোতে আবার তিন চারটে ছোঁড়া লাঠি দিয়ে সুপারি গাছগুলোর উপরে বাড়ি দিতে দিতে আমাকেই তেড়ে এসেছে। এখন আমি কি উপায় করি বল দেখি বাবা ! অত বড় একটা বাড়িতে আমি কি একা একা ম'রেই পড়ে থাকব ?

হর—এই বা কি অনাচ্ছিষ্টি হ'ল ! গাছের ফল গাছে রাখতে পারা যাবে না—মানুষ তা হ'লে থাকবে কি ক'রে !

দুর্গা—গাছের ফল বৌঠান ? বাশ বাড়ের বাশগুলো সব কেটে নিয়েছে দিনের বেলাই। ভয়েতে কাছে এগোই না, দেখেও দেখি না। সেদিন গোসাঁই ঘরের টিন ক'খানা সন্ধ্যা বাতীরেই ছুটিয়ে নিয়েছে ; উত্তর ঘরের বারান্দার কাঠের কবাট জোড়া

তুলে নিয়ে গেছে। নিত্য নিত্য ভোগাদের এসে কত আর  
বলব ?

নন্দ—আচ্ছা চলত পিসি—আমি একবার দেখছি—

হর—নারে নন্দ, কাজ নেই বাপু তোর গিয়ে। আবার কোথায় কি  
হাস্যামা বাঁধাবি। তার চেয়ে আয় দেখি ঠাকুরবি, আমিই  
লোক-জন পাঠাচ্ছি তোর সঙ্গে।

নন্দ—তাই ভাল মা। ( হরসুন্দরী ও দুর্গার প্রস্থান। নন্দ আবার  
মাল-পত্র গুছাইতে আরম্ভ করিল। ) এঁদের মতি আর কিছুতেই  
স্থির হবার নয় ; জোর ক’রে টেনে নিয়ে যাওয়া ছাড়া আর  
উপায় দেখছিলেন।

[ বাহিরের দুয়ার দিয়া আগাগোড়া খলের চটে মোড়া  
বাঞ্চারামের প্রবেশ—শুধু শ্বাস ছাড়িবার জন্য এবং দেখিবার জন্য  
কপালের নীচে ইঞ্চি দু’য়েক ফাঁক। নন্দলাল সহসা একটু  
ভড়কাইয়া গিয়া ]

—করে—বাঞ্চারাম নাকি রে ?

বাঞ্চারাম—( বিরক্তির কণ্ঠে ) আইজ্ঞে হয়।

নন্দ—সেটা বাপু ঢোকার সঙ্গে সঙ্গেই বলতে হয় ! নইলে যে মূর্তিতে  
তুই দেখা দিয়েছিস্—

বাঞ্চারাম—আর মঙ্করা করবা না কত্তা—তোমার জন্মে দুফার রাত্তিরে খুনের  
দায়ে পড়ছিলাম আর কি ! ( বলিতে বলিতে তিনচার পল্লা করা  
চটগুলি গা হইতে খসাইতে লাগিল। )

নন্দ—কেন ব্যাপার কি ?

বাঞ্চারাম—ব্যাপার ভোগার গরজের ঠেলা বাবা ! দেশ ছাড়বা এই পরের  
রাত্তিরে—তার মাজ-গোছ আরম্ভ হইছে আগের রাত্তিরে। এই

মাঘমাসের রাত্রির—কি ভাবে আসি কও না বাপু! আমার কি তোমার মতন নয়শ' পঞ্চাশটা আলিষ্টর আছে, না শাল-গরদের ঢাকনি আছে?

নন্দ—তাতে হয়েছেটা কি বল না।

বাঙ্গা—হইছে মানুষ খুন। দুফার রাত্রিরে শীতে মরি, চট মুড়ি দিয়া বাইর হইছি পথে; গ্রাপা ঘরামির বুড়ী মা বসা ছিল একা একা আন্ধারের মধ্যে জুলি পথে—নৈলান রসের পাহারায়। দূরের থিকা আমারে যেই দেখা অমনি 'ওরে গ্রাপা' কইয়াই চিং। এক দৌড়ে আইল গ্রাপা, আইল ভাপা, কিল্বিলু কৈরা আইল যত কাল-ভৈরবের চালা-চামুণ্ডা! কথা নাই বাতী নাই, একটায় বুক এক ঘুঘি, একটায় মাজায় এক লাথি, একটায় পিঠে এক কিল। ভাগ্যে দৌড়া'য়া আইল বন্ধু খুড়া—নইলে এই রাত্রিরেই জন্মের মতন হইছিলাম দেশান্তরি।

নন্দ—তবে তুই গেছিলি কেন অত রাত্রিরে আবার বাড়ি? বারণ করেছিলুম না?

বাঙ্গা—আমি তোমার এইখানে বৈয়া কৈলকাতা যাবার যোগাড় যস্তর করি, আর একা ঘরে পাইয়া আমার বউ লইয়া যাউক চোরে। আমার এমন দেশান্তরি হওনের বাই হয় নাই বাপু।

নন্দ—কেন, তোরইত গরজ দেখেছি সব চেয়ে বেশী।

বাঙ্গা—না গো বাপু, আমার কোন গরজ নাই, আমি বাড়ি-ঘর ছাড়ুগ না।

নন্দ—সেকি নিজের বুদ্ধিতে বলছিস, না বউএর সঙ্গে রাত্রিরে পরামিশ ক'রে ঠিক করলি?

বাঙ্গা—এর আবার পরামিশ কি? পোলা নাই পান নাই—সোয়ামী

আর ইস্তিরি ; খাই না খাই পৈড়া থাকুম বাপ-দাদার ভিটায় ।

কোন্ বৈজ্ঞানে যামু মরতে ?

নন্দ—তবে যে আমি আসা অবধি আমার দুই কানে গর্ত করে দিয়েছি  
ঘুমুর ঘুমুর পুমুর পুমুর ক'রে—তুই এদেশে আর থাকতে  
পারবি নে বলে ?

বাঙ্গা—তোমরা যত কৈলকাতার মানুষ দেশে আইসাইত আগাদের ভয়  
বাড়াও—নইলে তো মোরা ছিলাম বেশ ।

নন্দ—ছিলি বেশ ? তবে যে তুই দিনরাত বলতি, এখানে থাকলে না  
খেয়ে ম'রে যাবি, তোর তৃতীয় পক্ষের জোরমন্ত বউ দেখে কারা  
সব সন্ধ্যা রাত্তিরে কলাবাগানের আড়ে বসে ফিস্ফাস্ করে, একা  
ঘাটে গেলে তুড়ি দেয়, দুপুর রাত্তিরে তোর হোগলের বেড়ায়  
খচ মচ্ শব্দ করে,—ধুপ্ ধাপ্ পায়ের শব্দ পাস, সারা রাত্তিরে  
তোর ঘুম হয় না ! তুই না বলেছিলি কারা এসে হাঁড়ি শুকু  
তোর খেজুরের রস নাবিয়ে নিয়ে যায়, পুকুরে না ব'লে এসে  
জাল ফেলে—জমির ধান কেটে নেয় ? ( বাঙ্গারাম উদাসীনভাবে  
নিরুত্তর ) কথা বল, জবাব দে । এট ক'দিন ধ'রে তুই আমার  
হাড় জালিয়েছিস্—আর এখন বলছিস্ ছিলি বেশ ! খালি  
ক'লকাতার লোক এসে তোকে ভয় দেখিয়ে পাগল ক'রে  
তুলেছে !

বাঙ্গা—শীতের মধ্যে ঐ সব চোটপাট রাখ বাপু, এখন কাজের কথা  
কও । ( বলিয়া বাঙ্গারাম মালপত্রের কাছে গেল । )

নন্দ—তার আগে তোর মাথাটা ভেঙে গুঁড়ো ক'রে দিতে ইচ্ছা করে ।  
নে তোকে আর গুহনো মাল নাড়াচাড়া করতে হবে না । শোন  
আবার তোকে ব'লে রাখছি, বেলা দশটার ভিতরে বাড়ির সব

মাল-পত্র গুছিয়ে ফেলতে হবে, যা যাবে— যা না যাবে। বেলা তিনটার ভিতরে নৌকোয় উঠতে হবে, সন্ধ্যায় ষ্টীমার ষ্টেসনে পৌঁছতে হবে, আমি রাতের বেলা নৌকো পথে চলব না, মনে থাকে যেন। আর শোন্—দেখে আয় দেখি বাবা উঠেছেন কি না—

বাঙা--হ্যা--ঠিক ওঠেছেন।

নন্দ—কোথায়? কি ক'রছেন?

বাঙা—চণ্ডী-মণ্ডপে লঠন জালা'য়া চণ্ডীপাঠ করছেন।

নন্দ—এটা তা হ'লে প্রতিবাদ। এত রাত থাকতে উঠে—চণ্ডী-মণ্ডপে গিয়ে চণ্ডীপাঠ কোন দিনই হয় না। বেশত, কারুর যদি ষাবার ইচ্ছা না-ই থাকে, তবে আমারই বা জোরাজুরির এমন কি দায় পড়ল? টেনে হিঁচড়ে নিয়ে যেতে আসি নি আমি কাউকে, তুই ও ত ষাবি নে বলছি।

বাঙা--আমার ত গরজ ছিল আঠার আনা।

নন্দ—ছিল তবে এখন আবার আটকাচ্ছে কিসে?

বাঙা—আরে ষার জন্মে দেশ ছাইড়া পালাবার এত গরজ সে-ই দেখি এখন আবার যাইতে নারাজ।

নন্দ—কে, তোর বউ? বউ কেন যাবে না শুনি।

বাঙা—শোনায় আর কাজ নাই দাদা, বাঙারামের কপাল পোড়ছে। তোমারে কি বলুম দাদা, অরে বুদ্ধি দিছে ঐ পচ্চিম পাড়ের ফৈটকা হারামজাদা। রোজ অংসে পান খাইতে। ( আগাইয়া আসিয়া নন্দলালের হাত দুইটি ধরিয়া ) তোমারে কই দাদাবাবু, ঐ বাপের বেঙ্কমা ফৈটকা হারামজাদা আমারে দেশ ছাড়া করবে। তারে আমি একদিন খুন কৈয়া ফাঁসির

কাঠে ঝুলুগ কইয়া রাখলাম। ওর পানের মধ্যে যদি আমি  
করবীর বীচি কুচা কৈরা না রাখি ত আমি নেতায়ামের পুত্রুর  
বাছারাম না।

নন্দ—কেন, সেদিন ত তুই বললি, আইজদ্দির চোখ পড়েছে তোমার  
বউর উপরে।—আজ আবার ফটকে ফটকে করছিস্ যে?

বাছা—ঐ ত খুঁটার জোরে মেড়া কোন্দে। আইজদ্দির উদ্দানিতেই ত  
কৈটকার এত সাহস।

নন্দ—(অগ্রমনস্কভাবে কান পাতিয়া দূর হইতে আগত আজানের শব্দ  
শুনিয়া) ঐ আজানের শব্দ আসছে কোথেকেরে বাছা?

বাছা—বোধকরি সোনাই প্যাদার বাড়ির দরগায়।

নন্দ—সোনাই প্যাদার বাড়িতে আবার দরগা কোথায় রে?

বাছা—ছিল না, জঙ্গল ফুইড়া বাইর হইছে

নন্দ—সে কিরে?

বাছা—সোনাই প্যাদার বাড়ির পিছনে সেই ইচ্ছ মিক্কার ছাড়া ভিটা—

নন্দ—ই্যা—

বাছা—এবারে পাটের নগদা দাম পাইয়া সেটা কি'না নিচ্ছে সোনাই  
প্যাদা। তারই জঙ্গল সাফ করতে করতে বাইর হইয়া পড়ছে  
দুইটা ভাগা গম্বুজ। তার উপরে ছনের ছাউনি দিয়া দরগা  
তুইলা ফেলেছে। এবার দেখি সেখানে কত ছিন্নির মোচ্ছব!

নন্দ—ঐ আজান দিচ্ছে কে?

বাছা—বোধকরি ইয়াসিন্ গাজি।

নন্দ—ইয়াসিন্ গাজি কেরে?

বাছা—সেও ছিল না এ মুহূর্তে, কিছুদিন হয় আইয়া জোটেছে দক্ষিণের  
চরের ধিক। বড় ফকির দাদা, দিনরাত্তির কাজ কারবার দ্যাযতা-

দুনের সঙ্গে ; ষষ্ঠীর দিনের কপাল লেখা গড়গড় কৈরা পৈড়া যায়  
শুধু কপালের দিকে একবার চাইয়া ।

নন্দ—তাই বুঝি খুব ভিড় ?

বাহু—ভিড় আইছে খুব । হিন্দু-মুসলমান নাই সেখানে, বেহান  
থিকা মাজবাতি পয্যন্ত লোকের ধরা ।

নন্দ—তুই গেছিলি কোনো দিন ?

বাহু—মিছা বলুম না তোমার কাছে, গেছিলাম একদিন পয়লা রাত্তিরে ।

নন্দ—কি করলি গিয়ে ?

বাহু—গরিব মানুষ, কি আর করি ? দুইখানা মোম দিলাম গাজির  
দুই পাশে ।

নন্দ—শুধু সেইটুকু বিশ্বাস হয় না । আর কি করলি ?

বাহু—আর আনলাম একটু পানিপড়া ।

নন্দ—তুই তাই গেলি ?

বাহু—আমি খামু ক্যান,—বউ খাইল ।

নন্দ—কেন ?

বাহু—মাচা কথা কই তোমারে । ভাবলাম কি, ত' দুইটা বউ  
মারা গেল, ছেইলা হোক মাইয়া হোক—একটা কড়া যদি  
থাকত ! এখন যদি এই ছোট বউটার অদেটে কিছু থাকে ।

নন্দ—( গম্ভীর ভাবে ) হঁ—

বাহু—তাও কই তোমারে । এই দেখলাম ভাইবা, একটা পোলাপান  
কিছু না হইলে ঐ ছোট বউটারে আর রাখতে পারা যাইবে না  
ঘরে । ঐ ফৈটকা হারামজাদা—বোঝালা—বাপের বেজম্মা  
ঐ ফৈটকা হারামজাদা,—গেরদের মানুষ না খাইয়া মরে—জ্বরে  
মরে, কলেরায় মরে, যমের চোক্ষে ধূলা দিয়া আছে ঐ ফকর

ছোড়া—দিন দিন বাইডা ওঠাচ্ছ যেন গোকুলের ষাঁড়। আমি কৈয়া দিলাম, তুমি দেখবা—ঐ নিষ্কুণ্ডার ব্যাটা আমার হাড় ভাঙাব, মাংস কাটবে—চামড়া দিয়া ডুগডুগি বাজাইবে। সাথে কি দেখ—

( বাহির হইতে কানাই )—নন্দলাল এই ঘবে নাকি ?

নন্দ—হ্যা, কে ?

( বাহির হইতে ) আমি রোজানকাটির কানাই।

নন্দ—( তাড়াতাড়ি ছুয়াবেব কাছে গিয়া ) কানাই ? এত ভোরে ?

কানাই—( ভিতবে প্রবেশ করিয়া ) তুমিই বা রাতশেষে লণ্ঠন জ্বলে কি কবছ ? একি—এসব কি ? হঠাৎ চললে কোথায় ?

নন্দ—সে পরে হবে, আগে তোমার খবর বল। ব্যাপাব কি ?

কানাই—ব্যাপাব জরুরী, নটলে কি আব এত রাতভোরে ধাওয়া ক'রে আসি পাঁচ মাইল দূর থেকে ? ভাবলুম বেলা হ'লে তোমাকে আবার পাই কি না পাই—

নন্দ—কি ব্যাপাব বলত।

কানাই—সলিমপুর থেকে এক মৌলবী এসেছে কাল মাথা-ভাঙাব হাটে। রাত একপ'র ধ'রে সলা-পরামর্শ হয়েছে এতল্লাটের যত মুন্সী-মৌলবীর।

নন্দ—কি হ'ল কিছু খবর রাখ ?

কানাই—খবর পেয়েছি কাল রাত্তিরেই, খবর দিয়ে গেছে মাথা-ভাঙার আকুব খলিকা—আমাদের শান্তি সমিতির লোক।

নন্দ—কি সংবাদ ?

কানাই—সে বলল, মৌলবীর গতিগতি বিশেষ ভাল না। এমনতর উদ্ধানি দিলে মাহুদের মন—বিবিধে উঠতে কতকণ লাগে ?



নন্দ—কি বলেছে এস গৌলবী ?

কানাই—এ দেশ হবে পবিত্র মুন্সিগরাজ্য—এ নাকি স্বয়ং খোদার  
ফরমান ।

নন্দ—ঠিকই বলেছে, নোতুন বলে নি ত কিছু । এ-কথা ত ঠিক হ'য়ে  
গেছে এক বছর আগেই যেদিন বাঙলাদেশ—শুধু বাঙলা দেশ  
নয়—সমস্ত ভারতবর্ষকে কেটে ছ'ভাগ করে নেওয়া হয়েছে ।

কানাই—ঠাট্টা রাখ নন্দ, এ গৌলবীটি যেমন এসেছেন তেমন তাকে  
সরিয়ে দিতে হবে ।

নন্দ—কি ক'রে ?

কানাই—আমাদের যে শাস্তি-সমিতি আছে—

নন্দ—ক্রমা কর কানাই,—ঐ ব্যাপারটি আপাততঃ চেপে যাও । শাস্তি-  
সমিতির কথা চেপে আপাততঃ অন্তকথা তোল ।

কানাই—কেন ?

নন্দ—সত্যি কথা বলতে, আমার ওতে হাসি পায় !

কানাই—কেন ?

নন্দ—আচ্ছা ধর কানাই, ঘন বর্ষার দিনে হঠাৎ যখন প্লাবন আসে তখন  
যদি কয়েকটি চাষী তাদের ফসলের মাঠের আলের উপরে দাঁড়িয়ে  
যায় হাত দিয়ে সেই প্লাবন ঠেকাতে, তখন জোয়ার কি রকম মনে  
হয় ? তোমাদের ঐ শাস্তি-সমিতি ব্যাপারটাও আমাব সেই  
রকমই লাগে । এই শাস্তি-সমিতি দিয়ে তোমরা যদি এই সব  
মৌলবী ঠেকাতে পার ঠেকাও—ভালই ত ।

কানাই—আমরা ঠেকাব—তুমি ?

নন্দ—আমি অপবিত্র রাজ্য স'রে পড়াই ঠিক করেছি ।

কানাই—তার মানে তুমি পালাবার মতলবে আছ ?

নন্দ—খোঁচা দিয়ে বলতে ইচ্ছা করলে তা-ই বলতে পাব, নতুবা

মোটের উপবে বাজ্য নিষ্কটক ক'রে দিয়ে স'রে পডছি।

কানাই—এটা তোমাব অভিমান আর উদ্ভার কথাই বললে।

নন্দ—আব যে কি বলা যায় তাই ত বুঝতে পাবছি নে।

কানাই—তোমাব সঙ্গে এ নিয়ে এই ভাবে তর্ক করতে হবে ভাবিনি  
নন্দ। এ নিয়ে তর্ক করতে করতে এখন নিজেবই বিবক্তি ধ'রে  
গেছে। তর্ক না ক'বে জিজ্ঞেস করছি, এইটাই কি তুমি  
প্রতিকারের উপায় মনে কবছ ?

নন্দ—ঠিক প্রতিকারের উপায় বলতে পাবি না, এটাকে আমি বলব  
আত্ম-বক্ষাব উপায়।

কানাই—যাবা তোমাব মতন স'বে পড়তে না পারবে ?

নন্দ—( একটা সিগারেট ধরাইয়া ) ব'সে ব'সে কর্ম ফল হুগবে।

কানাই—আর তাদের অতীত দিনের যে-সকল কর্ম ফল ব্যাক-ব্যালান্স  
হ'য়ে ক'লকাতায় বিরাজ কবছে তুমি ব'সে ব'সে তার  
ফল ভোগ করবে ?

নন্দ—ও সব বক্তৃতার ফুলঝুবি অনেক দেখেছি-শুনেছি কানাই,  
কতগুলো গাল-ভরা বুলি এখন সবাই শিখে নিয়েছে। আজকাল  
আব ওতে বাহাতুবি নেই কিছুই।

কানাই—তুমি ক'লকাতাব উকিল, তোমার সামনে বসে বক্তৃতার  
ফুলঝুবি ছোটাব এমন বেয়াদবি নেই আগাব। তবে এটাও  
জেনো, মস্তবড় একটা যুগসন্ধির মাঝখানে দাঁড়িয়ে আছে দেশটা।  
দেশের সাধারণ অল্প লোক দিনরাত শুধু ভয় পাচ্ছে, একে ধরতে  
পারছে না, তাই তারা তাকার তোমাদের দিকে।

নন্দ—তাকালেই বা কি করতে পারি ?

কানাই—কোন কর্তব্য নেই তাদের সম্বন্ধে তোমার ?

নন্দ—কর্তব্য নেই তা নয়, কিন্তু সে কর্তব্য পালন করবার কোনো উপায় নেই। চারদিক থেকে হাত-পা বাধা। শুধু পারি অসহায় অপর দশজনের মতন এখানে নিরুপায় প'ড়ে থেকে বেইজ্জতি হতে—অনাহারে অবিচারে এখানে বসে তিলে তিলে মরতে। তাতে ছুনিয়ার কারো কোন লাভ আছে ?

কানাই—আমি বলি লাভ আছে। জানইত নন্দ, যারা ডুবতে বসে তারা খড়কুটো পেলেও আঁকড়ে ধরতে চায়।

নন্দ—এইগুলোকেই আমি বলছিলুম বক্রতার ফুলঝুরি, যেগুলো দূরের থেকে দেখতে শুনতে বেশ, কিন্তু খুব কাছের ক'রে গ্রহণ করবার নয়। খামকা একটা সাম্প্রদায়িকতার জ্বলন্ত আগুনে ঝাঁপিয়ে প'ড়ে প্রাণ খোঁধানোতে বাহাছুরি থাকতে পারে, লাভ নেই কিছু।

কানাই—আমি বলব নন্দ, এটা তোমার গোড়াতেই ভুল। এটা শুধু সাম্প্রদায়িকতার আগুন নয়। উপরে সাম্প্রদায়িকতার ধোঁয়া লেগে আমাদের চোখ ঢেকে গেছে; কিন্তু সে ধোঁয়ার নীচে যেখানে সত্যিকার আগুন জ্বলছে সেটা যুগান্তের আগুন।

নন্দ—তার মানে ?

কানাই—মানেটা অতি সোজা নন্দ। একটা মানুষ যখন অনেকদিনের পুরোণো হয়, তখন সে মরে। মরে সে আপনি, তবু একটা উপলক্ষ্য গ্রহণ ক'রে মরে। মরলে আগুন জ্বলে, পুরোণো যায়, নতুন আসে। তেমনি একটা যুগেরও। সে পুরোণো হ'য়ে গিয়ে আপনি মরে,—ম'রে জ'লে শুঠে একটা উপলক্ষ্য গ্রহণ ক'রে। সে জ'লে পুড়ে যায় ব'লেই ত নোতুন যুগ আসে।

নন্দ—এটা বুঝি তোমার নোতুন যুগের আগমনীর মশাল? আগাদের দিয়েই বুঝি খড়কুটো করতে চাও?

কানাই—শুধু তোমাদের দিয়ে কেন, কগবেশী সকলকেই পুড়তে হবে।

নন্দ—শুনতে মন্দ শোনাচ্ছে না কানাই। অনেকদিন বক্তৃতায় শুনেছি। এক যুগের পারে যেটা দেখা যায় শ্মশানের আগুন, অগ্ন্যযুগের পারে সেইটেরই দেখা দেয় মশালেয় আগুন!

কানাই—বক্তৃতা বলে ব্যঙ্গ করলেইত সত্যটা আর মিথ্যা হ'য়ে যায় না নন্দ।

নন্দ—কিন্তু এয়ে একেবারে এক তরফা পোড়ান কানাই। একটা বিশেষ সম্প্রদায়ই কি এ যুগের খড়কুটো হল?

কানাই—সেখানেও বোধহয় ভুল করেছ। আগুন লেগেছে বিশেষ কোন সম্প্রদায়ের ভিতরে নয়, আগুন লেগেছে বিশেষ ধরনের একটা জীবন-ব্যবস্থায়। জঞ্জালটা বেশী জমেছিল যে সম্প্রদায়ের ভিতরে, আগুনটা লেগে গেছে সেই দিক থেকেই; কিন্তু সবগানি জলা না দেখে তুমি তার সবটা বিচার করতে পার না।

নন্দ—অন্য কোথাও ত জলার লক্ষণ দেখতে পাচ্ছি না কিছুই।

কানাই—তার মানে তুমি বলছ, একটা সম্প্রদায় দেখতে না দেখতে বাস্তুতাবা ছরছড়া হ'য়ে গেল;—তার জমা-জমি গেল—ধন গেল জন গেল—মান গেল ইচ্ছাং গেল. আর তারই পাশে দেখছ আরেক সম্প্রদায়ের একেবারে রাতারাতি কি বাড়-বাড়ন্ত!

নন্দ—সাদা চোখে ত তাই দেখছি।

কানাই—সাদা চোখে দেখছ না, বিশেষ ধরনের চশমা প'রে দেখছ।

একটা কথা মনে প'ড়ে গেল নন্দ । আগে আগে গাঁয়ে কলেব।  
লাগলে কি হ'ত মনে আছে ?

নন্দ—সেই ফকিরের ওঝালি ?

কানাই—হ্যা, দাঁড়ি বুলিয়ে ফকির আসত ওলাবিবিকে পুড়িয়ে মারত ।  
কিছু মাধা ক বিবিকে পুড়িয়ে মারে ! বাড়িব গামনে আগুন  
জলে ত বিবি দৌড়ে ছাঁচে পালায়, ছাঁচে আগুন জলে ত বাশ  
বনে যায়, বাশবনে আগুন জলে ত পালায় 'নাড়াব কুড়ে'র নীচে ।  
পুড়ে মরতে চায় না সে বিচ্ছুতে । এখানেও দেখছি তাই ।  
এক সম্প্রদায়ের জীবনে আগুন জলেছে, বিবি বাতারাতি রূপ  
বদলে 'ভড কবছে গিয়ে অপবকে । কিছু যুগের আগুন যখন  
জলে তখন কি আর পালিয়ে বাঁচা যায় ?

নন্দ—না গো কানাই, নিজের ঘরে, নিজের গায়ে আগুন দিয়ে বসে  
তোমাদেব যুগেব আগুন জালাতে পাবব না ।

কানাই—বেশ ত, না পার পালানু । তবে ঠিক জেনো—যেখানেই  
যাও—তোমার পুবোণো পোষাকটা যদি খুলে না ফেল, তবে  
এ আগুন তোমাব পেছনে ধাওয়া করবেই--তা যেখানে যাও ।

নন্দ—কানাই, বস্তুত'র জগতের চেয়ে পায়ের নীচের জগৎটা বোধহয়  
অনেক বড় ।

কানাই—তুমি চটে যাচ্ছ নন্দ, তোমাকে আর চটাব না । তোমার  
তাড়া আছে অনেক দেখছি, নইলে রাত থাকতে এগন দডাদড়ি  
নিখে বসে যেতে না । তোমাব মতন যারা পালাবে তারা  
শীগ'গির পালালেহ ভাল ।

নন্দ—সে উপদেশ তোমাকে দিতে হবে না ।

কানাই—উপদেশ নয়—অস্তরোধ

নন্দ—তুমি ভদ্রতার সীমা রক্ষা কবছ না কানাই—

কানাই—সেটা চট্ ক'রে এখন বেরিয়ে গেলেই হবে।

[ কানাইর প্রশ্নান ]

নন্দ—ওরে বাহা—(বাহাবাম ইতিমধ্যেই আবার ছালার চট মুড়ি দিয়ে ঘুমাইয়া পড়িয়াছিল, নন্দ ডাকিতেই এ্যা করিয়া লাফাইয়া উঠিল।) এর ভেতরে আবাব ঘুমিয়ে পড়েছিস্ ব্যাটা? তুই কি মাহুষ না জন্তু জানোয়ার? আপিং টাপিং ধরেছিস্ নাকি!

বাহা—ঠিক কইছ কত্তা, দুইটাকেই খুন করুম, আফিং দিয়াই খুন করুম। এই চক্ষু এগনি কৈর। একটু বুজ্ছি--আর দেখি, মাথায় টেডি কাইট্যা বিডি ফোকতে ফোকতে ফেটকা হারামজাদা আইসা উপস্থিত; ছোট বউটারে লইয়া একেবারে রসা'য়া বসছে। এই ফেটকা হাবামজাদা—

নন্দ- -তো'র চোদ্দপুরুষের মাথা খেয়েছে পাঞ্জি ছুঁচো কোথাকার। তুই ফের যদি আবার ছোট বউ আর ফটকের নাম করবি ত এক কিলের চোটে তো'র তালের আঁটির মাথাটা একেবারে পেটের ভেতরে সেঁদিয়ে দেব।

[ বাহিরেব দুয়ারের কাছে কাছেম পিয়াদ।

ও দুইজন মাঝির প্রবেশ ]

কে বে কাছেম নাকি ?

কাছেম—হয়, আলাব কত্তা।

নন্দ—সন্নে আর কে কে ?

কাছেম—নৌকার গাঝি, কথা কইবে কত্তার সন্নে।

নন্দ—আগে তো'র সব ববর বল।

কাছেম—খবর কত—আপনি যেভাবে যা কইছেন সেইভাবেই সব হইবে ।

নন্দ—জমির কথা কি বলল আইজুদি ?

কাছেম—কইল, জমাজমির রক্ষণাবেক্ষণ সেই করবে, ধান পাটের দাম আপনার কাছে পাঠা'য়া দিবে ।

নন্দ—কেন, জমি সে কিনবে না ?

কাছেম—না ।

নন্দ—কেন ?

কাছেম—সে কয়, আমি গরিব মানুষ, জমি কিন্তুম, টাকা কই ?

নন্দ—হঁ—এর ভেতরেই আবার গরিব হয়ে গেছে ? কেন, সেদিন যে সে সোয়া এগার শ' ক'রে কাণি জমির দাম করে গেল ? সব টাকা নগদ দেবে বলল যে ?

কাছেম—এখন ত সে অস্বীকার ষায় ।

নন্দ—অর্থাৎ সোজা মাথায় এবার ঝাঝি বুদ্ধি ঢুকেছে । ভাবছে, কর্তারা যখন দেশ ছেড়েই চলে যাচ্ছেন—আর সে যখন বর্গাভাগে জমি চষে, তখন ও জমি আজ হোক কাল হোক—তার পেটেই যাবে । সেটি আমি হ'তে দিচ্ছি। দেখ কাছেম, একখুনি চ'লে যা' লালচরে ; লালচরের মিঞারা সেদিন হাজার টাকা দর ব'লে পাঠিয়েছিল, আমি তাদের কাছে হাজার টাকায়ই জমি ছাড়ব । এবেলাতেই খবর দিয়ে আসবি, বুঝলি ?

কাছেম—যে ।

নন্দ—ভাল কথা, আজ যে কেতভাটার গালপাৰ্বণ হবে না কিহু, ব'লে এসেছিল সকলকে ?

কাছেম—আমি ত কইলাম—

নন্দ—তারপরে আবার কি ?

কাছেম—আইজদ্দি ত আমায়ে হাইসা উড়াইয়া দিল ।

নন্দ—কেন ?

কাছেম—কয়, ও আবার একটা কথা হইল ? সাতপুরুষের নাচ গান—

মেজবান—ওকি একদিনের মুখের কথায়ই বন্ধ হইয়া যায় ?

নন্দ—তার মানে ? তুই তা হ'লে ভাল ক'বে বলিস নি । আবার

ভোর না হ'তে সব এসে জমা হবে নাকি ?

কাছেম—আমি ত বারণ করছি—জনে জনে—পই পই কৈরা ।

নন্দ—আমি তোমার কোন কথায় আর বিশ্বাস করতে পারি না । সব

লোকজন এসে যদি এখন আবার হৈ চৈ বাধায় ত আমি তোমার শেষ দেখে নেব । কিহে মাঝিরা, তোমাদের আবার কি কথা ?

নৌকো টৌকো ঠিক আছে ত ?

১ম মাঝি—আইজদ্দি নৌকা ত ঠিক আছে—

নন্দ—তবে ?

১ম—কেরায়া যাওয়া ষাইবে না ।

নন্দ—কেন ?

১ম—বারণ হইয়া গেছে ।

নন্দ—কারণ ?

১ম—মাথা-ভাঙার হাটে—মোলবীর ।

নন্দ—কি বলেছে ?

১ম—চাশ ছাইড়া ষারা বৈচাশ ষাইবে তারপো কেরায়া বাইলে গুনা হয় ।

নন্দ—এই কথা শোনাতেই বুঝি নিয়ে এসেছিস এদের কাছেম ?



কাছেম—আমি লইয়া আস্লাম ক্যান, মাঝিরাইত আইল কত্ভার কাছে  
কথাটা জানাইতে ।

নন্দ—ই্যা ই্যা—সবই বুঝতে পারছি আমি । আর ভাল মানষাতি  
করতে হবে না । সরে পর এখন সব ।

[ পট পরিবর্তন । ]

### দ্বিতীয় দৃশ্য

বিকুরায়ের বাড়ির সংলগ্ন ভিটার পুকুরঘাট । ঘাটে দুইটি মেয়ে মঙ্গলা ও  
জঙ্গলা 'শোক' হাতে সুর করিয়া মাঘমগুলের গান গাহিতেছে । ঘাটের  
অল্প দূরে একটা জাকুলের শিকড়ের উপর বসিয়া আছে আঠার  
উনিশ বছরের একটি মেয়ে অতসী ।

মঙ্গলা ও জঙ্গলা—( গান )

আধাগাঙে বালি চুলি আধাগাঙে কালী ।

মধ্যগাঙে ফুটিয়া আছে নাগেশ্বর ফুলের ডালি ।

নাগেশ্বর ফুলে দিলাম বাড়ি,

ফুল ফুটিছে সারি সারি

ভাল পড়িছে সুইয়া,—

কোথায় যাওরে মালীর ছাওয়াল

পুষ্পের সাজি লইয়া ।

অতসী—আজ এখন হয়েছে—এখন থাম, বাড়ি চল,—আমার অনেক  
কাজ আছে ।

মঙ্গলা—বারে—বাড়ি চল কি ? এখন পর্যন্ত যে সুজাই ওঠে নাই ।

অতনী—সূজ্জ ত ঐ উঠেছে মঙ্গলা। তোরা রোজ রোজ দেরী ক'রে  
আমবি মুখ পাখলাতে—আর সূজ্জ কি তোদের জন্ত লেপমুড়ি  
দিয়ে শুয়ে থাকবে।

মঙ্গলা—এ্যা—সত্যই ত সূজ্জ উঠলরে—ধর জঙ্গলা শীগ্গির গান  
ধর। — ( উভয়ে গান )

সূজ্জ ওঠে কোন্ কোন্ বগ্ন।

সূজ্জ ওঠে বক্ত বগ্ন ॥

ওঠরে সূজ্জ উদয় দিয়া।

মানীর ঘরের কোণ ছুঁইয়া ॥

মঙ্গলা—দেখ জঙ্গলা—ঐ যে নন্দকাকা—

জঙ্গলা—সত্যই ত—এইদিকেই ত আসে—

মঙ্গলা—পালাই—পালাই—

অতনী—আহা, পালাবার কি হ'ল? নন্দকাকা কি বাঘ?

জঙ্গলা—হিঁ পিসি, বাঘই ত, ঢুঙ্গী বাড়ির লোকেরা ত তা-ই বলে।

মঙ্গলা—‘কুলোই ঠাকুরের’র ভিখ যাগতে এবার বারবাঘের লেখায় কি  
বলছিল জান না?

অতনী—কিরে?

জঙ্গলা—বলছিল—একবাঘের একবাঘ সাহেববাবু—

অতনী—সাহেববাবু আবার কেরে?

জঙ্গলা—ঐ ত নন্দকাকা।

[ নন্দলালের প্রবেশ ]

নন্দ—কেনরে মঙ্গলা জঙ্গলা,—নন্দকাকা সাহেববাবু ত'তে গেল কেনরে?

অতনী—জান না নন্দ দা, ঢুঙ্গী বাড়ির ছেলেরা যে এবারে কুলোইর  
ভিখ যাগতে তোমার নামে গান রচনা করেছে।

নন্দ—এঁয়া—একেবারে গান? আমার নামে? কি গানের অতসী?

অতসী—তা বলব না, তুমি চটবে। গাঁয়ের লোক সবাই যে তোমাকে  
সাহেববাবু ডাকে।

নন্দ—কেনরে কেন?

অতসী—বলবে না? তোমার বাপ দাদা ছিলেন সব হালুটে গেরস্ত;  
তুমি সহরে গিয়ে লেখাপড়া ক'রে ওকালতি ধরেছ—এবার  
পুরো সাহেব বনে গেছ।

নন্দ—এ সব কথা কি লোকে ইচ্ছে করেই বলে, না তুই বলতে শিখিয়ে  
দিয়েছিস?

অতসী—বারে—

নন্দ—অমন ক'রে স্বর্গের থেকে পাড়িস্ নি অতসী, তুই সে সব পারিস্  
আমি জানি।

অতসী—আমার আর রাত-দিন ব'সে কাজ নেই—

নন্দ—তোমার আর অল্প কাজই বা কি? গাঁয়ে বসে ওকালতিও করিস্নে,  
আর তোমার ত এখন পর্যন্ত খস্তুর বাড়িও হয় নি।

অতসী—ঠাট্টা রাখো নন্দ দা, তোমাকে নিয়ে গ্রামের লোকে কত কি  
ষে বলে—।

নন্দ—কত কি বলে? কি বলেরে অতসী? অনেক খারাপ বলে?

অতসী—খালি খারাপ কেন বলবে? ভালও বলে, খারাপও বলে—  
তুই-ই বলে।

নন্দ—তাই বল। খারাপ বলে, যেমন—

অতসী—যেমন বলে, রায়দের বাড়ির নন্দরায় শহরে গিয়ে পেট ভ'রে  
বিদ্যা শিখেছে—তাতে কি হয়েছে? রায়দের বাড়ির সে জৌলস  
আর নেই। ক্রমে তা নিভেই যাচ্ছে।

নন্দ—হঁ—

অতী—হঁ করলে কি হবে ? তুমি ছুগ্গা পূজার পাঠা সব বন্ধ ক'রে দিয়েছ, লক্ষ্মীপূজার খাওয়া দাওয়া বন্ধ ক'রে দিয়েছ। এবারে নীলপূজায় শিবের 'গিরি-সন্ন্যাসে' কেউ আর জলখাবার পায় নি তোমাদের বাড়িতে। তারপরে তুমি নাকি আবার আজকারের 'ক্ষেতভাঙা'র পাল-পার্বণও সব বন্ধ ক'রে দিয়েছ।

নন্দ—তুই ঘরে বসে এত সব রাজ্যের খবর জানিস ? কার কাছে শুনলি এসব ?

অতী—কার কাছে শুনলুম ? তুমি ত দেশ এসে ঘরে বসে সাহেবিয়ানা কর—দু'দিন পরে আবার শহরে চলে যাও। আমাদের যে গ্রামে থাকতে হয়—হাজার বকমেব কথা শুনে যে আমাদের কান বালা-পালা হয়ে যায় ! কাল যে তুমি কাছেমকে দিয়ে ক্ষেতভাঙতে আসতে সকলকে বাবণ ক'রে দিয়েছ তাতে ক'রে গ্রামেব সবলোক চটে গেছে—তোমার নিন্দা করছে।

নন্দ—গাঁয়ের লোকের নিন্দায় নন্দরায়ের গায়ে ফোস্কা প'ড়ে যায় না !

অতী—তোমার গায়ে ফোস্কা পড়ে না, কিন্তু আমাদের গায়ে ফোস্কা পড়ে। এই সব তুমি ক'রোনা নন্দদা। গাঁয়ের লোককে এমন ক'রে ঘেমা ক'রো না।

নন্দ—ঘেমা আবার কোথায় হ'ল ? তুই এসব বড় বড় কথা শিখলি কোথায় বল দেখি অতী—

অতী—আমবা পাডার্গেয়ে মেয়ে, তোমাদের কাছে কথা কইতে নেই তা জানি ; কিন্তু তবু তোমাকে বলছি, তুমি এইসব আর ক'রো না। বাবা বললেন, এই সাতপুরুষ ধ'রে তোমাদের বাড়ি ক্ষেতভাঙার আমোদ হয়—আর তুমি—

নন্দ—তোর বাবাকে এসব কে বলল ?

অতসী—কাল সন্ধ্যার পরে এই নিয়ে অনেক লোক এসেছে বাবার কাছে, আমিও সব শুনেছি। আগে নাকি ক্ষেতভাঙা নিয়ে তোমাদের বাড়ি কত গান-বাজনা খাওয়া দাওয়া ছিল। আমিও ত কত দেখেছি। এখন দিনকাল অল্পরকম পড়েছে—আমরা তা জানি। তুমি খরচ অনেক কমিয়ে দাও. আমরা বারণ করব না—একেবারে বন্ধ ক’রে দিও না। পাঁচ গাঁয়ের ভেতরে শুধু তোমাদের বাড়ি এই নিয়ে চাষীদের একটু নাচ-গান, আমোদ-আহ্লাদ—এ তোমাকে বন্ধ করতে দেব না।

নন্দ—নেরে অতসী, তুই তোর বক্তৃতা এইবারে খামা। বাপরে বাপ, একেবারে হাঁফ ধরিয়ে দিয়েছিস্। তুই গ্রামে ব’সে লেখা-পড়া না শিখেই এই বক্তৃতা শিখেছিস্—শহরে গিয়ে তুই লেখা-পড়া শিখলে আমাদের আর বাঁচোয়া ছিল না। এই ক’বচ্ছর ধ’রে তোর বক্তৃতায় বক্তৃতায় আমি একেবারে আধমরা হয়ে উঠেছি।

অতসী—বারে, বক্তৃতা আমি আবার কখন করতে গেলুম ?

নন্দ—কেন, তোর চিঠি ? তোর এক একখানা চিঠি ত পাক্কা বাইশ-মনি এক-একটি বক্তৃতার জালা।

অতসী—আমার চিঠি মানে ?

নন্দ—তোর চিঠি মানে হ’ল, তুই মুহুরী হ’য়ে মায়ের নামে যত চিঠি লিখিস্। ও যে তোরই মুন্সীয়ানা তা কি আর আমার বুঝতে বাকি থাকে ? এত উপদেশ বক্তৃতা—ইনিয়ে বিনিয়ে এত কথা—একি আর মায়ের সাধ্য ? আমি ঠিক জানি, এসব তোর কীর্তিকলাপ।

অতসী—বাজে ব'কো না নন্দ দা, বানিয়ে বানিয়ে তুমি যত মিথ্যা কথা বলতে শিখেছ।

নন্দ—আমরা তবু বানিয়ে মিথ্যা কথা বলি, তোমার ত দেখি আর বানাতেও হয় না—বেশ ত চট্ পট্ জোগায়।

অতসী—বেশ, আমি আর চিঠি লিখে দেব না তোমার মাকে।

নন্দ—তা তুই পারবি কেন?

অতসী—তার মানে?

নন্দ—অত মানে দিয়ে আর কাজ নেই। ভোর বেলা মুখ না ধুয়ে তোমার সঙ্গে ঝগড়া করব না আর। দাঁড়া আগে চট্ পট্ ক'রে মুখটা ধুয়ে নি। ইয়ারে—আর কি যেন বলছিলি? আমাকে ভাল কে কি বলে তা ত আর বললি নে।

অতসী—বলে, তুমি মস্ত বড় বিদ্বান।

নন্দ—শুধু এইটুকু?

অতসী—এইটুকু হ'ল? সেদিন শ্যামু তিলির নাত বউ কি বলেছিল জান?

নন্দ—শ্যামু-তিলির নাত বউ তোমার কানে কানে এসে কি কথা বলে গেল তা আর আমি জানব কি করে?

অতসী—শোনই আগে। পিঠা খাবে সেদিন, চাল কুটতে এল আমাদের ঢেঁকিতে। বাড়ি যাবার আগে আমার কানে কানে এসে বলল কি—

নন্দ—যত রাজ্যের মাছুষ সব এসে তোমার কানে কানেই কথা কয় অতসী?

অতসী—অমনি টিপ্পুনী কাটলে কিন্তু আমি আর বলব না।

নন্দ—আচ্ছা বল—

অতসী—তিলি বউ বলল কি, বামুন দিদি, বায় বাড়ির দাদাবাবুকে  
একদিন দেখিয়ে দিতে পার ?

নন্দ—তাই নাকি ?

অতসী—আগে শোন। আমি বললুম কেনরে ? বউ বললে—  
সবার কাছে শুনি কত বড় বিদ্বান্—দেখলে নাকি পুণ্য হয়।

নন্দ—পুণ্য পর্যন্ত হয় ?

অতসী—হ্যা গো হ্যা।

নন্দ—তুই তখন কি করলি ?

অতসী—তোমাকে একদিন দেখিয়ে দিয়েছি।

নন্দ—সত্যি ? কি ক'রে রে ?

অতসী—তা বলছি নে—

নন্দ—লক্ষ্মীটি—বল না—

অতসী—একদিন ছপুর বেলায় নিয়ে এলুম তিলির বউকে তোমার  
মাকে প্রণাম করাতে। তুনি তখন পশ্চিমের ঘরের দক্ষিণ  
বারান্দায় বসে চশমা চোখে কত সব কাগজ বিছিয়ে কাজকর্ম  
করছিলে। দক্ষিণের ঝাঁপটা ছিল খোলা—সেই দক্ষিণের  
নেবুতলায় দাঁড়িয়ে দেখিয়ে দিলুম তোমাকে।

নন্দ—যদি ধ'রে ফেলতুম ?

অতসী—কি আর হ'ত ? বলতুম টক খেতে নেবু পাতা নিচ্ছি।

নন্দ—তা তুই ঠিক বলতে পারতি, মিথ্যে কথা তোর বেশ জোগায়।

তা তিলি বউ দেখে কি বলল ?

অতসী—অত আর বলব না।—একেই যা দেমাক !

নন্দ—আচ্ছা দেমাক ছেড়ে দেব। তুই বল না—

অতসী—বলল, একেবারে রাজপুত্রুর !

নন্দ—রাজপুত্রুর ? বিদ্বান হ'লেই বুঝি রাজপুত্রুর হয় ?

অতসী—আগরা গৈয়ো মুক্খু মানুষ, কাকে কি বলে অত কি আর জানি ?

নন্দ—থাক গে অতসী—তর্ক থাক । গান শুনে এলুম এ পুকুরে মুখ ধুতে—গান যে তোরা খামিয়ে দিলি ।

মঙ্গলা—( ঘাট হইতে উঠিয়া আনিয়া ) আমাদের আজকের গান শেষ !

নন্দ—কই, সূর্য ওঠাতে আরম্ভ করলি—সূর্য ত আর ওঠালি না ।

জঙ্গলা—সে আজ মনে মনে—

নন্দ—মনে মনে কি আর সূর্য ওঠান চলে ? ওতে বত্ত ভাঙা যায় ।

মঙ্গলা—যাঃ—

নন্দ—হ্যাঁ হ্যাঁ—আমি জানি ।

মঙ্গলা—তাই নাকি পিসি ?

নন্দ—পিসি কি জানে, আমি বলছি । আচ্ছা মঙ্গলী-জঙ্গলী সূর্য না হয় উঠে গেছে, সে গান থাক । বত্তের গান জানিস্ ? আজকে চল যাচ্ছি, একটু শুনিয়ে দেনা—

অতসী—তুমি আজই চলে যাচ্ছ ?

নন্দ—হ্যাঁ—সে বলছি পরে ।—শোনা না মঙ্গলী জঙ্গলী তোদের গান ।

মঙ্গলা—তা কি ঐ ভাবে হয় ? বস আগে ( নন্দের উপবেশন ), এমনি আগে কোট কাটতে হয়,—তার শেষে—আহা—সুজ্জাই-গৌরাই কই ।—

জঙ্গলা—( ছুইগাছি ঘাস ছিঁড়িয়া ) এই নেও—এই এক হাতে সুজ্জাই—এই আর হাতে গৌরাই ।

মঙ্গলা—বোকার কাণ্ড দেখ, বা হাতে বুঝি সুজ্জাই ! এই বা হাতে গৌরাই—এই আর হাতে সুজ্জাই ।



নন্দ—এখন বুঝি বিয়ে হবে ?

জঙ্গলা—আগে সূজ্জাই ঠাকুর বাজার করবে না ?

নন্দ—তবে তারি গান গা।

মঙ্গলা ও জঙ্গলা—( উভয়ে সুর করিয়া )

ওড়ে পাগী জোড়ে জোড়ে নদীয়ার কিনারে রে ।

তোমবা নি দেখেছ আমার ছাওয়াল সূজ্জাই কোথায় রে ।

দেখেছি দেখেছি সূজ্জাই মালিয়ার দোকানে রে ।

বাছা বাছা ফুল কেনে বিবাহের কারণে রে ॥

নন্দ—শুধু ফুল দিয়ে বিয়ে হবে ?

মঙ্গলা—শুধু ফুল কেন, আরও অনেক ।

নন্দ—বিয়ের বাজার সূজ্জাই ঠাকুর নিজেই করল ?

মঙ্গলা—তা করবে না ? কত যে সখ !

নন্দ—তাই নাকি ? কেনরে ?

মঙ্গলা—শোন তবে । ধর জঙ্গলা--(গান)

একটি যে ব্রাহ্মণের কণ্ঠা মেলিয়া দিছে কেশ ।

তা দেখি ছাওয়াল সূজ্জাই ফেরেন নানান্ দেশ ॥

ও সূজ্জাইর মা—

তোমার সূজ্জাই ডাক্তর হইল বিয়া করাও না ॥

একটি যে ব্রাহ্মণের কণ্ঠা মেলিয়া দিছে শাড়ী ।

তা দেখি ছাওয়াল সূজ্জাই ফেরেন বাড়ি বাড়ি ॥

ও সূজ্জাইর মা—

তোমার সূজ্জাই ডাক্তর হইল বিয়া করাও না ॥

নন্দ—এত সব ? এখন তা হ'লে বুঝতে পারলুম । তা'হলে ত বিয়ের

জন্তে পাগল হবেই ।

অতসী—হয়েছে মঙ্গলা-জঙ্গলা, আর কাজ নেই বিয়েতে, এখন বাড়ি যা।

জঙ্গলা—কাল মুস্তী পিসি সোনাপিসিকে কি বলছিল জান?

অতসী—( ধমক দিয়া ) এই জঙ্গলী—

নন্দ—কি বলছিল জঙ্গলী, বলত—

জঙ্গলা—বলল কি—এই সেদিন না—সোনাপিসি না—লাল শাড়ী

পরনে—আর খোলা চুলে—আমাদের বাড়ি আসছিল।—

নন্দ—মুস্তী পিসি কি বলল?

জঙ্গলা—বলল—অমন খোলা ‘কেশে’ ঘুরিস্ না অতসী, সূজ্জাই ঠাকুর

কিছু—( বলিয়া জঙ্গলা ও মঙ্গলার দৌড়াইয়া গ্রহান। )

[ পট পরিবর্তন ]

## ভৃতীয় দৃশ্য

বিষ্ণুবায়েব বহির্বাটী। পদার আডালে চণ্ডীমণ্ডপের ভিতরে বসিয়া বিষ্ণুরায়  
গদগদ কণ্ঠে চণ্ডীপাঠ করিতেছেন। মাঝে মাঝে তাঁহার কণ্ঠস্বর শোন  
যাইতেছে। সম্মুখেব আটচালা ঘরে আইঞ্জদ্দি, মেছের, মোস্তাজ,  
বেঙ্গু কুলু, কিনারাম ও আবও অনেক জটলা করিতেছে।

মোস্তাজ—ও দাদা কিনারাম, কও দেখি ভুঁইয়ায় আইজ কোন্ শাস্তোর  
পাঠ আরম্ভ করিলেন। ও ফুট্‌ফাট্‌ সাপের মস্তুর যে আর  
ফুরায়ই না।

কিনারাম—চণ্ডীপাঠ মেঞা চণ্ডীপাঠ। অত ঠাট্টা বট্‌কাবা করবা না।  
বাক্য জান ? ‘ঠাট্টা কবে চণ্ডী, খমে তার মুণ্ডি।’

মোস্তাজ—ওবে বাবা, একেবারে মুণ্ডিপাত ! তবে চুপ যাউ। কিন্তু  
দাদা, এদিকে যে চণ্ডীপাঠ, আর ওদিকে যে খালি মাঠ ! নিয়ম  
পেরখা যে আব কিছুই বইল না। বাপ দাদার কালেরখন  
একটা রেওয়াজ ছিল, এই মাঘমাসের মধ্যদিনে সূজ্জ  
গুঠার সঙ্গে সঙ্গে ক্ষেতের মধ্যে একবার হালখানা চানান, পূবের  
সূজ্জ যে গাছের আগারও পাঁচহাত উপরে উঠল, সে খেয়ালটি  
আছে ?

কিনা—আরে মেঞা, খালি আমাদের খেয়াল থাকলে ত চলবে না ;  
সবইত করার ইচ্ছা কন্ন, এই ত গিয়া ধন্ন !

বেঙ্গু—আরম্ভ হইয়া গেছে ইতিমধ্যেই তোমার ছড়া কাটা ?

কিনা—কেন, তাতে তোমার কোন ক্ষেতি আছে কুলুর পো ?

বেঙ্গু—ক্ষেতি আছে বই কি ? দিনবান্তির কানের কাছে ঘ্যানর

ঘ্যানর—ওকি আর ভাল লাগে ?

কিনা—তোমার ভাল লাগবে কেন ? বাক্য আছে, লেপা-পোছা কুলুর  
পো, মোড ফিরা'য়া ঘবে খো ।

বেঙ্গু—সকাল বেলায় জলের মধ্যে তেঁষাও তোমার বাক্য ।  
মানুষের পোট নাই ভাত—মনে নাই শাস্তি,—তোমার আছে  
খালি বাণীকৃত বাক্য ।

কিনা—ওরে হস্তিমূর্গ, তুই কি বুঝবি বাক্যের মহিমা ? মনের শাস্তির  
জন্মই ত সব বাক্য । কথাষ বলে, —পেটের জন্ম ভাত, ল্যাং-এব  
জন্ম তাঁত, আব মনে বাখা, জীবনের শাস্তি বাক্য ।

বেঙ্গু—বাক্যের ফট ফটিত সবই আমাবগো কাছে । আনুক আইজ  
কাজে ব্যাতি—দেখা যাইবে তোমার বাক্যের জোর ।

কিনা—( সুর করিয়া ) তবে আনুক ব্যাতি, দেখামু বাক্যের  
কেরামতি । জয় মা কালী চতুর্ভুজা, মনের পুষ্পেই কবলাম  
পূজা, নিবেদন মা ঐ চরণে, উববিষ্ট মোর রসনে, লোলো  
জিহ্বায় হাসি হাসি—বাক্য যোগাও মা বাণিবাসি ।

মেছের—তুমি যে একেবারে আসব বন্দনা আবস্ত করলা কিনারাম দাদা,  
একটু সুর সও ।

মোস্তাজ—আব সবু সইয়াই বা কি হইবে ? পালপার্কন আইজ আব  
কিছুই হইবে না । চলরে ওরে কিনারাম ভাই, নাস্তা খাইতে  
বাডি যাই ।

কিনা—( মোস্তাজকে জড়াইয়া ধরিয়া ) বাহার বাবা, বাহার বাবা,  
এইত শিপ্যা নিছ । আইজের তর্জায় কিনাবামেব দোহাব  
'মোস্তাজ মেঞা !

মোস্তাজ—আর দোহার দাদা ডাইয়ার দেখছি, কি যেন রে কইলি  
কিনারাম

কিনা—ভূঁইয়ার চণ্ডীপাঠ, আর তোমার কিনা মুণ্ডিপাত ।

মোস্তাজ—কেনবে দাদা ?

কিনা—নহলে আমার মেলবে কেন ? এই যেমন ধর—( স্বব কাবয়া )

শোন্‌রে মোস্তাজ নির্বাং, ভূঁইয়াব হইবে চণ্ডীপাঠ, তোব চইবে মুণ্ডিপাত, শোনবে মোস্তাজ ধরি হাত, কবিলা তোব বাছে ভাত , যদি হয় তোমার মুণ্ডিপাত, কেমনে খাবি রাঙ্গা চাউলের মিষ্টিভাত , তার চাহয়া আয় আগাব সাথ—ছড়া বান্ধি—

মেছেব—আবে কোন্ গান আবস্ত করলা দাদা ? মেপাবা নাকি কভারে ? সকাল বেলায় একটু শাস্তোব পাঠও করতে দেবা না ?

বেঙ্গু—শাস্তোর ত মেঞা শাস্তোর—

কিনা—এযে সাগর দুস্তর—

বেঙ্গু—তাই-ই দেখিঃ

কিনা—মাথায় মাঝি প্রস্তর— পাঠায় ঘেন ঘনেব ঘর ।

বেঙ্গু—যা কইছিস্ দাদা, এত আর থামবাব নামই নাই ! বচ্ছরেব একটা দিন, এই শীতে কেঁচু বুকে দিয়া রাইত থাকতে বাইর হইলাম কি তোমার ঐ শাস্তোরের জন্ত ?

মেছেব—কাম থাকে তোমাব, বাড়ি গেলেই পারিঃ হাত ধরে কে ?

মোস্তাজ—তুমিই বা অত চট কেন মেঞা ?

কিনা—আহা চটবে বই কি, চটবে বই কি । ~~বাস্তব~~ লাগে , পুত্ৰ

কিনা, তাই ছ্যাং কৈবা লাগে ।

মোস্তাজ—রাখ তোমার ~~পুত্ৰ~~ পুত্ৰ —

কিনা—মায়া ~~কৈবা~~ একেবারে পুত্ৰ পুত্ৰ ।

মেছেব—তাতে ~~কৈবা~~ কৈবা লাগে কি কি

কম পড়ে ? রায়বাড়ির খুদকুঁড়া দিয়াই ত বাইচা আছে ।

কিনা—সাবধানে কথা কইস মোছর—

আইজ্জদি—( কুদ্ধস্ববে ) কোন কেছা আবন্ত কবলা সব ? গায়  
তোমারগো আনন্দেব ঘাব সীমা নাই ? বাড়ি যাও সব—বাড়ি  
যাও—

মোস্তাজ—একফব বেলায় এখন বাড়ি যাও কইলেইত হয় না সদাঁরেব  
পো, এখন যাও ধবে কে ? এখন গিয়া নাস্তা পাঠি কোথায় ?—  
খাই কি ?

আইজ্জদি—আমি তার কি জানি ?

কিনা—এখন সদাঁব হাত ধুইলে চলবে কেন ? তুমি জান না ত জানে  
কে ? আমবা ত কাইল বাস্তিরে বারণই করছিলাম, কি কও  
মোস্তাজ ?

মোস্তাজ—আর এখন যে কইতেছ, বাড়ি চৈলা যা, বাড়ি গিয়া এই  
সকালে এখন খাই বা কি তাই কও । ( কিনাবামেব প্রতি )  
যখন বাড়িখন বাইর হই, তখন বঝলা দাদা, কবিলা কইল,  
তুইটি নাস্তা কৈবা বাইরবা নাকি মেঞা ? ভাবলাম, সেই  
আংগেব দিনেব মেছবান আর না থাকলেও আইজ্জ বচ্ছরের একটা  
দিন—বায়-বাড়িতে নিদান পক্ষে বঝলা দাদা, এই চিডা-নাবকোল  
ভিডমিঠা—তার ত আর বাধা নাই । এখন দাদা, এদিকও  
যায়, ওদিকও যায়, 'পাইলা'র নাস্তা কি আর একটিও এখন

বাস্ত-সমস্তভাবে বাস্তারামের প্রবেশ )

এই যে দাদা বাস্তারাম—

কিনা—বাস্তারাম নয় গো মেঞা—একেবারে বাস্তাকলতক । বাস্তা

আছে---হারায় যদি পাঠাছাগল, হারায় যদি গোক, ভিটা অঙ্ক  
খুঁইজা দেবে—

মোস্তাজ—বাগ্গা-কল্পতরু ।—

কিনা—আরে বাহার বাবা, বাহার বাবা, আইজ মেঞা ছাড়ছি না,  
আইজ দোহারকি আমার দলে ।

মোস্তাজ—বলি প্যাদা, নায়েব, মুহুরি সব আইজ কোথায় গো দাদা ?

বাগ্গা—নায়েব-মুহুরি পরশু গেছে আদায়-তশিলে—

মোস্তাজ—আইজ ক্যাত ভাঙ্গার দিনেও আদায়-তশিল ! এ-সব কও কি  
দাদা ! তা দাদা, কতাপক্ষের ভিতরে এক তোমারই যখন ছিবি  
চরণের দশ্মান মিলল, তখন এক ছিলুম কড়া তামাকই একবার  
খাওয়াও !

বাগ্গা—তামাকের তামাসায় ক্ষেমা দাও—কাজের নাই অন্ত—ব্যস্ত  
আছি—(প্রস্থানোদাত)

কিনা—( হাত ধরিয়া ) আমরা তাইলে কেমনে বাচি ?—

বাগ্গা—( জোরে হাত ছাড়াইয়া ) বাড়ি যাও সব, নইলে দাদাবাবু  
ভীষণ ক্ষ্যাপবে । তর্জন-গর্জন করতেছে বাড়ির মধ্যে ।

আইজদি—কেন ? এত তর্জন গর্জনের ব্যাপার কি হইল ?

বাগ্গা—কেন ? কাছেই কাইল খবর দেয় . নাই সকলরে—ক্যাত  
ভাঙা হইবে না আর এই বছরে ?

আইজদি—ক্যাত ভাঙা হইবে না কি কপাল ভাঙা হইবে ? বছর ভর  
ধাবা কি ? মাটি না ঘাস ?

বাগ্গা—ক্যাত ভাঙতে তোমারে কে বারণ করে সর্দার ? পাল-পাক্বন  
জাঁক-জমক হইবে না কিচ্ছুই ।

আইজদি—ধন্য কন্য তাইলে সব লোপ পাইবে ?

স্বপ্না—হাল নিয়া মাঠে গিয়া নাচন কোঁদন—আব চিড়া-গুড়ের ধ্বংস,  
এ আবার একটা কোন্ দেশী ধম্ম কন্ম ?

আইজদি—কোন্ দেশী ধম্ম কন্ম তুমি জান না? তোমাব বাড়ি কোন্  
দ্যাশে মশায়? তুমিও কি বিলাতেব খন্ সাইব আইলা নাকি  
এই মুল্লকে ?

স্বপ্না—অত চড়া কথা কেন তোমার কও দেখি সর্দাব ?

আইজদি—চড়া-ঢিলার কোন কথা নাই, কথা মোটামুটি এই, আমার  
চৌদ্দ পুরুষে কখনো ক্ষ্যাত ভাঙাব গান বাজনা আমোদ-  
আহ্লাদ না কৈরা মাঠে হাল দেখ নাই—ঐ আমাবগো ধম্ম কন্ম।  
আমরা ত আব সাইব না দাদা, আমরা আমাদের ধম্ম-কন্ম  
ছাডমু না।

[ বিষ্ণুবায় চণ্ডী পাঠ থামাইয়া আটচালায় প্রবেশ কবিল ]

মেছের—চুপ্ চুপ্ - কস্তার শান্তোব পাঠ শেষ হইয়া গেছে।

বিষ্ণু—( অতি গম্ভীর স্ববে ) কিসের জটলা-পটলা হচ্ছবে ওখানে  
আইজদি ?

আইজদি—আইজ ত ভুঁইয়া পনবই মাঘ।

বিষ্ণু—আমি তা জানি।

আইজদি—স্বক্ক না উঠতে আমরা তাই চৈলা আসছি।

বিষ্ণু—কেন, তোরা জানিস্ না, আজ আব ক্ষেত ভাঙার উৎসব হবে  
না কিছু? কাছেম কাল খবর দেয় নি?

আইজদি—তা বিশ্বাস করি নাই।

বিষ্ণু—( গম্ভীর ভাবে কিছুক্ষণ চুপ করিয়া থাকিয়া ) বিশ্বাস করিস্ নি—  
তা ঠিকই করেছিস্। প্রথমটার ভেবেছিলুম .চটব—ভেবে



দেখলুম—না, চটবার কথা ত বলিস্ নি। ( আবার খানিকটা ভাবিয়া ) হ্যাঁ ঠিকই বলেছি। রাগদের বাড়িতে পনেরই মাঘে ক্ষেত ভাঙার কোন উৎসব হবে না—এ কথা ত বিশ্বাস করবার কথা নয়—বিশ্বাস করিস্ নি বেশ করেছি। কিন্তু—( ভাবিয়া ) না—উৎসব আজ আর কিছুই হবে না—ফিরেই যা।

আইজদি—এবারে ক্ষাত তা'লে পতিত থাকবে ?

বিষ্ণু—না, পতিত আর থাকবে কেন ? আর একদিন এসে তোরা নিজেরা নিজেরা ক্ষেত ভাঙিস্। তারপরে 'জোবা' দেখে ভাল ক'রে একদিন হাল দিবি—ধান কয়ে দিবি।

আইজদি—এভাবে ত কোনদিন হইত না।

বিষ্ণু—হ'ত কি আর আমিই বলছি ? যা হ'ত না, তাই হবে। কত জিনিস ছিল না, আজ হচ্ছে ; আজ যা নেই, কাল তা হবে—এই ভাবেই ত দুনিয়াদারি চলছে। তোর বাজানের দাঁত ছিল, এখন নেই ; আমার মাথায় কালোচুল ছিল—এখন সাদা হয়ে যাচ্ছে। সব জিনিস কি সব সময় এক রকম থাকে ?

বেঙ্গু—ভূঁইয়া গরিবের মা-বাপ।

বিষ্ণু—কে বললি তুই ? ( কাছে আগাইয়া ) বেঙ্গু কুলু ? তা গরিবের মা-বাপ তাতে তোর কি ? তুই ত আর এখন গরিব লোক নস যে তোর মা-বাপ হ'তে যাব।

বেঙ্গু—কি যে সব বলেন ! আমি গরিব নাত এ গেরদে গরিব কে ?

বিষ্ণু—কতাবাকী ত খাসা শিখেছি। বেশ ত মিষ্টি মিষ্টি ক'রে বলিস। আমিও তাই শুনেছিলুম সেদিন নিবারণ বস্তের কাছে। হাত-পা নেড়ে নাকি একসঙ্গে তিনঘণ্টা বকুতা করিস্। তোর জাত-ভাইরা তাই তোকে নাকি খুব তারিক করে। বেশ বেশ। এবারে

নাকি তুই ইউনিয়ান বোর্ডের প্রেসিডেন্ট হ'তে যাচ্ছিস, সবাইকে  
নাকি এক হাত দেখে তবে ছাড়বি।

বেঙ্গু—এই সব মিথ্যা কে যে ছড়ায়!

বিষ্ণু—ছড়াবে আবাব কে—ছড়ায় বাতাসে। বাতাসেব কি আর  
কাণ্ড-জ্ঞান আছে যে কার কথা ঠিক কাব কাছে বলতে নেই?  
সবই এনে একদিন আচমকা কানে ঢুকিয়ে দিবে যায়। তা  
আমি খারাপ কিছু বলছি না—ভালই করেছিস। আমাদের  
মাথা ডুবছে—তোদের মাথা ভেসে উঠছে।

বেঙ্গু—আজ যে ভুঁইয়া কি সব কন।

বিষ্ণু—না না, রাগ ক'বে বলছি না, ঠাণ্ডা মাথায়ই বলছি। ইয়া শবীবের  
মবো রক্ত এখনও টগ্‌বগ্‌ ক'রে ফুটে উঠতে চায়—তবুও দেপ  
ঠাণ্ডা মাথাতেই বলছি—ঠিকই হয়েছে। এতো খালি তোব  
আমার ইচ্ছা নয়, বিনাতাব ইচ্ছা। এই সেদিন বহুদিন পবে  
গেলুম চবের জমিজমা দেখতে, গিয়ে দেখি, আমার জমিজমা  
যা ছিল, কেবল ভেঙেই যাচ্ছে—ভেঙেই যাচ্ছে—চেয়ে দেখলুম—  
ওপারে আবাব চর জাগছে। ভাবলুম—বিদাতার ইচ্ছা এই—  
ভালই হ'ল।

বেঙ্গু—শুধুবে আপনার কান ভারী করছে।

বিষ্ণু—কান ভাবীতে কিছু হয় না বে বেঙ্গু, যদি মন ভারী না হয়।  
মন ভাবী এখনো হয়। মন ভারী তখন হয় মখন—(সহসা  
উত্তেজিত গাবে) মখন কানে শুনতে পাই, মঙ্গল কুলুব বেটা বেঙ্গু  
কুলু সভা ক'রে জাতভাইদের বাবণ করে বিষ্টুরায়ের জমাজমি  
চষতে, মখন শুনি, সে চোখ পাকিয়ে হাত নেড়ে বলছে, বিষ্টুরায়কে  
সে হাতেও মাববে ভাঙেও মারবে। সেদিন ইচ্ছে হয়েছিল,

তোর মাথাটা ছিঁড়ে নিয়ে এসে এবারে জমিতে নোতুন ফাস দেব। ( আবার আন্তে ) তা যখন করিনি, তখন কিছুই আর করব না—ক্ষেতভাঙার কোন উৎসবও করতে দেব না। তালুকদারি যখন ছেড়েই দিয়েছি—তখন আর এক আধটা চাল-চলন রেখে লাভ কি? ওতে শুধু চোপ ফেটে জল বেরতে চায়। আইজদ্দি—তালুকদারি না থাকলেও পেট ত আছে কত্না—সেদিকে ত দিষ্টি দিতে হইবে।

বিষ্ণু—কি বললি?—পেট চালাতে হবে। তা ত বটে, তা ত বটে। তুইও ত টোনক-টানক কথা বেশ বলিস আইজদ্দি। তা ভগবান্ যখন পেট দিয়েছেন তখন আর কয়েকটা দিন হয়ত চালাবার ব্যবস্থাও করে দেবেন। আর নইলে, এ বাড়ি-ঘর জমাজমিত শুনলুম দু'দিন পরে তোরাই হ'য়ে যাবে, তখন পুরণো মনিবকে দয়াঘেমা ক'রে না হয় এক মুঠো দিবি,—পুষ্টি ত আর বেশী নেই!

আইজদ্দি—এ সব কথাই বা কে রটায়?

বিষ্ণু—রটালি ত তুই নিজে। হাটের মাঝখানে সেদিন একগাদা লোকের ভেতরে তুইত নিজেই ছড়িয়ে দিলি—হাসতে হাসতে ছড়িয়ে দিলি। তোরা পাটের আর ধানের নগদ টাকা জমেছে অনেক, তারপরে আবার নোতুন 'ভিলারি' পেয়েছিস্, তাতেও টাকা জমেছে বেশ; তাই দিয়েইত শুনছি কিনে নিবি আমার জমাজমি, ভিটে মাটি।

আইজদ্দি—এ সব কত্নার ঠাট্টা।

বিষ্ণু—ঠাট্টা নয়, হয়ত সত্যিও তাই। তবে দেখ, এ বছরটা একটু ধৈর্য ধ'রে থাকলেও পারতিস্,—টাকাত আর ঘর ভেঙে

যাচ্ছে না। (খানিকক্ষণ চুপ করিয়া থাকিয়া) তা হ্যা—শোন আইজদি—তা ভালই বলেছি—তাই কর। এ নিয়ে আর হাঙ্গামা করতে ইচ্ছা হয় না। জমিজমা নগদ দাম দিয়ে তুই-ই নিয়ে নে। করিম চাচার ছেলে তুই—তোমার বাজারের কোলে পিঠে আমিও মানুষ হয়েছি। আমার নন্দ ভোগ করলেও যা, তুই ভোগ করলেও তাই। তবে—তবে—হ্যা শোন, এই হাটে-বাজারে রাস্তায়-ঘাটে ঢাক পিটিয়ে বলে বেয়াস নি। আর না হয় তা বলিস, কয়েকটা দিন একটু সবুর স.—আর কয়েকটা দিনই বা কেন বলছি—এই আজকের দিনটা একটু সবুর স। নন্দ বলেছে আজকেই চলে যেত; সেই বুদ্ধিই দেখছি ভাল। রোজ দু'বেলা আঁচড় লাগে গায়ে—রক্ত বেরোয়—জালা করে। বুড়ো মানুষ ত? মনটা বড় খিচড়ে যায়। হঠাৎ ইচ্ছে হয়—এইবার একবার চটে উঠি,—ইচ্ছে করে অমুকের গলাটা টিপে দিয়ে মুখটা একেবারে বন্ধ করে দি। কাজ কিরে বাপু আর সে হবে? এখন বুঝতে পেরেছি—এ আশমানের ভাঙন—একি আর মানুষ রাখতে পারে? লাভের মধ্যে নিজে মাথা খুঁড়ে মুখ খুঁড়ে মরব। কাজ নেই—আজই চলে যাব—সেই ভাল। তুই না বললেও আমি বলছি—করিম চাচার ছেলে তুই, জমাজমি সব তুই-ই কিনে নে।

আইজদি—সে সব ত কত পনের কথা।

বিষ্ণু—পরের কথা নয়—আজ সত্যি সত্যি সব ছেড়ে চলে যাচ্ছি।

কোথায় জানি না—যাচ্ছি তা ঠিক। বাড়ির ভিতরে গিয়ে দেখ কত কি সব ব্যবস্থা হচ্ছে। তবে দেখ, বাড়িঘর আমি বেচব না, ওটা থাক। রক্ষণাবেক্ষণ তুই-ই করিস; তোমার

বাজান ত এখন বুড়ো হ'য়ে আসছে—তুই-ই একটু দেখিস শুনিস। ঘর বাড়ি বুঝলি আইজন্দি, ( উত্তেজিত ভাবে রামহরি রায়ের ছেলে বিষ্টু রায়ের ঘরবাড়ি—তাতে যেন কেউ হাত দেয় না—বাড়ির কুটোগাছও যেন নড়ে না; এই ভিটে মাটির সঙ্গে যেন ধ্বসে পচে মাটি হ'য়ে মিশে থাকে। ( বলিতে বলিতে বিষ্টু রায় সহসা থামিয়া গেল—সে বাড়ির সামনের খোলা দীঘির দিকে তাকাইয়া রহিল। )

মেছের—দ্বাশ-গাঁ ছাড়বার কথা এসব কি কন বাজান-ভুঁইয়া ?

বিষ্ণু—( শুক হাসি হাসিয়া ) করে মেছেরও এসেছি স্ ক্ষেত ভাঙতে ? তা আসবি ঠিক, তুই আসবি না ত-কে আসবে ? দেশ-গাঁ আজ ছেড়ে যাচ্ছি বটে—তা ব'লে তোদের কি একেবারেই ছেড়ে যাব ? ধম্মের চাকা আবার হয়ত কিরে যাবে—আবার আসব। তোরা ছেলে কত বড় হয়েছে মেছের ?

মেছের—এই ত তিনে পড়ল।

বিষ্ণু—তোকেও ঠিক তিন বছরেই পেয়েছিলুম মেছের। একদিনে মা-বাপ ম'রে গেল কলেয়ার—তোকে নিয়ে এলুম আমি—তিন বছরের ছেলে ! তোরা ছেলে এখন তিনে পড়ল ? তা হ'লে ক বেশ বড় হয়েছে। কথাবার্তা কষ্টতে শিখেছে ?

মেছের—মুখে এখন খই ফোটে।

বিষ্ণু—তাই নাকি ? বেশ বেশ। তা হ'লে মেছের, আজ এক কাজ করিস। এই দুপুরের দিকে—বুঝলি—আমাকে একবার নিয়ে ঘাস ডেকে তোরা বাড়িতে; বয়স ত তিনকুড়ি চার হল, কোথায় যাই—কোথায় থাকি—আবার কিরি কি না কিরি—তোরা বউকে আর খোকাকে আজ একবার দেখেই আসবি !

হ্যারে, তোর বউক্ত এখন বড়সড় হয়েছে,—এখনো তেমনি খিল খিল ক'রে হাসে? দেখ দেখ, ছেলে আমার বউর কথায় লাল হয়ে উঠেছে। যা লাজুক! ছেলে-বেলাতেও তাই-ই ছিল।

আইজদি—বেলা যে অনেক হইয়া যায় ভুঁইয়া।

বিষ্ণু—বেলা হচ্ছে, বাড়ি চলে যা। বলনুমইত—আজ ষাবার ভিড়ে আছি—আজ আর কিছু হবে না।

আইজদি—হইবে না কি ক'ন ভুঁইয়া এই কি একটা কথা হইল?

বিষ্ণু—( সরোষে ) কি বললি? এ একটা কথাই হ'ল না! তাই-ই বলে দিলি? ঠিক মুখের উপরেই বলে দিলি? এতখানি সাহস হ'য়ে গেছে এর ভেতরে? এই-ই ঠিক কথা হল। আমার কথা—বিষ্টুরায়ের কথা—আজ আর কিছু হবে না—কিছুতে না—

[ করিম সর্দারের প্রবেশ ]

( স্বর নামাইয়া ) আদাব করিম চাচা, এই সকালে তুমিও এসেছ?

করিম—আসুম না কেন? বছরের একটা দিন। জার এখন গারে লাগে—সতাইরের উপর বয়েস হইল, একটু রৌদ উঠতে আইলাম। গেলাম সোজা পূবের মাঠে, দেখি কেউ নাই! এখন পর্যন্ত সব এখানে কেন?

বিষ্ণু—চাচা, মনে আর ব্যথা দিও না। ( করিম সর্দারের হাত ধরিয়া ) আজ দেশ ছেড়ে চ'লে ষাবই ঠিক করেছি—আজ আর কিছুতে কাজ নেই।

করিম—তাই কি কখনও হয়? দ্যাশ ছাড়বার কথা কত পেরে হইবে।

এ বেলা ত ক্যাত ভাঙা হোক। ক্যাতেরও ত কত্তা ছাবতা আছে—ক্যাতের ছাবতা রুটে হইলে ধান হইবে কোথাখন কত্তা ?

বিষ্ণু—তাত বটে। তবে—

করিম—এর মধ্যে ভবেটবে নাই। চল কত্তা ক্যাতে চল।

বিষ্ণু—( ভাবিয়া ) তা মন্দই বা কি ? গেলেও ত আর এ বেলাই যাচ্ছি না—

করিম—এ বেলা ত ক্যাত ভাঙা । - -

বিষ্ণু—তাই ভাল। এ বেলায় ক্ষেত ভেঙে না হয় বিকলে রওনা হব।

করিম—বিকালের কথা বিকালে কত্তা, বেহানের কথা বেহানে ; আগের কাজ ত আগে করা যাউক।

বিষ্ণু—তাই হবে চাচা, তাই হবে ; ছেড়ে যাবার আগে আর একবার একটু মাঠঘাট দেখে যাই—একটু তোমার হাতের হাল চমা দেখে যাই ! ( সামনের দিকে চাহিয়া ) করিম চাচা, দেখেছ কেমন ক'রে সূর্য উঠছে—কেমন ক'রে সূর্যের আলোতে আমার দীঘির জল ঝলমল করছে—দেখেছ ? দেখেছ কেমন করে বড় বড় মাছগুলো সার বেঁধে মুখ তুলে জল চিবোচ্ছে আর কলমীর দল ঠুকরে খাচ্ছে ? এ রকম তুমি আর কোথাও দেখেছ ? কোনো গ্রামে ? কোনো দেশে ? ভোর না হ'তে শীতের দিনে এত রোদ—বাড়ির সামনে যতদূর চোখ যায় এমন মাঠ—দেখেছ তুমি—দেখেছ ? আমি ছেড়ে যাব না—এ বাড়ি আমি ছেড়ে যাব না। এ আমার সোনাকুপা—এ আমার স্বর্গ—এ আমার মা ! করিম চাচা, কাল সারারাত আমি জেগেছি—আমার দেহ চল না—মন চলে না ! এই যে দেখেছ চোখের

সামনে ষত গাছ—এ আমার বাবার হাতে রোয়া, আমি আনর  
ক'রে যত্ন ক'রে বাড়িয়েছি। ঐ যে দূরের বটগাছ—ওর নীচে  
পাশাপাশি ঘুমিয়ে আছেন আমার বাবা—আমার মা, তারপাশে  
ঘুমিয়ে আমার তের বছরের রতন—আর ঘুমিয়ে আমার দুর্গা-  
প্রতিমা—আমার দশবছরের মা পদ্মা! ঐখানে আমার লক্ষ্মী-  
নারায়ণ—ঐখানে প্রতিষ্ঠিত আমার বিশ্বনাথ—ঐখানে আমার  
দক্ষিণা কালী! এদের ফেলে আমি কিচ্ছুতে যাব না!—

করিম—ঠাণ্ডা হোন ভুঁইয়া, শক্ত হোন। কোথায় যাইবেন? কি  
হইছে? ছুটলোকে ঝগড়া-বিবাদ করে, তাতে সব জাশ  
ছাইড়া পালাইতে হইবে? কিচ্ছু ভয় নাই, মনে জোর রাখুন—  
চলেন মাঠে যাই, মাঠে গেলেই মনে আবার জোর আসবে।

বিষ্ণু—তাঁই হবে—আজ ক্ষেত-ভাঙার উৎসব হবে। ওরে বাহা—  
ওরে কাছেম—সব আয়; নায়েব-মুহুরি ফেরেনি আজও? না  
ফিরেছে মরুক গে। এস চাচা, আয় দেখি আইজদি, গাছ থেকে  
নারকেল পাড়—চিড়া আন—গুড় আন—সবাই মিলে পেট  
ভ'রে খা—নাচ গা—ফুঁর্তি কর। চল মাঠেই যাই। নেরে  
আইজদি—এই আটচালার মাচায় ওঠ, হালখানা একবার  
নামা দেখি।

আইজদি—হাল ত কত্তা দেখতে পাইতেছি না।

বিষ্ণু—দেখতে পাচ্ছিস্ না? কেন? ঐখানেইত বরাবর থাকে—  
ঐ উপরে; নেই?

আইজদি—দেখিতেছি না ত।

বিষ্ণু—এঁয়া—দেখছিস্ না? তবে? তবে কি হল? ওরে কাছেম—  
( মৈপুখো কাছেম )—যাই কত্তা—



বিষ্ণু - যাই কত্তা কিরে ?—তুই কি নবাব নাকি ? (কাছেমের প্রবেশ)  
 ছিলি কোথায় এতক্ষণ ? আমার হাল কোথায় রে ? ( কাছেম  
 মাথা নীচু করিয়া নিরুত্তর রহিল ; বিষ্ণু যায় বাঘের মতন  
 লাফাইয়া পড়িয়া কাছেমের ঘাড় ধরিল ) কিরে—চুপ ক'রে  
 রইলি যে ? আমার হাল কোথায় ?

কাছেম—হাল ত দাদাবাবু বিক্রি কৈয়া দিছেন ।

বিষ্ণু—এ্যা, বিক্রি ? আমার হাল বিক্রি ? কার কাছে ?

কাছেম—রহিমগঞ্জের জনাবালির কাছে ।

বিষ্ণু - জনাবালির কাছে ? আমার হাল ? আমার বাপ-দাদা ঘাড়ে  
 ক'রে মাঠে ব'য়ে নিদ্রে যেত যে হাল সেই হাল ? এত সাহস ?  
 ডাক দেখি তোর দাদাবাবুকে—আমি দেগে নেব তার ঘাড়ের  
 উপর কটা মাথা গজিয়েছে । হারামজাদা ছেলের দেশ ছাড়বার  
 এত গরজ ! আমার হাল বিক্রি করল—এত টাকার লালচ ?  
 আমার পাজরার হাড় ক'খানা খুলে খুলে বিক্রি করতে  
 পারত না ? আমার হাল চাই—আজই চাই-- একখুনি চাই !  
 আমার ক্ষেত ভাঙার উৎসব হবে—আমার হাল !

[ পট পরিবর্তন । ]

## চতুর্থ দৃশ্য

ব্রজহরি ঘরের বারান্দায় প্রভাতের রোদ আসিয়া পড়িয়াছে ; ব্রজহরি একটা 'মোড়া'র উপর বসিয়া রোদ পোহাইতেছে ও তামুক টানিতেছে ।

ব্রজহরি—ওগো মা জগদম্বা, ঘরে আছিই নাকি ?

( ঘরের ভিতর হইতে অতসী ) কেন বাবা ?

ব্রজ—তুই আমার সেই কাপড়টার কি করলি মা ?

অতসী—( নেপথ্যে ) তুমি কি ক্ষেপেছ বাবা, ঐ কাপড় নাকি আর সেলাই করা চলে ?

ব্রজ—তোমার মত বড়মানষি । সেলাই করা চলে না শু কি হয়েছে ?

তুই সূচ সূতো আর কাপড়টা নিয়ে আয় দেখি এদিকে—

[ অতসীর ছেঁড়া কাপড় ও সূচ-সূতা লইয়া প্রবেশ ]

স্থির হ'য়ে আমার কাছে বস, আমি তোকে দেখিয়ে দিচ্ছি—

অতসী—তোমাকে আর দেখাতে হবে না । ( অপর দুয়ার দিয়া অতসীর মা ক্ষেমকরীর প্রবেশ ) দেখ মা, ঐ কাপড় নাকি আর সেলাই করা যায় ?

ক্ষেমকরী—দে না ফেলে কাপড় আর সূচসূতো—নিজের কাপড় নিজেই জুড়ে নিক ।

ব্রজ—তবেই হয়েছে, মঙ্গল রাত্রার শনি মন্ত্রী—তবেই কার্যসিদ্ধি ! বলি তোরা কেউ ওটা সেলাই করবি না, আমাকে ত দু'টো আলা-চালের হোগাড়ে বেরোতে হবে ? না ঘরে বসে থাকলেই চলবে ?

অতসী—কেন বাবা, তোমাকে ত এই ক'দিন ধ'রে বলছি, কপ্টোলের কাপড় এসেছে—রহিমগঞ্জে ত কাপড় বিক্রি হচ্ছে ; একবার চেষ্টা ক'রে দেখলেও ত হয় ।

ব্রজ—দেখ অতসী, এই বয়সেই তোকে মায়ের মত ভিরগিতে পায় না যেন বলে রাখছি। দিনরাত আবোল-তাবোল বকিস্ না খালি।

অতসী—তোমাকে কিছু বললেই ত ঐ তোমার এক কথা।

ব্রজ—এককথা হবে না ত পাঁচকথা হবে কোথেকে? চেষ্টা কি আমি করি নি? চেষ্টা করলেই যদি পাওয়া যেত তা হলে তুই এমন ধিন্দী মেয়ে ছেঁড়া কাপড়ে এ-বাড়ি ও-বাড়ি ঘুরিস, আমি ঘরে বসে তাই দেখতুম।

ফেম—চেষ্টায় মেলে ত আর সঙ্কলেরই—মেলে না শুধু আমাদের ঘরের লোকের। চির জীবনটাই এই দেখলুম।

ব্রজ—আবোধা জননা লোকের যত ধপর ধপর কথা! পাড়ার ভিতর কেউ পেয়েছে এক হাত কাপড়? কেউ দেখাতে পারবে?

ফেম—কেন? এই যে পটল ডাক্তার—

ব্রজ—তবেই হয়েছে! রাখ তোমার পটল ডাক্তারের কথা। পটল ডাক্তার পৃথিবীতে যা করতে পারে তা ত্রিঙ্গতে ব্রহ্মা বিষ্ণু শিব ছাড়া আর কেউ করতে পারে না। সে গরামানুষকে বাঁচাতে পারে, বাঁচা মানুষকে মরাতে পারে। নে রে অতসী আর দঙ্কাস নি, যদি কিছু করতে পারিস ত কর, নইলে দে আমার কাপড়—ঐ জড়িয়েই বেরোব। দু'টি চালের ঘোগাড় ত চাই।

অতসী—তুমি চটে যেও না, আমার কথা শোন—

ব্রজ—ও সব কথা তুই আমাকে মোটে বলিস নি অতসী, বললেই আমি চটব—ভয়ানক চটব—তোকে আগ থেকেই বলে রাখছি।

অতসী—এ সব তোমার অন্তায় বাবা। দাদা যে তোমাকে কোন খোজ খবর করে না তুমি বল, দাদা কি মাইনে পায়? পাটকলে

তিরিশ টাকা মাইনে—তাতে ত শুনছি কলকাতায় আজকাল একজন লোকের খাওয়াই হয় না। নিজে প'ড়ে থাকে কোন্ ব্যারাকে। তারপরে লোকের অভাবে স্বভাব নষ্ট।

ব্রজ—তোমার কাছে এত প্যাচাল কেউ কখনো শুনেচে চায় ?

অতসী---তুমি যা-ই বল, দাদাকে চিঠি লিখলে সে তোমাকে একখানা কাপড় পাঠিয়ে দেয় না, এ আমি বিশ্বাস করব না কিচ্ছুতে। কলকাতায় ত শুনেছি, কাপড় কত সস্তা—কত লোকে ত কাপড় পাঠাচ্ছেও।

ব্রজ—আচ্ছা আমিই হার মানি—তুই কাল লিপে দিস চিঠি—যত কাপড়ের জন্মে ইচ্ছে হয়। (পথে পটল ডাক্তারকে যাইতে দেখিয়া) আরে এই যে, পটলভায়া যে—বড় ব্যস্ত-সমস্ত দেখছি যে—

[ পটল ডাক্তারের প্রবেশ ]

পটল—প্রাতঃপ্রণাম ঘোষালখুড়া, হাতে রুগী একটা সঙ্গী—

ব্রজ—কে হে? বস, বস—অতসী জলচৌকিটা টেনে দে দেখি।

[ অতসী এবং কেসরীর প্রস্থান ]

পটল—বসব না খুড়া—তাগিদ আছে। রুগী রহিমগঞ্জের মোহন মিয়া—রুগী সঙ্গী।

ব্রজ—কি অসুখ বল দেখি ভায়া!

পটল—তোমাদের বাঙলা কবিরাজি নাম ত বলতে পারব না—

ব্রজ—হ্যারে ভাইর পো, ইংরেজি নামটাই বলে ফেল—এখন ওসব আমরাও ছ'চারটে শিখে ফেলেছি—

পটল—এর নাম হচ্ছে পিয়ে খুড়া রাঙিতটুক।

ব্রজ—ওয়ে বাবারে—

পটল—বলিনি খুড়ো ?—এর নামেই ভয় পেতে হয়, রোগ আরও ভীষণ।

[ অতনী চোকি দিয়া আবার প্রশ্ন করিল. পটল ডাক্তার  
চোকি টানিয়া বসিল। ]

ব্রজ—ব্যাপারটা বাঙলায় একটু বুঝিয়ে বল দেখিনি ডাক্তার।

পটল—সেইত এক ফ্যাদাদে ফেললে খুড়ো। ব্যাপারটা হ'ল এই,—  
এই শরীরের ব্লাড—কিনা রক্ত,—সেই ব্লাড যদি সব গিয়ে  
এক সময়ে হাটের ভেতরে—অর্থাৎ হৃৎপিণ্ডের ভেতরে ঢুকে  
পড়ে—

ব্রজ—ও বাবা, হৃৎপিণ্ডের ভিতরে আবার এত রক্ত ঢুকে পড়ে কি ক'রে !

পটল—তাইত হ'ল খুড়ো, সেইটাইত হ'ল রোগ। হাটেত জায়গা  
নেই—এদিকে এসে ব্লাডের ঠেলাঠেলি—অমনি আরক্ত হ'য়ে গেল  
ব্লাডিভটক।

ব্রজ—এত ভীষণ অসুখ ভাই, এর ত তা হ'লে আর ওষুধ নেই কিছু!

পটল—ওষুধ আছে বই কি, কিন্তু ম্যাও ধরে কে? এর ওষুধ শুধু হচ্ছে  
এই হাটের চারপাশে খালি ইন্ডেকশন। কে দেয় তার টাকা?  
তবে খুড়ো কাল ছ'পাশে ছ'ফোড় দিয়ে কাপড় যোগাড় করেছি  
ছ'জোড়া, এক জোড়া নিজের ধুতি, অপর জোড়া তোমার বধু-  
মাতার শাড়ী।

ব্রজ—কি ক'রে বের করলে?

পটল—বের করলুম? ঐ মোহন মিঞা হচ্ছে ফুড কমিটির প্রেসিডেন্ট;  
যত কন্ট্রোলের কাপড় সব খুড়ো দিনে রাত্তিরে শুধু 'বেলাক'!  
অনেকদিন টেউ টেউ করেছি পেছনে পেছনে ছ'জোড়া কাপড়ের  
জন্মে, ব্যাটা চম্‌চোষা কি আর বের কত্তে চায়?

ব্রজ—বের করলে কি করে?

পটল—তবে কথাটা খুলেই বলি খুঁড়ো। এই মোহন মিঞা যদি ফেরে ডাল্পে ডালে, পটল ডাক্তার ফেরে পাতায় পাতায়। পরশু মোহন মিঞার হাতখানা ধ'রে নাড়ীটা টিপে বলে দিলুম ঐ রোগের ভীষণ নামটি। নাম শুনেইত বাচাধনের কাম হয়ে গেল; আমার হাত ছ'টি ধ'রে বলে, ডাক্তার বাঁচাও। আমি বললুম, ইন্জেকশন্ লাগবে, দামী দামী ইন্জেকশন্। মিঞা বলল, কতটাকা চাই? আমি চুপি চুপি বললাম, আপাততঃ ছ'জোড়া কাপড় হ'লেই চলে। বলতে না বলতে বিছানার নীচ থেকে অমনি ছ'জোড়া কাপড়। এক জোড়া ধুতি, এক জোড়া শাড়ী। পটল ডাক্তারকে আর পায় কে? এত বড় সূইটা বের করে গায়ের ভেতরে ঢুকিয়ে দিয়ে এলুম গরম জল—এপাশে একটু, ওপাশে একটু! যা ফোঁড়া ফুঁড়েছি—সাতদিন টের পাবে—কাকে বলে ইন্জেকশন। উঠি খুঁড়ো বসব না—কাজ আছে।

ব্রজ—আরে বস বস, দেশ-গাঁয়ের ছ'পাঁচটা খবর-পতুর বল। কাল রাত্তিরে যে সব জটলা-পটলা করলে তার কি হল?

পটল—ঐ সব জটলা-পটলার ভিতরে পটল ডাক্তার নেই। গেছে শুনলুম আজ সব ক্ষেত ভাঙতে। দরকার কিরে বাপু, যার জমি, যার নাম-কাম সে-ই যদি থাকে অরাজি—তবে কাজ কি তোদের এ জোরাজুরি দিয়ে?

ব্রজ—তাত বটেই

পটল—আসল ব্যাপার জান খুঁড়ো? আরে পটল ডাক্তারের চোখে ধুলো দেবে এমন বাপের ব্যাটা জন্মায় নি কেউ এ তলাটে। ঐ আইজন্দির মাথায় কুনুন্ধি ঢুকেচে—ভয় করে একটু বাপকে। ধান-পাট বেচে কাঁচা টাকা হাতে পড়েছে বেশ; তাই ভেবেছিল,

বাড়ির পাশের জমাজমি সব কিনে নেবে নগদ টাকায়। এখন ভাবছে, বিষ্টু রায় যখন দেশ ছেড়েই চলে যাচ্ছে, আর জমিগুলো যখন বর্গাভাগে ওরই হাতে তখন আর কিনে লাভ কি?—ও ত বিনে টাকায় ওরই হয়ে যাবে। তারই পরামিশ করতে এসেছিল কাল রাত্তিরে।

ব্রজ—ক্ষেতভাঙা দেখতে তুমি গেলে না?

পটল—ক্ষেপেছ খুড়ো ;-- আজ কি আর ক্ষেতভাঙা হবে? আজ যে বিষ্টু রায় দেশ ছেড়ে চলে যাচ্ছে।

ব্রজ—আজই? এত হঠাৎ?

পটল—চিন্তা নেই খুড়ো, যা একটি সাহেব রত্ন জন্মেছে কুলে, ভিটায় ঘুঘু চরল আর কি! এ সব পুত্রুরের বুদ্ধি। আমাকে ডেকে পাঠাচ্ছে দিনে পাঁচবার; আমি কি করব? বুদ্ধি দিলে শুনবে? কেন যাই অপমানী হতে? লক্ষ্মী ছেড়েছে খুড়ো—লক্ষ্মী ছেড়েছে, নইলে কি এবারে দুর্গা পূজার মোষ বলির জায়গায় পাঠা বলিও বন্ধ! এখন আবারে ক্ষেত ভাঙার পাল-পার্বণও বন্ধ; খালি টেড়ি কাট, নিত্য নোতুন জামা পর, আর সিগারেট ফোক।

ব্রজ—যা বলেছ ভায়া।

পটল—বলি লোকজনে যে তোদের ধান-পান খাজনা-পস্তুর দিচ্ছে না, কেন দেবে? কি মেখে দেবে? তালুকদার মুখে বললেইত হবে না, তালুকদারির তোদের আছে কি?

ব্রজ—তাত বটেই, তাত বটেই। যাক্ গে সে সব বড়লোকের বড় বড় ব্যাপার। শোন ডাক্তার, তুমি দুনিয়ার লোকের উপকার ক'রে বেড়াও, বুড়ো আমার একটা গতি তোমাকে করতেই হবে।

পটল—কি গতি?

ব্রজ—দেখছ না মেয়েটার দিকে তাকিয়ে ? বামুনের মেয়ে—এই উনিশ পেরিয়ে বিশ পা দিল। তোমারও ভায়া গ্রামের কারো কথা কিছু অজানা নেই। এখন ত দেখ, পেটে দিতে পারি না ভাত, ল্যাং-এ দিতে পারি না কাপড়।—তারপরে দেখ আবার কি যে দিনকাল প'ড়ে গেল ! এতবড় মেয়ে ঘরে রেখে দিনরাত যে ভয়ে ম'রে গেলাম। ভয়ে সারারাত ব'সে থাকি। এখন কি উপায় করি বল দেখি। ( পটল ডাক্তার দুইহাতের মধ্যে মাথা রাখিয়া চুপ করিয়া রহিল। ) তুমি যে আর কথা বলছ না, কি ভাবছ ডাক্তার ?

পটল—ভাবছি ? ভাবছি একটা আমাদের গ্রাম্য কথা,—জন্ম মৃত্যু বিয়ে, তিন বিধাতা দিয়ে। তাই ঠিক মিলে যাচ্ছে। কি বলব খুঁড়া, তোমার মেয়ের বিয়ের ফুল ফুটেছে।

ব্রজ—কেন ? কেন ?

পটল—( মাথা না তুলিয়াই গভীর ভাবে ) খুঁড়া, আমি অতসীকে ঘরে রেখে নিশ্চিন্ত বসে নেই। আজ এই সকালে তোমার বাড়ি এসেছি এই বিয়ের কথাই বলতে। পাত্র আমি হাতে ধ'রে বাড়িতে বসিয়ে রেখে তোমার এখানে চলে এসেছি। আমি না বলতেই মুখের কথাটা কেড়ে তুমিই বললে, তাই মনে হচ্ছে, এ কাজ বিধাতারই ইচ্ছা

ব্রজ—কে পাত্র ? কার কথা বলছ তুমি ?

পটল—বলছি আমার সেই শালীর দেওরের কথা, ঐ যে রোজানকাঠির খেণী চক্কোস্তীর ছেলে কানাই। তুমিও ত তাকে দেখেছ অনেক।

ব্রজ—সেই যে হাতে বাজারে বক্তিম্য ক'রে বেড়ায় ?

পটল—হ্যাঁ হ্যাঁ। বক্তিম্য করলে কি হবে, ছেলে বলে ছেলে, সোনার



টুকরো ছেলে। টাকা কামাই করে, পাকাপোক্ত সংসারী। বাড়ির আশেপাশের জমাজমি সব খাস করে নিয়েছে, এই পর্যন্তিংশ টাকার বাজারে চাল কিনতে হয় না এক গোটা। দেখতে শুনতে খাসা, বিদ্যাবুদ্ধিও অনেক।

ব্রজ—এই বয়সে জেল খেটেছে তিন চার বার।

পটল—সে কি আর রামা-শ্যামার মতন চুরি ডাকাতি ক'রে? স্বদেশী ক'রে। স্বদেশীতে জেলে না গিয়েছে কে? আগে সব বড় কত্তা ছিল বিলাত-ফেরৎ—এখন সব বড় কত্তা জেল-ফেরৎ।

ব্রজ—বাপ মা নেই, বড় ভাইটাও ত ম'রে গেল আজ তিন চার বছর।

পটল—বাপ নেই তা বলতে পার, কিন্তু মা নেই তা বলা চলে না। ঐ যে আমার শালী—সে মায়ের চেয়েও বেশী; ওর কাছে তোমার মেয়ে স্নেহই থাকবে। হ্যাঁ, তবে যদি তুমি শহরে চাকুরে ছেলে চাও—মেয়েকে ঠাকুর-চাকরের রান্না খাওয়াতে চাও—তাহ'লে সে ভিন্ন কথা।

ব্রজ—বেশ ত, তাহ'লে একটু খোঁজ-খবর নাও—

পটল—খোঁজ খবর আর নিতে হবে না। ছেলে আজ এসেছিল আমাদের গ্রামে কি কাজে, রাস্তায় দেখতে পেয়ে একেবারে পুলিশের মতন হ'হাত ধ'রে টেনে বাড়িতে নিয়ে গেছি, বলে এসেছি, আজ আমার বাড়ি চারটে না পাইয়ে ছাড়ছি না। সে মহাকাঙ্ক্ষের লোক, সে কি আর তিলেক মাত্রও বসতে চায়? জোর ক'রে তাকে বসিয়ে চলে এলুম তোমার কাছে!

ব্রজ—তাহ'লে ভায়া তাড়াতাড়ি বাড়ি যাও; যদি মত করে—

পটল—যদি আবার কি? মত ত সে করেছেই। এ সময়ের কথা তাকে আমি বলে আসছি তিন চার মাস আগ থেকে।

ব্রজ—আজকে তাহ'লে খাওয়া-দাওয়ার পর একবার নিয়েই এস না,

একেবারে পাকাপাকি কথা শুয়ে যাক।

পটল—তাহ'লে আর দেবী ক'বে লাভ কি খুড়ো? এখনই ডেকে

নিয়ে আসি—শুভস্র শীঘ্রং।

ব্রজ—এখন যে একটু না বেবোলেই নয়। তোমাকে আব ঢেকে চেপে

লাভ কি ভায়া, চণ্ডীতলার নৈবিড়ের চাল কটি না পেলে যে আব  
হাঁড়ি চড়বে না। ঐ অবলম্বনেই ত গাঁয়ে এখনো টাঁকে আছি।

যজ্ঞমান-শিষ্ট যে যেখানে ছিল সব ত স'রে পড়েছে। এখন  
আমাদের উপায় কি বল? বাজারে চা'লের যা দব, আমবা  
কি আর কিনে খেতে পারি?

পটল—কেই বা পারে? সকলেরই এক অবস্থা। বাজ্যে ঘান-চা'ল যে  
কোথায় লুকাল!

ব্রজ—সবই ভায়া পাপে—কলিষ পাপ পূর্ণ হ'বেছে।

পটল—যে বাঁড়তে যাই, শুধু জর আব বক্রহাঙ্গা। হবে না খুড়ো?  
না খেয়েই ত রক্ত হাঙ্গে। যাই, আসব তা হলে কানাইকে  
নিয়ে। ( ব্রজহরির কানের কাছে মুখ আনিয়া ) মেয়েটাকেও  
একবার দেখিয়ে দাও খুড়ো, বুঝলে ত দিনকাল? অতসীর  
যা নাকমুখ—আর যা রং—ওকে বিয়ে করতে চাইবে না কোন্  
ছেলে?

ব্রজ—তাই হবে ভায়া, গরিবেব মান-ইচ্ছং সব তোমার হাতে।

পটল—আব বলতে হবে না খুড়ো—বলতে হবে না। আসি তবে।  
আজকে ত আবার রায়েব বাঁড়ি কতবার হানা দিতে হয় ঠিক  
নেই। নন্দরায় ত কেপেছে আজই বাঁড়ি ধুড়ে রঙনা হবে,  
বাঁড়ি ছাড়া কি অত সহজ কথা? সাত দিনে ব্যবস্থা ক'রে

রওনা হোক দেখি। শুধু টেনে হিঁচড়ে মারবে আমাদের।  
ঘাই খুড়ো—

[ পটল ডাক্তারের প্রস্থান। ]

ব্রজ—বলি ও অতসী—( কাপড় সেলাই করিতে করিতে অতসীর  
প্রবেশ ) হ'ল তোর ?

অতসী—একখুনি হ'য়ে যাবে ! তুমি ত স্নান করবে, আঙ্কি করবে,  
গোসাঙ্কি পূজা করবে—তারপরে ত বেরোবে ? এর ভিতরে  
আমার সব ঠিক হ'য়ে যাবে।

ব্রজ—তোর মুখে কি ? তুই খাচ্ছিস কি ? জলপাই ? এই সকালে  
আবার তুই জলপাই নিয়ে বসেছিস ? টোকড়ে কি ? এতগুলো  
জলপাই ?

অতসী—কিছু হবে না বাবা, তুমি নাইতে যাও এখন।

ব্রজ—কিছু হবে না ? তুই কি নিজে মরবি না আমাকে মারবি ?

অতসী—( হাসিয়া ) নিজেও মরব না, তোমাকেও মারব না।

ব্রজ—এই দু'মাস হয় নি তুই ম্যালেরিয়া জরে ভুগে উঠলি, এখনও জ্বায়  
জ্বায় তোর গা গরম হয়—আর তুই সকালবেলা এতগুলো  
জলপাই নিয়ে বসেছিস ? আবার যদি মুখ সিটকে দাঁতে দাঁতে  
খিল ধ'রে তোর কাপুনি ওঠে—

অতসী—তাহ'লে পানাপুকুরের পচাজলে ফেলে দিয়ে এস। যাও—  
এখন নাইতে যাও—

ব্রজ—তাই তোকে আমি ফেলব—লক্ষ্মীছাড়া মেয়ে—

[ বারান্দার আড়বাঁশ হইতে গামছা টানিয়া লইয়া প্রস্থান।

অতসী কাপড় সেলাই করিতে লাগিল। নন্দলালের  
প্রবেশ। ]

নন্দ—ওটা কি হচ্ছে রে 'ভোজুলী'—

অতসী—-বাপরে নন্দ দা, তুমি এত কথাও মনে রাখতে পার ! 'ভোজুলী'

নাম ছিল আমার প্রায় পঁচিশ বছর আগে ।

নন্দ—অর্থাৎ তোর জন্মবার প্রায় আট ন' বছর আগে ।

অতসী— প্রায় তাই ।

নন্দ—ওটা কি হচ্ছে রে ?

অতসী—কাপড় সেলাই হচ্ছে ।

নন্দ—এত বড় সেলাই ?

অতসী—-নইলে আমাদের উপায় কি ? আমরা যে দেশে বাস করি  
সে দেশে এতবড় সেলাই দিয়েই কাপড় পরতে হয় । তুমি সে  
সব গবর জানবে কি করে ?

নন্দ—সেই তোর বক্তৃতা—শুনতে শুনতে মরেই যাব ।

অতসী—বাগাই, আমার মাথার ষত চুল তত আয়ু পেয়ে ।

নন্দ—ওরে বাবা, সেও ত অভিসম্পাত করলি ? তোর মাথায় ষা ঘন  
চুল তত আয়ু পেলে ত আমাকে পুরাণেব মুনি ঋষিদের মত  
ষাটহাজার বছর ব'সে ব'সে তপস্যা করতে হবে ।

অতসী—তপস্যা করতে হবে কেন ?

নন্দ—নইলে আব কি করব ? কোট কি আর একটা মানুষকে  
এতদিন ব'সে ওকালতি করতে দেবে ?

অতসী—সেটা কিছু মন্দ হয় না । তোমার মাকে আমি এ-সব মুনি-  
ঋষিদের কথা কত প'ড়ে শুনিয়েছি । ষাটহাজার বছরে কত  
হাজারে হাজারে ছেলেপুলে নাতি নাতিতে ঘর কেন—  
একেবারে দেশ ভ'রে যাবে ।

নন্দ—মুহূ-বিগ্রহ লাগলে শুধু নন্দরায়েরই একটা রেজিমেণ্ট হ'তে

পারবে। কিন্তু অতসী, তুই ভেবে দেখেছিস এতগুলো লোক এই বাজারে থাকবে কি ?

অতসী—তোমাদের আর ভয় কি ? তোমাদের ত আবে চল্লিশটাকা দরে চা'ল কিনে গেতে হবে না, তুমি তোমার সরকারকে দিয়ে লাখখানেক লোকের রেশন কার্ড করিয়ে নেবে। সবাই ত তাই করে শুনছি।

নন্দ—তুই ঘরে ব'সে যে কি খবর রাখিস আর কি না রাখিস তার আর অস্ত নেই।

অতসী—কি আর করব ? আমাদেরও ত সেই ঘরে ব'সে ব'সে ষাট-হাজার বছরের তপস্যা! কাজ নেই কিছু, তাই বসে রাজ্যের খবর টোকাই।

নন্দ—কি খাচ্ছিস বল দেখি।

অতসী—ঐ যা, তোমাদের সকলেরই দেখছি কেবল এইদিকে দৃষ্টি। এ হচ্ছে গিয়ে যাকে তোমরা বল 'প্রাতরাশ'।

নন্দ—কি দিয়ে প্রাতরাশ হচ্ছে দেখি— (অতসী আঁচল খুলিয়া জলপাই দেখাইল)

সর্বনাশ, এই এতগুলো জলপাই দিয়ে তোমরা প্রাতরাশ হচ্ছে অতসী ? তুই কি রাক্ষস ?

অতসী—রাক্ষস নয়, রাক্ষসী ; তোমাদের ভাষায় 'নারী-রূপিনী রাক্ষসী' ! রাক্ষসে কি খুব জলপাই খায় নাকি নন্দ দা ?

নন্দ—রাক্ষসে জলপাই খায় কিনা বলতে পারি না ; কিন্তু এই শীতের সকালে যে একরাশ জলপাই খায় তাকে যে রাক্ষস বলে তাতে আর আমার সন্দেহ নেই।

অতসী—আগে বস নন্দ দা।

নন্দ—না, আজ আর বসবার সময় নেই, আজ যে দেশ ছেড়ে চলে যাচ্ছি।

অতসী—সেত তুমি এই পনের দিন ধ'রে রোজই যাচ্ছ।

নন্দ—ঠাট্টা নয়রে অতসী, আজ সত্যি যাচ্ছি। বাক্স-বিছানা জিনিস-পত্র সব গুছোনো হয়ে গেছে। দেখছিস্ না দড়াদড়িতে হাতের কি অবস্থা হয়েছে।

অতসী—মা তোমাকে আজই যেতে দেবেন?

নন্দ—মা যেতে দেবেন কিরে? মা-বাবাও যে যাচ্ছেন।

অতসী—মা-বাবাও যাচ্ছেন? কেন?

নন্দ—আমরা যে দেশ ছেড়ে যাচ্ছি।

অতসী—কেন? আর কখনো ফিরবে না?

নন্দ—( একটু গম্ভীরভাবে ) না ফিরবারই ত ইচ্ছা।

[ অতসী সহসা কথা বলিতে পারিল না, অন্তদিকে চাতিয়া নীরব হইয়া রহিল। নন্দও খানিকক্ষণ নীরব রহিল। ]

অতসী—রওনা হবার আগে দেখা করতে এমেছ বুঝি?

নন্দ—ঠিক—না—ঠিক তা নয়। -তোমার মা কোথায় রে অতসী?

অতসী—কেন? বোধহয় ঘাটে—না হয় রান্নাঘরে।

নন্দ—শোন, কাল সারারাত ধ'রে আমার একটা কথা মনে হয়েছে।

আর কাউকে বলবার আগে তোকে বলছি, শোন দেখি কথাটা কেমন শোনায়। তুই ত আমার মার কাছেই থাকিস অনেক সময়ে, তুই যদি মায়ের সঙ্গে কলকাতায় যাস্?

অতসী—কেন?

নন্দ—মায়ের কাছে থাকতে ত তুই ভালই বাসিস্—মায়ের কাছে রইলি, একটু লেখাপড়া করলি—

অতসী—গরিবের উপরে ত তোমার অনেক দয়া !

নন্দ—দয়া নয়রে অতসী । এই আজকাল যেমন দিনকাল পড়েছে—

অতসী—ঐটাইত দয়ার কথা হ'ল । যেমন দিনকাল পড়েছে, গরিব  
মানুষ—খেতে পাবি নে—পরতে পাবি নে—বয়েস হয়েছে  
বিয়ে হচ্ছে না,—চারদিকে যেমন গোলমাল—এত বড় মেয়ে  
—এই সব ত ?

নন্দ—যদি তা-ই হয়—

অতসী—খেতে পাচ্ছে না, বিয়ে হচ্ছে না—এমন মেয়ের ত অন্ত নেই  
আজকাল আর ; তুমি যেদিকে তাকাবে সেদিকেই দেগতে পাবে ।  
একজনকে কলকাতায় নিয়ে দেশের আর কি উন্নতি হবে ?

নন্দ—অস্তুতঃ একজনের হিলে হল ।

অতসী—( অশ্রুমনস্কভাবে ) সেই একজন আমি নাই বা হলুম ।

নন্দ—কেন ?

অতসী—কেন ? কেন তা ভেবে বলি নি, মুখে এল তাই বললুম ।  
( অতসী আবার সেলাইয়ে মন দিল ; নন্দ খানিকক্ষণ চুপ করিয়া  
দাঁড়াইয়া রহিল । )

নন্দ—তোমার মত থাকলে তোমার মা-বাবাকে বলে দেখতুম ।

অতসী—( সেলাই হইতে মুখ না তুলিয়া ) না ।

নন্দ—( আর খানিকক্ষণ চুপ করিয়া থাকিয়া ) তোমার মা-বাবা কোথায় রে  
অতসী ? একবার দেখা ক'রে যেতুম ।

অতসী—( মুখ না তুলিয়া ) দেখ বোধহয় আছেন বাড়ির ভিতরেই ।

নন্দ—আচ্ছা আজকে আসি—

অতসী—( নন্দ খানিকটা চলিয়া যাইতে মাথা তুলিয়া ) তোমরা আজই  
যাচ্ছ ?

নন্দ -হ্যাঁ।

অতসী—কেন? ছ'একদিন দেৱী করলে হয় না? আজই যাবার এত  
কি ঠেকা?

নন্দ—যেতে আজই হবে, ঠেকা অনেক। মা-বাবার মতি স্থির নেই;  
আজকে তাঁরা রাজি হয়েছেন, আবার কালকে হত না ক'রে  
বসবেন।

অতসী—এভাবে তাঁদের নিয়ে গিয়ে কি তুমি রাখতে পারবে?

নন্দ—আমার বিশ্বাস, খুব পারব। বাড়ি থেকে একবার বের করতে  
পারলে শেষে আর রাখতে কষ্ট হবে না।

অতসী—আমার ভ্রাতৃ সন্দেহ আছে। (আবার সেলাইয়ে মন দিয়া  
মাথা নীচু করিয়া) দেখ তুমি যা ভাল বোঝ—

[ পট পরিবর্তন ]



### পঞ্চম দৃশ্য

বিকুরায়ের বাড়ির সামনের দীঘির পাড়ে বটগাছতলা । গাছের তলে একটা সামিয়ানা টানানো, নীচে একটা সতরঞ্চি ও কয়েকখানা হোগলা পাতা । আইজদ্দি, মোস্তাজ, মেছের, কাছেম, কাজল বয়াতি, কিনারাম, বেঙ্গুকুলু, ঈশান ঢুলী প্রভৃতি আরও অনেকে ; কেহ কেহ বসা কেহ কেহ দাঁড়ান ।

কিনারাম—নেও—এইবারে আরম্ভ করা ঘাউক নাচ গান ।

বেঙ্গু—কস্ কিরে, তুই আইজ আবার নাচবি কিরে কিনারাম !  
চিড়া-গুড় যা ঠাসছস্—নাচতে গেলে তোর ত পেট ফাইটা  
যাইবে ।

ঈশান—তোমার আর আইজ দাদা নাচানাচিত্তে কাজ নাই ; তার  
চাইয়া এই ঢোলকটার মতন হোগলার উপরে গড়াগড়ি দিয়া  
পড় দেখি ।

কিনা—কেন, তোমার ইচ্ছাটা কি শুনি ।

ঈশান—ইচ্ছাটা দাদা, দুই কাঠিতে পেটটা টিঙ্ টিঙ্ কৈরা একটু  
বাজাই । যা টান হইছে, আগুনে আর সেকতে হইবে না,  
এমনিই টিঙ্ টিঙ্ কৈরা বাজবে ।

কিনা—তা যা কইছ ঢুলী ভাই, মিছা কও নাই । একটু গুরু ভোজনই  
হইছে । বলতে বলে, চিড়ার মধ্যে সরু, তাই আহাৰ কিঞ্চিৎ  
গুরু ! একসেরি বাজার দাদা, বুঝতে ত পারতেছ ? একটু  
কষ্ট হইলেও তিনদিনেরটাই সাইরা নিছি ।

মোস্তাজ—তা দাদা উপস্থিত মতে খাওয়াটা জমল মন্দ না ।

কিনা—মন্দ জমবে কেন ? নদী মরলেও রোত যায় না, আর হাতী  
মরলেও লাখ টাকা ।

আইজদ্দি—এইবারে ঢোলে চাড়ি দাও ঢুলী ।

[ কবিম সর্দারের প্রবেশ ]

করিম—খাওয়া-দাওয়া সবার হইল ঠিক মতন ?

মেছের—খুব খাওয়া হইছে বুড়া মেঞা ।

করিম—পান-তামুক পাইছ সবাই ?

কিনা—( হা করিয়া দেখাইয়া ) নইলে এসব চাবাই কি মেঞা,—ঘাস ?

করিম—এবারে সংক্ষেপে যা তয় একটু গানটান কর, তারপরে যে যার  
বাড়ি যাও । বেশী আর হুলায় কাজ নাই ।

বেঙ্গু—আপনি আগে বসেন মেঞা, নইলে গান আরম্ভ হইবে কেমনে ?

করিম—না, আইজ আর বসুম না ।

বেঙ্গু—ক্যান্ ক্যান্ ?

করিম—মনে কৃতি নাই ভাই, ফৃতি না থাকলে কি আর গান ভাল  
লাগে ? যার জায়গা-জমি তারই রইল মুগ ভারী—

আইজদি—জায়গা-জমি এখন কার ? জায়গা-জমি এখন আমারগো  
বাজান । নইলে কি আর এবারে এত গরজে আসি ক্ষাত ভাঙতে ?

করিম—এমন কথা জিভে আনিস্ না আইজদি, তোর মাথায় তা'লে  
দিন ছপারে ঠাড়া পড়বে । উপরে একজন খোদাতালা বসা  
আছেন, জান ?

আইজদি—নগদ টাকায় জায়গা-জমি কিহুম, খোদাতালায় ধার ধারি  
কি ?

করিম—খুব তোর টাকার গরম হইছে আইজদি । অত চটপট লাফ  
মারিস্ না । ও টাকা নারে আইজদি, তোর পিছ নিছে শয়তান—  
ঘাড়ভাঙা শয়তান । সেই শয়তান তোরে ঘুরায় বুদ্ধি দিয়া ।  
আমি তা টের পাইছি ; আমি তোরে সাবধান করি ।

আইজদি—খাউক বাজান, এ-সব লইয়া আপনার সঙ্গে তাকে লাভ নাই !

নেরে ব্যাটারা—একটু নাচগান যদি করস্ ত কর, নইলে চৈলা  
যাই।

করিম—আমি আছি ঐ বকুলতলায়, আমার মাথা খাস আইজদি যদি  
তুই কত্তার কোন অসম্মান করস্। ধম্মে সহবে নারে—ধম্মে  
সহবে না—বুড়া মানুষের এ কথাটা মনে রাখিস্। (প্রস্থান)

আইজদি—নেও দাদা কিনারাম, গান ধর।—

কিনা—( আইজদিকে সালাম করিয়া ) নোতুন মনিবের আমলে নোতুন

ইনাম-বকশিস্—গান গামু না কেন? ধর ঢুলী—চৌক ধর।

আইজদি—আগে দাদা তোমার স্বরচিত ক্যাতের গান ধর।

কিনা—ধরিস্ ভাই পিছে—আইজ কিন্তু আর দম নাই—বেশী দম্নে

গান বাইর হইবে না, আস্তা আস্তা চিড়া!

( গান )

মাগো ক্যাতের মধ্যে আসন পাত লক্ষ্মীরূপিণী।

জগন্মাতা অন্নপূর্ণা—তোমার মাগো নমামি ॥

আমরা মাটি কাটি লাঙল চষি—আনন্দে গান গাই—

আবার শান্তরূপা লক্ষ্মী তোমায় পাই।

তোমারে মাথায় ছোঁয়াই-বুকে ছোঁয়াই—বলি জগজ্জননী।

তোমার রূপের সীমা নাই—

পৈকনেতে লবুজ শাড়ী—বলিহারি ঘাই।

আবার কখন দেখি হস্তমুখে কাঞ্চাসেনা বরণী ॥

কিনা কিনারামে ঐ চরণে কর,

যেন ক্যাতের মধ্যে আসনখানি অনড় হইয়া রয়।

আবার দুঃখীর ঘরে পাড়া পড়ুক হইবেলাতে জননী ॥

[ কিনারামের গান খামিতে না খামিতেই কাজল বয়াতি তাহার  
খঞ্জনী লইয়া লাফাইয়া আসরে আসিয়া দাঁড়াইল । ]

( কাজল বয়াতির গান )

শোনরে ওরে ভাই, আল্লার দোয়ার সীমা নাই—  
মাটি ফুড়ি' অন্ন ফলে—বাহাতে প্রাণ পাই ॥ ( ধূয়া )  
উপরে কে রাখল আশমান—জমিন দিল কে ?  
জমিন ভাঙি বীজ ছড়াইলাম—ফসল ফলিয়াছে ॥

আল্লার দোয়ার সীমা নাই ।

শির ছোঁওয়াইও লাকলে ভাই—শির ছোঁওয়াইও মাঠে ।  
শির ছোঁওয়াইও সেই চাষীর পায়—যে দিন-রাত্তির খাটে ॥

আল্লার দোয়ার সীমা নাই ।

রাত্তিরে জলুক চন্দ্র, দিবায় জলুক ভানু ।  
খাইয়া লইয়া বাঁচিয়া থাকুক ছুনিয়াদারির মানু ॥

আল্লার দোয়ার সীমা নাই ।

আকাশ হইতে শিশির ঝরুক, দেওয়ান ঝরুক পানি ।  
সোনার ধানে গোলা ভরুক—খোদার মেহেরবানি ॥

আল্লার দোয়ার সীমা নাই ।

বেঙ্গু—বেশ বেশ—জমছে বেশ ।

মোস্তাজ—এইবারে দাদা একটু লড়াই ধর ।

কিনা—বড় মেঞায় কইয়া গেলেন সংক্ষেপে একটু আমোন করতে :  
সংক্ষেপে কি আর পানের লড়াই হয় ?

আইজদি—অত সংক্ষেপে কাজ নাই দাদা, তুমি লড়াই ধর ।

কিনা—আয় দেখি ভাই ইশান তুলি, এবার তবে গলা খুলি । কণ্ঠে  
বুইও সরস্বতী, রাজাপদে এই মিনতি ! শোনরে কাজল, বয়াতির

পো,—তোর ডুগডুগি আর খঞ্জনী আইজ আসরে খো, অকাল  
দেশে কিসের নাচন কিসের গান,—বাক্য-খড়্গে তোরেই দিমু  
বলিদান ।

[ গান ]

ওরে কাজল বয়াতি, নিকুংশের নাতি,  
কোন্ লাজে তুই ভাগা ঘরে জালাস্ কোস্বাতি ॥ ( ধূয়া )  
ও তুই সোতের শেওলা ভাইয়া আইলি দক্ষিণা বাতাসে ।  
পাতলা নূরে রঙ্গ করস্ লোকে দেখলে হাসে ॥  
তোর মুড়াতামা পাইলাম নারে পরিচয় দেব কি ।  
টাক মাথাতে টেড়ি কাটস্—পাস্তা ভাতে ঘি ॥  
হায়রে পাঁচ তালকের তোর কবিলা—ডাকস্ বিবিজান্ ।  
কচুপাতায় চুণ মাখিয়া খাওয়ায় তোরে পান ॥

[ কিনারামের গানের ভিতরেই কাজল বয়াতি গান ধরিল ]

শোনরে কিনা শোন, ( তোর ) চালে নাই ছন,  
ফর্সা মাইয়া করলি বিয়া, কয়শ' টাকা পণ ॥ ( ধূয়া )  
নিলাজ রে তুই কিনারাম, কি বলিব তোরে ।  
রাজ্যের ষত লোচনা নাগর তোর বাড়ি কেন ঘোরে ॥  
এক ঘটনা মনে করাই, শোনরে কিনারাম ।  
তোর পিতা তোর মার উপরে হইছিল কি বাম ॥  
মনে পড়ে গ্রামের লোকে করে হায় হায় ।  
এক কাপড়ে নাচ্যা বেড়ায় কিনারামের মায় ॥

মেহের—( সহসা উঠিয়া দাঁড়াইয়া ) কেমা দাও মেঞা—কেমা দাও— ।

কাজল—ক্যান্, বেত্ত কি ?

মেহের—এসব গান এখানে চলবে না ; এসব গান চলে আমাদের

ছোটলোকের আসরে ; ভদ্রলোকের বাড়ির দরজায় এসব গান চলবে না।

আইজদ্দি—এর মধ্যখানে ছোটলোকই বা কে, আবার ভদ্রলোকই বা কে ?

মেহের—এই সব গান মেঞা কোনদিন চলত এই আসরে ? আমরা ত লাংটা কালেরখন শুনি।

আইজদ্দি—কোনদিন না চললেও এখন চলবে।

মেহের—গায়ের জোরে ? বাজান ভুঁইয়া এখানে নাই বৈলা ?

আইজদ্দি—বাজান-বোজান এইবারে একটু ধামাচাপা দেবে বাপু, তোর বাজান তোর কাছে। পাতের কুকুরের মতন মুন খাইছস, তুই এখন গুণ গা—আমারগো কি ?

মেহের—মুন তুমি খাও নাই—তোমার বাপ—তোমার সাতপুরুষে খায় নাই ? দুইদিনে একেবারে মুণ মুইছা ফেলছ ? পেট টেপলে রায়দের অন্ন বাইর হইবে এখানকার সকলের পেটেরখন।

আইজদ্দি—মুণ সামলাইয়া কথা কইস—

মেহের—কেন, হক্ কথায় বুঝি আতে যা লাগে ? তোমার কু-মতলব আমার কিছু অজানা নাই মেঞা, কিন্তু তোমার বাজানের কথাই ফের বলি,—এখনও চন্দর-সুজ্ঞ অস্ত বায় নাই, এখনো দিন হয়, রাত্তির হয়, এখনো উপরে একটা পোদাতাজা আছে।

মোস্তাজ—আরে কেমা দাও কেমা দাও—নাচপানের মধ্যে কোন কাইজ্জা কলহ আরম্ভ করলা।

মেহের—কাইজ্জার নাই কিছু ভাইজান ; কিন্তু দুইদিনের পাটবেচ টাকার এত গরম—এও ময় না। ছোট তিনটা ভাইরৈ ঠকা'র বাপের জমি সব একহাত করা হইছে, তাতেই ত এত কাট

টাকা, সে কথা কারোর কাছে অজানা আছে? এখন আবার দিনরাত্তির চলছে পটল ডাল্কাবেব সঙ্গে পুটপুটানি। এত সহিবে না মেঞা, 'ধোডা সাংপর পেটে এত বড় ব্যাঙ কিছুতেই ধববে না, ও পেট ফাইটা যাইবে।

আইজ্জদি—কি কইলি তুই, কি কইলি—

মেছের—অত তুই-তাহাবি করবা না মেঞা—

মোস্তাজ—কেমা দাও আইজ্জদি—কেমা দাও মেছের,—তোমারগো হাতে পায়ে ধবছি। অনেকদিন একটু গান শুনি নাই—আইজ্জ একটু গান শুনি। ধর ভাঠ আবাব—গান ধব। ওসব কুচ্ছার লড়াই না হয় খাউক, একটু শাস্তোরের লড়াই কর শুনি।

কিনা—ধর ব্যাটারা—ধর—

মাথা নোয়াই সকলের পাষ হিন্দু-মুসলমান।

( আহা বেশ বেশ—ধূষা )

মুরুক্কেব অধম আমি কর অবধান ॥

দযা-ঘেয়া কবি আমাব গীতে দিও মন।

ভাবে ভাবে ছ'চার কথা করি আলাপন ॥

শোনরে ভাই কাজল মিঞা, তুমি মুসলমান।

মুসলমানের অর্থ কি তার আগে চাই প্রমাণ ॥

তারপরে ভাই খুলিয়া বল, হিন্দু করে কর।

বেদ ছাড়া আর শাস্ত কিছু প্রমাণ কেন নয় ॥

হিন্দু কেন টিকি রাখে—মুসলমান কেন নুর।

মক্কা হইতে মদিনা হয় কতখানি দূর ॥

অল্প এই কয় প্রশ্ন তোমার করিলাম জিজ্ঞাসা।

জবাব কর স্নেহে যদি প্রাণের থাকে আশা ॥

নইলে সভার মাশ্ব যত মহাবিছামান ।  
 হস্ত পশারিয়া তোমার ধরবে ছ'টি কান ॥  
 তেলে চূপচূপ পাউল' সাদা নূরে দিয়া ক্ষুর ।  
 কুলার বাতাস দিয়া নিবে অনেক অনেক দূর ॥  
 কাঞ্চল— রৈয়া সৈয়া কথা বলিস্ শোনরে কিনারাম ।

( ও দাদা কিনারাম—ধূয়া )

বিষম যাবি প্রাণ হারাবি খামরে বাপু খাগ ॥  
 মুকুখেরও অধম হইয়া চাপান দিলি বেশ ।  
 এক শোয়ানে এত কথা— কি করবি শেষমেষ ॥  
 পেরখমেতে সভাতে মোর নোয়াইয়া লই শির ।  
 দ্বিতীয়ে বন্দিয়া লই খোদার পঞ্চ পীর ॥  
 ভক্তি করি নবীর পায়ে ছৌওয়াইয়া লই মাথা ।  
 হিন্দুর বন্দি ঋষিমুনি আর যত ছাবতা ॥

আইজদি—( বাধাদিয়া ) এসব কি মেঞা ?

কাঞ্চল—আবার কি ব্যাপার ?

আইজদি—তুমি মোছলমান না ? হিন্দুর ছাবতা বন্দ কোন্ আহ্লাদে ।

কাঞ্চল—বরাবরই ত—

আইজদি—বরাবরই ত পায়ের নীচে ছিলা, এখনো থাকবা ?

মেহের—ছাবতা বন্দনায় বারণটা কার গুনি একবার ।

আইজদি—বারণ বড় বড় পীরের । সোনাপীরের করমান শোন নাই ?

মেহের—আমরা ত গুনি নাই কিছু—যত পীরের যত করমান সব কয়  
 তোমার কানে ।

আইজদি—সে সব শোনতে বিছাবুছি লাগে—

মেহের—বিছাবুছি তোমার ত পেট ভরা ।



আইজদি—কিছু না থাকলে কি আর কথা কই !

মেছের—ওরে বাবা, পেরাইয়ারির কেলাস থিরি। কথা কি কও  
বিচার জোরে ? কথা কও গায়ের জোরে।

আইজদি—তোর কিন্তু আইজ শনির দশা মেছের—

মেছের—তাই বা কও কেন ? 'শনির দশা' হিন্দুর কথা না ?

আইজদি—বারণ কর মেঞারা, খুনাখুনি হইবে কিন্তু।

মেছের—সেই কথাইত কইছিলাম, নোতুন টাকায় তেল বাইড়া গেছে  
অনেক।

[ আইজদি সহসা সামিয়ানা টানাবার একটা বাঁশ তুলিয়া মেছেরের  
মাথায় এক বাড়ি দিল ; মেছের ধরিয়া ফেলিল, কিন্তু মাথায়  
আঘাত লাগিয়া রক্ত বাহির হইল। ]

মেছের—আইচ্ছা দেখি এর শোধ লওন যায় কিনা—

[ মাথা চাপিয়া গ্রস্থান ]

আইজদি—যা যা, তোর বাজানের কাছে যা ; দেখি তোর কোন বাজান  
আমার কি করে।

[ সকলে কিছুকাল চুপচাপ রহিল ]

হিন্দু হোক, মোছলমান হোক, জুষ্টের শাসন চাই।

মোস্তাজ—কাজটা যেন ভাল করলা না সর্দারের পো।

আইজদি—খুব ভাল করলাম। খুঁটার জোরে মেড়া কোন্দে ; ঐ  
শালারও তাই। তোরে খাওয়াইয়া পরাইয়া মাছুষ করছে  
তোর বাজান, আমারগো কি ?

[ করিম সর্দারের প্রবেশ ]

করিম—তোর কিছু না হারামজাদা বেইমান ? আমার মাথার কিরা  
দিয়া গেলাম তবু তোর একটা দিন সুইল না ?

আইজদি—না জাইনা শুইনা—

করিম—সব জানি, সব শুনি, এসব দুষ্ট-শয়তানের বুদ্ধি। তুই মরবি, তুই জাহান্নামে যাবি। ঐ সব শয়তান তোরা কাঁধে চাপছে, তোরা রক্ত শুইয়া খাইয়া ছাড়বে। আমি বেশ দেখতে পাইতেছি। [ প্রস্থান ]

মোস্তাজ—কাজ নাই আর গান-বাজনায়, চল সব বাড়ি চল।

আইজদি—কেন, বাড়ি যাবার কি হইল? গান-বাজনা আরও চলবে।

[ বিষ্ণুরায়ের প্রবেশ ]

বিষ্ণু—মেছেরের মাথা ভেঙে কে রক্ত বের করলরে? (সকলে নিরুত্তর)

কিরে সব যে একেবারে চূপচাপ?

আইজদি—চূপচাপের কি? অত ভয়ভরের কি হইল? আমি মাথা ভাঙছি।

বিষ্ণু—তুই? কেন?

আইজদি—দুষ্ট লোকের শাসন চাই।

বিষ্ণু—মেছের এর ভেতরে দুষ্ট লোক হ'য়ে গেল? তার শাসন করবি তুই? তার মাথা ভেঙে? আমার বাড়ির দরজায় বসে?

আইজদি—দেশ ছাড়ছেন—বাড়ি ছাড়ছেন,—আবার আমার বাড়ি-ঘর কি ছুঁইয়া?

বিষ্ণু—(সহসা চূপ করিয়া গিয়া)—ঠিক বলেছিলাম আইজদি—ঠিক।

দেশ ছাড়ছি, বাড়ি ছাড়ছি—আবার আমার বাড়ি কি? ঠিক, ঠিক। অনেকদিন আগেই বোঝা উচিত ছিল—ছাতিমপুর আর আমার গ্রাম নয়—এ আর আমার বাড়ি নয়। পায়ের নীচ থেকে সব মাটি আস্তে আস্তে স'রে যাচ্ছে, দাঁড়িয়ে দাঁড়িয়ে নিজের চোখে সব দেখতে পাচ্ছি। কিস্ত—কিস্ত—তবু কি

জানিস্ ? মহামায়া ! আইজ্জদি—মহামায়া ! যেনিকে তাকাই  
মহামায়া—মহামায়ায় জড়িয়ে গেছি । ছাড়ি ছাড়ি ক'রেও  
ছাড়তে পারি না । এদিকে বিষদাতও ভেঙে গেছে  
আইজ্জদি—বিষদাতও ভেঙে গেছে !

[ উত্তেজিতভাবে নন্দলালের প্রবেশ ]

নন্দ—মেছেরের মাথায় কে বাড়ি দিল ?

বিষ্ণু—( ধমক দিয়া ) নন্দ—

নন্দ—আমি একখুনি হাতে হাতে তার কল দেব—

বিষ্ণু—( আরও জোরে ধমক দিয়া ) নন্দ, কথা শুনছিস্ না ? ( আবার  
আস্তে আস্তে ) শোন্ নন্দ, ভেবে দেখলুম, তুই-ই বুদ্ধিমান—  
আমার অনেক আগেই সব বুঝতে পেরেছিলি । আমি—  
আমিও যে না পেরেছিলুম নন্দ তা নয়,—পেরেছিলুম—পেরেও  
পারি নি !

নন্দ—কেন পারেন নি ?

বিষ্ণু—কেন পারি নি ? তাইত—কেন পারি নি ! কেন পারি নি  
জানিস্ ? জানিস্ ? মহামায়া—মহামায়া ! মহামায়ায় আমাকে  
আষ্টেপৃষ্ঠে জড়িয়ে ধরেছে—কিছুতে ছাড়তে পারছি নে ! এই  
আমার সোনার ছাতিমপুর—আমার সাতপুরুষের বাড়িঘর—  
নন্দ—( উত্তেজিত ভাবে ) ঐ দেখেছিস্—আমার বাড়ির ঐ  
দীঘি—ঐ ঘাটলায় ঠেস দিয়ে আমার বুড়ো ঠাকুরদাদা সকাল-  
বিকাল ব'সে আমাদের কত গল্প বলেছেন । আজ শেষ রাত্তিরে  
উঠে অঙ্ককারে ভূতের মতন একা একা ওখানে গিয়ে ব'সে-  
ছিলুম ; বসতে বসতে হঠাৎ দেখলুম—আমার দীঘির মাছগুলো  
হঠাৎ কেমন ছলাং ছলাং ক'রে লাফিয়ে উঠল—সমস্ত দীঘিতে

তোলপাড় ! চারপাশের তালগাছগুলো অঙ্ককারে সাঁই সাঁই মাথা  
নাড়তে লাগল, পাখীগুলো একসঙ্গে পাখা ঝাপটে ডেকে উঠল !  
সে কি উল্লাস—সে কি আনন্দ ! মহামায়া নন্দ, মহামায়া !

নন্দ—ঐ আপনাদের এক পাগলামি ।

বিষ্ণু—( গস্তীর ভাবে ) পাগলামি ! পাগলামি ! তুই কি বুঝবি রে

হতভাগা—তুই কি বুঝবি ?

নন্দ—আমি কিছু বুঝতে চাই না । আমি এ অপমান সহ্য করতে  
পারব না । আপনার বাড়ির দরজায়—

বিষ্ণু—( আশ্বে আশ্বে ) শোন নন্দ, ছাতিমপুরের যে এক বিষ্টুরায়  
ছিল না ? সে নেই—ম'রে ভূত হ'য়ে গেছে !

নন্দ—না—সে মরে নি—

বিষ্ণু—( ধমক দিয়া ) আমি বলছি, মরেছে ! ( আবার আশ্বে ) আমি  
তার নাড়ী টিপে দেখেছি, নাড়ী চলে না—বুকে হাত দিয়ে  
দেখেছি, এখন আর টিপ্ টিপ্ করে না ! নেই ! তুই তাকে  
এখন যেখানে পারিস্ নিচে চল—তনেক দূরে—অনেক দূরে—!

[ পট-পরিবর্তন ]

## দ্বিতীয় অঙ্ক

### প্রথম দৃশ্য

বয়স্করারের বাড়ির ভিতর। নন্দলালের মা হরসুন্দরী ও বাঁশিরামের মা।

বাঁশির মার কোলের কাছে একটা মাটির 'তাওয়া'র ভরা এক 'তাওয়া'

তুমের আগুন ; বাঁশির মা কাপড়ের নীচ হইতে 'তাওয়া'টি বাহির

করিল, তাহার আগুন একবার হাত দিয়া উল্টাইয়া পালটাইয়া

লইল ; তাহার পরে তাহাতে তামাকের পাতা পোড়া দিল।

বাঁশির মা—'কালী'রই যদি না দেও ঠাকরণ, তবে আর ঐ লাল  
গোকুলে আমার কাজ নাই।

হরসুন্দরী—না হয় তুমি না-ই নিলে কোনো গোকুল, আমি কি কাউকে পায়ে  
ধ'রে মাথার দিবি দিয়েছি? আমার এ গোকুল আমি দেব না—  
সে ত কবারই তোমাকে ব'লে দিয়েছি বাঁশির মা।

বাঁশির মা—আমার কথাটাও একবার একটু শোন না—

হর—পাঁচশ'বার এককথা আমি কহিতেও চাই না, শুনতেও চাই না।  
তুমি হিন্দুর মেয়ে না গো? কালো গোকুল বাড়ির লক্ষ্মী, আর  
আমি দেখেছিও তাই। কালীকে আমি হাতছাড়া করব না,  
ওকে আমি সঙ্গেই নেব।

বাঁশির মা—কোথায় কোন্ বিড়ুঁই-বিদেশে যাবা মা, সেখানে কি  
গোকুল—

হর—বিড়ুঁই-বিদেশ কোথায় হল? আড়লী-পড়লী সবাই মিলে এমন  
অলক্ষুণে কথা বলতে থাকিস্ নায়ে বউ। ঘরের লক্ষ্মী পায়ে

ঠেলে যাব কেন? দেখছি না সুপারির খোলে ধানের ছড়া বেধে নিয়েছি, টিবি শুদ্ধ ঐ তুলসী গাছ তুলে এনে রেখেছি, শীতলা-গোলার মনসাগাছ পুরুত ঠাকুরকে দিয়ে কাল তুলে রেখে দিয়েছি। বাড়ির লক্ষ্মী কালীকে কি ক'রে ফেলে যাই বল দেখি?

বাশির মা—তুখ যা হয় তোমার ঐ কালীর। লাল গাইত একে বুড়া, তাতে আবার কিছু দিন যাবৎ কি রোগে ধরল, ঘাস খায় না, কেমন বিমায়।

হর—তা তুমি যতই বল, এই কালী আসার পর থেকে দেখেছি আমার কত বাড়-বাড়ন্ত। এখন না হয় অনাচ্ছিষ্টি হ'য়ে কপাল পুড়েছে, কিন্তু দশ বছর আগে ত আর এমন ছিল না। তখন আমার দেওর বেঁচে আছেন; তিনি গিয়ে সখ ক'রে বৈশাখী মেলায় থেকে কিনে এনেছিলেন এই গোক। সেই বছরে আমার কত শুভ—তোমাদের কি সে সব অজানা? সেই বছরে নদীতে চর প'ড়ে নোতুন জমি হ'ল, পুরণো আটচালা আবার নোতুন করা হ'ল, আমার ছোট ভাইয়ের বিয়ে, রাধুর রাঙা ছেলে হ'ল, জমিতে সেবারে সোনার ধান! এই কালীকে রাওখালি—আমি তা কিচ্ছুতে হ'তে দেব না।

বাশির মা—কাছেম প্যাঙ্গা ত সেইভাবেই বলছিল।

হর—কাছেম প্যাঙ্গা? কাছেম প্যাঙ্গা বলবার কে? তার গোক? একবার এই কালীকে রাওখালি দিয়ে আমার যা সাত অবস্থা—তা ভাবতেও এখন ভয়ে গায় কাঁটা দেয়। জানই ত বাশির মা, প্রথম বয়সে কালী বড় দড়ি ছিঁড়ত। একবার দড়ি ছিঁড়ে হরজার জমির কচি ধানে গিয়ে মুখ দিল; করিম সর্দার এনে

লাগাল কত্নার কানে ; কত্নার ত একবার রাগ হ'লে আর দিশে  
মিশে থাকে না ; রেগেমেগে আমার অজান্তে গোকু দিলেন  
রাওখালি ! তাতে কি হয়েছিল জান ?

বাশির মা—কিই বা এমন !

হর—বল কি তুমি বাশির মা, কিই বা এমন ! প্রায় সর্বনাশ হ'তে  
বসেছিল না ? যেদিন রাওখালি পাঠাল. রাত পোহালে খবর  
পেলুম, বড়মেয়ের ছেলে রঘুর জ্বর-অতিসার ; গরম দুখে পুটু  
পুড়ে আধমরা ; দু'দিন যেতে না যেতে ও পাড়ার তিমুর বউকে  
ঘাটে শাপে কাটল ; ভুঁই সেবারে 'পামরি' পোকায় শেষ ক'রে  
দিল—এক গোটা ধান ঘরে এল না । তারপরে কত্না নিজের  
গিয়ে সেই কালীকে আবার ফিরিয়ে আনেন ; কত পূজো-পাক্ষন,  
শাস্তি-সস্তান !

বাশির মা—কাজ নাই তাইলে আর ঠাকরণ আমার গোকুতে—ও মরা  
গোকুতে আমার কোন্ কাম ?

হর—তা-ই ভাল, আর জালিও না—বাড়ি চলে যাও ।

[ বাশির মার প্রস্থান ]

[ হরসুন্দরী বারান্দার একপাশে অনেকখানি মাটিসহ তোলা  
একটি তুলসীর গোড়া লেপিয়া কয়েকটা কুল ছড়াইল । বিধবা  
ব্রাহ্মণ কন্যা ছুর্গার প্রবেশ । ]

ছুর্গা—তুলসী গাছ দিয়ে কি করছ বৌঠান ?

হর—কি করছি আর জিজ্ঞাস করিস নি ঠাকুরঝি ; আমার গন্ধা-  
ঘাত্রা—দেখতে পাচ্ছিস না ? তারি আয়োজন ।

ছুর্গা—বালাই, তোমার গন্ধা-ঘাত্রা হ'লে আমরা যাব  
কোথায় ?

হর—গঙ্গা-যাত্রা না ত কি ? কোথায় কিসের ভিতর গিয়ে যে উঠব,

আমারত ভাবতেই বুক কাঁপে ।

দুর্গা—এই তুলসী গাছ বুনি সঙ্গ ঘাবে ?

হর—না নিয়ে উপায় কি ঠাণ্ডুরকি ? আমি জানি, নন্দ এসব দেখলে চটবে । তা বাপু কি করব ? আমি ব'লে দিয়েছি, এ-সব যদি তুই না নিতে দিস বাপু, তা হ'ল আমারও গিয়ে কাজ নেই ; তোরা বাপ-ব্যাটায় যেখানে পারিস চলে যা, আমি ব'সে আমার শশুর-শাশুড়ীর ঘর আগলাই । ধন্য-কন্য যদি কিছুই না রইল, কি হবে তবে বিদেশে পালিয়ে গিয়ে ? আমি ত আর এই বয়সে এখন তোদের মতন সাহেব সাজতে পারি না ।

দুর্গা—কাল যে পড়েছে বোঠান অন্য রকম ।

হর—তা বলে কি ধন্য কন্য সব ছাড়তে হবে ? সাত বছরে এই ঘরে এসেছি, দিদিশাশুড়ী তখন বেঁচে । সেই দিদি-শাশুড়ী রোজ সন্ধ্যাবেলায় নিয়ে যেত এই তুলসীতলায়—সেই খানে তেলবাতি জালিয়ে দিয়ে আসতুম । দিদিশাশুড়ী একদিন বলেছে, বোমা, এই তুলসী-গাছের গোড়ায় রোজ যেন বাতি জলে, সন্ধ্যার দীপ না দেখলে কিছু দেবতারা সর্ব বাড়ি ছেড়ে চলে যাবে—বাড়ির অমঙ্গল হবে । সেই তুলসীগাছ আমি ফেলে রেখে যাব কি করে ? গোঁয়ার-গোবিন্দ নন্দটা কি এ সব বোঝে ?

দুর্গা—একলে ছেলে সব—কেমন ক'রে বুঝবে ?

হর—ওর ধারণা, বাস্তব পেটার ভ'রে কাপড়-চোপড় সাজ-সরঞ্জাম গুছিয়ে নিলেই বাড়ি ছাড়া যায় ।

দুর্গা—আজকেই তা-হ'লে যাওয়া ঠিক ?

হর—দেখছি ত তাই । রাত এক প'র থেকে ছেলের তাগিদে, তাগিদে



ত একেবারে পাগল হ'য়ে উঠেছি। অনেকদিন থেকেই একবার বেরোব বেরোব করছি ঠাকুরঝি। সারাজীবন এই ছাতিমপুর থেকে এক পা নড়ি নি ; ভেবেছিলুম, হাত-রথ থাকতে একবার একটু ঘুরে আসব।

দুর্গা—তা ত ভাগ কথা।

হর—বড় মেয়ে ক'লকাতায় থাকে, এই তিন বছর তাকে দেখি নি। রাধুটা রইল সেই কোন ছাপরা জিলায় বিহার দেশে। ওরা সবাই ত কতদিন লিগছে একবার যেতে। কিন্তু এগন ক'রে দেশ ছেড়ে ঘরবাড়ি ছেড়ে চ'লে যেতে হবে এ কথা ত ভাবি নি একদিনও ( ঝাচলে চোখের জল মুছিল )।

দুর্গা—চোখের জল ফেলো না বৌঠান, ওতে অমঙ্গল হয়।

হর—আবার শুনছি নাও-মাকুষ নিয়ে কি সব গোলমাল—জমাজমির বিলি-ব্যবস্থা নিয়ে কি গোলমাল—তাই নিয়ে আবার পটল ডাক্তারকে খবর দিয়েছেন।

[ পটল ডাক্তারের প্রবেশ ]

পটল—এই যে নাম করতেই এসে পড়লুম বৌঠান, একশ' বছর বাচব—পুরো একশ' বছর।

হর—তাই বেঁচে থেকে ঠাকুরপো ; যমের অদেখা হয়ে থেকে !

পটল—মনের সাধ আর তেমন নেই বৌঠান, এখন যমে দেখলেই ভাল।

হর—বালাই ঠাকুরপো,—এত তোমার কিসের দুঃখ ?

পটল—যাদের নিয়ে বেঁচেছিলুম—তারাই যদি সব ছেড়ে যান—তবে আর বেঁচে থেকে —

হর—অনেক লাভ আছে। সে যাক ঠাকুরপো, জমাজমি নিয়ে কি সব গোলমাল হচ্ছে ?

পটল—সে কিছু না—কিছু না—

হর—আইজ্জদি নাকি—

পটল—সব বাজে কথা। প্রথমত আইজ্জদি কিছু এ বিষয়ে বলছেই না ;

দ্বিতীয় কথা হ'ল, আইজ্জদি বললেই ত আর হবে না—তৃতীয়

কথা গ্রামের লোকগুলো আমরা ত এখন পর্যন্ত ম'রে যাই নি—।

হর—ব'স ঠাকুরপো ব'স ; তোমার সঙ্গে কথা বললে তবু মনে একটু জল

আসে। আইজ্জদি নাকি মেছেরের মাথা ফাটিয়ে দিয়েছে—

পটল—ঐ গুলোই ত সব বাজে কথা। আপনার ঘরে এসেছি, কাঠে

লেগে হোঁচট খেয়ে পা থেকে যদি একটু রক্ত বেরোয় তাহ'লে

কি সেই রক্ত দেখিয়ে সকলকে ব'লে বেড়াব, বৌঠান আমাকে

খুন করেছে ? তক্কাতকিতে একটু রাগারাগি হয়েছে, রাগা-

রাগিতে একটু হাতাহাতি—হাতাহাতিতে একটু লালচে

লালচে—। একে কি খুনোখুনি বলতে হবে ?

হর—আমাদের কিছু বলবারই দরকার নেই—কিছু না হ'লেই হয়।

পটল—ওসব কথা এখন রাখুন, অন্য কাজের কথা বলুন। আজকেই-ত

শুনলুম চ'লে যাচ্ছেন। গয়না-গাঁটির কি ব্যবস্থা করে গেলেন ?

হর—কেন ? কি আর ব্যবস্থা করব ?

পটল—সব সঙ্গে যাবে ?

হর—তুমি কি বল ?

পটল—আমি আর কি বলব ? পটলডাক্তারের কথা এখন বিষয়

ছিটা ; কেউ শুনতে চায় না,—তাই আর গায়ে প'ড়ে বলতেও

ইচ্ছা করে না। নন্দলাল ত তাতে আর মাতে। বাবা যতই

বিদ্যাশিক্ষা হস, বয়সে ত ছোট। একটা বুদ্ধি বিবেচনাও ত

কিভাবে করতে পারিস ?

হর—তোমরা ঘরের লোক, জিজ্ঞেস করতে হবে কেন ?

পটল—তাই ভেবেই ত ছুটে আসি। কিন্তু ঘরের লোক যে তোমার ছেলের কাছে এখন পরের লোক হ'য়ে গেছে। গায়ে পড়ে বুদ্ধি দিতে গেলেও ত চটে যায়। এতগুলো গয়না-গাঁটি নিয়ে কখনো পথ চলতে হয় ?

হর—তা ত বটেই ঠাকুরপো,—আমার হাত-পা ত দেখ এখনই আবার কাঁপতে শুরু করেছে। কি বুদ্ধি তা-হ'লে করি ?

পটল—সে এখন ভেবে দেখুন। আগার দিক থেকে কথাটা আপনাকে ব'লে রাখা ভাল মনে করলুম—তাই বললুম। আপনি যদি একান্ত রেখে যেতে চান আমার কাছে, তা আমি পারি; তবে দেখুন, বড় দায়িত্ব।' যে দিনকাল, তাতে আবার আমার ঘরে ত আর দিক্কু নেই। তবে যদি একান্ত বলেন, এ বিপদও আমাকে ঘাড়ে নিতে হবে।

হর—আমি বলি তা-ই ভাল ঠাকুরপো।

পটল—সেটা ভেবে দেখুন। তা-ই যদি সাব্যস্ত হয়, তবে কথাটা রাখতে হবে অতি সঙ্গোপনে। এক কানে গেলেই পাচ কান হবে—পাঁচ কান হ'লেই আজকালকার দিনে আপনার ঘাবে জিনিস—আর পটলডাক্তারের ঘাবে প্রাণ। আপনি জানলেন—আর এই দুগ্গা কাছে আছে—দুগ্গা জানল—আর জানল পটলডাক্তার।  
ক্যু—এই তিন কানের পরে আর চার কান করবেন না যেন।

হর—নন্দ ?

পটল—আমি বলি চেপে যান, না ব'লে পারলেই ভাল।

হর—তাকি হয় ? কৃত্যকে না হয় না বললুম কিছু, কিন্তু নন্দকে না ব'লে পারব কি ক'রে ?

পটল—দেখুন, — একান্ত না পারলে বলুন ।

হর—নন্দ —নন্দ, —একবার শোন দেখি —

[ নন্দলালের প্রবেশ ]

নন্দ —মা, তুমি এখনও ব'সে ব'সে —

হর—কেপিস নি বে বাবা, ব'সে ব'সে গাল-গল্প করছিনে কিছু, কাজেব কথাই বলছি । হাত ধ'বে চল বললেই ত বাডিঘব জিনিস-পত্র সব ছেড়ে একপলকে চলে যাওয়া যায় না, সবটারই ত একটা ব্যবস্থা চাই ।

নন্দ—কিসেব অব্যবস্থা হ'ল ?

হর—এই পটল ঠাকুরপো বলছিল —

পটল—ঐ ত আবার ভুল ক'বছেন বোঁঠান', পটল ঠাকুরপো বলতে যাবে কেন ? আপনিই ত দেখতে পেয়ে ডেকে বলতে যাচ্ছিলেন — সেই কথাই ত হচ্ছিল — ।

হর—তাই বলছিলুম, এত গয়না-গাঁটি সঙ্গে ক'রে নিয়ে—

নন্দ—সে সব তোমার ভাবতে হবে না ।

হর—একটা ব্যবস্থা ত করতে হবে ?

নন্দ—সে সব ঠিক আছে, সে তোমার পরে বলব ।

পটল—তবেই ত সেই কথা হ'ল বোঁঠান — পটল ডাক্তারকে এখন আর বিশ্বাস নেই ।

নন্দ—বিশ্বাস অবিশ্বাসের কোন কথা নয় । সে বিষয়ে আমরাই সাবধান আছি ।

পটল—বেশ, ব্যবস্থা ক'রে রাখলে আর কথা কি ? আসি তবে বোঁঠান ।

হর—এটার না হর ব্যবস্থা হ'ল । অল্প ব্যাপারগুলোর একটা বিহিত না ক'রে বেও না ঠাকুরপো ।

পটল—বিহিত আগাদের আর করতে হবে না—আপনার চৌকস ছেলে রয়েছে—চিন্তা কি ? [ প্রস্থান ]

নন্দ—মা, তোমাকে আমি কতদিন বারণ করিনি, এই পটল ডাক্তারকে তুমি আর আঙ্কারা দিও না ।

হর—সকলের উপরে কেবল ক্ষেপিস নে নন্দ । কেন ? কি ক্ষেতি করেছে তোর পটল ডাক্তার ।

নন্দ—তুমি জান না মা, পটল ডাক্তার আমাদের সর্বনাশ করবার চেষ্টায় আছে । আজ করিম সর্দার একটু আগে কি বলেছে জান ? আমাদের জমাজমি সব বিনা টাকায় আইজদির হাত করিয়ে দেবে বলে দিনরাত পরামর্শ দিচ্ছে পটল ডাক্তার ।

হর—ও মা, তুই বলিস্ কি নন্দ ?

নন্দ—যা বলি তার বর্ণ-বিসর্গও মিথ্যা নয় । তুমি আর পটল ডাক্তারের সঙ্গে কোন ব্যবস্থার কথা বলতে যেও না, ব্যবস্থা যা হয় আমিই করব । [ প্রস্থান ]

হর—শুনছিস্ ঠাকুরঝি ? শুনে যে আমার হাত-পা কাঁপছে । পিরখিমিটা কি একেবারে উন্টেই গেল ?

ছর্গা—তাই ত দেখছি বৌঠান, ধম্মাধম্ম বলে আর কিছুই রইল না । ( হরসুন্দরী মূলসহ উৎপাটিত একটি করবী গাছের ডালপাতা ঠিক করিতে লাগিল । ) একি বৌঠান ? এত বড় করবী গাছটা মূল শুকু তুলে নিয়েছ ? একি বাঁচবে ?

হর—বাঁচবে দেখিস । যেখানে নিয়ে যাব সেখানে কয়েক দিন শুকু ক'রে একটু জল ঢাললেই বাঁচবে ।

ছর্গা—তা হয়ত হবে ।

হর—করবী হ'ল আমার দূর সম্পর্কের মাসতুত বোন, থাকত ছেলে-

বেলায় আগাদের বাড়ি! সাত বছরে বিয়ে হ'য়ে চলে এলুম  
 শশুর বাড়ি। কবরী'ক ছেড়ে আব খাকতে পারি না। ঠাকুর-  
 পো যা ক্ষেপাত! একদিন ঠিক দুপুরবেলা—ঠাকুরপো টেঁচিয়ে  
 উঠল—বৌঠান, এস তোমার বোনকে দেখবে। কি ছেলে-  
 গাভ্রুই ছিলুম ঠাকুরকি শোন,—মাথার কাপড় ফেলে সত্যা  
 দৌড়ে গেলুম উঠানে; ঠাকুরপো হাত ধ'রে নিয়ে চলল, হাত  
 ধ'রে এই কবরী গাছের গোড়ায় টেনে নিয়ে এসে বলল, বৌঠান  
 এষ্ট ত করবী—!

ছুর্গা—কি অন্তায় দেখত!

হর—সেই কবরীর জায়গায় এসেছিলি তুই, আমার রাধুব বিয়ে হবার  
 পরে পেয়েছিলুম অতসীকে। তোকে যে আমি ফেলে যাচ্ছি,  
 অতসীকে যে আমি ফেলে যাচ্ছি, সে কি আমার কম দুঃখ?  
 আজ যে এমন করে চলে যাচ্ছি, আমি বলি নি তা কাউকে,  
 তোকেও খবর দিই নি, অতসীকেও না; বলব কোন্ মুখে?

ছুর্গা—তা বৌঠান, আমাকে কিন্তু তুমি ফেলে যেতে পারবে না, আমি  
 তোমার পিছ নেব।

হর—মনে মনে আমি কি আর ভাবি নি সে কথা? এই দু'দিন ধ'রে  
 পাগলের মতন কত কথাই-না ভাবি!

ছুর্গা—খালি ভাবলে হবে না, আমাকে তুমি মেরেও তাড়াতে পারবে  
 না। তুমি ছাড়া আমার বন্ধনই বা কি, গতিই বা কি?  
 ভাইয়ের খবর ত তুমি জান। পূজার পরে এসে ইন্ডিরি-পুতুর  
 নিয়ে চলে গেল; আমাকে বলল, এত লোক নিরে পালতে পারি  
 এমন সাধ্য নেই। আমি এখন কুকুর-বেড়ালের মতন কোথায়  
 বাই?

হর—তারপরে আবার যা দিনকাল !

হুর্গা—সে-ত আর তোমাকে বলতে হবে না। আজ ভোররাত্তে  
তোমাকে ব'লে গেছি সব কথা।

হর—তাই-ত ভাবি কিই-বা কবি !

হুর্গা—দোড়াই তোমার বৌঠান, আমার মাথা খাও—আমাকে তুমি  
ফেলে যেও না। আমার ঘরে পরে শত্রুর, তোমার কি কিছু  
অজানা? এই পটল ডাক্তার কি মানুষ? একবার আমার কত  
কুচ্ছা বটিয়েছিল মনে আছে? কুলীনের মেয়ে—সতের বছরে  
বিয়ে, তিন দিন সোয়ামীঘর, বাইশ বছরে কপাল পুড়ে ব'সে  
আছি। তোমরা সব চলে গেলে—

হর—চল তা হ'লে ঠাকুরঝি, আমার সঙ্গেই চল, তুই আর ক'টা  
ভাত-ই বা খাবি।

হুর্গা—তোমার পাতা কুড়িয়ে খাব বৌঠান, তাতে আমার ঘেরা  
নেই।

হর—তা হ'লে যা ঠাকুরঝি, তৈরী হ'য়ে আয়।

হুর্গা—আমি আর তৈরী হব কি? কি আর আছে আমার বেসাত!  
এক মুঠ ভাত কুড়িয়ে রেখে এসেছি, মুখে পুরে চ'লে আসব।

হর—তুই-ও সঙ্গে চললি, থাকল খালি অতসী। কি আর করি,  
পরের মেয়ে! বলেছিলুম কতবার নন্দকে, নন্দ, অতসীকে আমার  
ঘরের লক্ষী ক'রে আনি। বৃদ্ধিতে পারি না ওর মন; তেমন  
না-ও বলে না, হ্যাঁ-ও বলে না।

হুর্গা—মন্দ কি বৌঠান?

হর—অমন মেয়ে দেখি নি। দেখতে শুনেতে পারতী—ঠিক আমার  
রাধুর মতন। আবার ভাবি—পরিবের মেয়ে—দিতে খুতে

পারবে না তারা কিছুই, ছেলেবও হযত তাই মন উঠছে না।

হুর্গা--না-ই বা দিল খুল, তোমাব কি জিনিস-পস্তর, গঘনা-  
গাটি কিছুর অভাব? তোমাব ঘরের লক্ষ্মী তুমি সাক্ষিয়ে  
নেবে।

হর--তা আর হ'ল কই? এখন দেশ ছেড়ে চলে গেলে কি তা আর  
হবে?

[ নন্দমালের প্রবেশ ]

নন্দ--কই মা, দেখি তোমার সঙ্গে কি কি যাবে। ( চারিদিকে  
তাকাইয়া ) এই স--ব যাবে?

হর--সব আর কিবে বাপু, যা নইলে নয় তা-ই যাবে।

নন্দ--এই সব হাঁড়ি-কুড়ি--সুপারিব খোল--

হর--হাঁড়ি-কুড়ি কোথায়--ও-ত তিন বছরের মনসার ঘট ;  
মনসার ঘট নাকি পিছে ফেলে যাওয়া যায়? সুপারির  
পোলে জ'ডান এ বছরের নোতুন ধানের ছড়া, ও বাপু ঘরের  
লক্ষ্মী--এ আমি ফেলে যেতে পারব না।

নন্দ--এই সব তুলসী গাছ, করবী গাছ--?

হর--তুই বলিস কি সব কথা? সন্ধ্যাবাতির তুলসী গাছটা ফেলে  
যাব? আর এই করবী গাছ,--তা বাবা আছে অনেক কথা--  
সব কথা বলতে পারব না--ওটাও যাবে।

নন্দ--কালী গোরু আবার ওখানে বাঁধা কেন?

হর--কালী আমার বাড়ির লক্ষ্মী-- ( নন্দ মাথায় হাত দিয়া বসিগা  
পড়িল ) --মাথায় হাত দিয়ে যে বসেই পড়িলি, এদিকে  
আমাকে বলে আসছিস্, সব ব্যবস্থাই হবে। আমার জিনিস-  
পস্তরের ব্যবস্থা না হলে আমি এক পা-ও নড়ব না কোথাও--



তা কিন্তু বলে রাখছি। শেষটার আমার কেউ দোষ দিতে পারবি নে।

নন্দ—( একটু ভাবিয়া ) আচ্ছা মা, তা-ই হবে; সেই ব্যবস্থাই হবে, তুমি এখন খেয়েদেয়ে প্রস্তুত হও।

হর—আবার জগাজগি নিয়ে কি সব গোলমাল শুনলুম—  
নন্দ—কিছু না মা, তুমি সব কথায় কান দিতে যেও না, নিজের গোছ গুছিয়ে নাও।

হর—কান দি কি আর ইচ্ছায়? তোকে আমার বড ভয়; তোর গোয়াতুমি ত তুই কখনো ছাড়বি না; কাকে কখন কি বলে ফেলিস, কি করিস—আমিত ভয়ে মরি।

নন্দ—সব ঠিক আছে; তুমি আর মাথা খারাপ ক'রো না।

হর—তুই ঠিক আছে বললেই ঠিক হল? ঐ যে কাছের বলে গেল, নৌকা নিয়ে কি সব গোলমাল হয়েছে—

নন্দ—কিছু হয় নি।

হর—তুই আমাকে সব ছেপে যাচ্ছিস, তোর মতলব ভাল না আমি বুঝতে পারছি। তোর সঙ্গে এক পা বেড়াতেও আমার ভয় করে, যা দিনকাল, একটু র'য়ে স'য়ে চলতে হয়; সব ব্যাপারেই তোর নবাবী। চারদিকে শত্রুর—

নন্দ—কেউ শত্রুর নেই মা,—শত্রুর আছে শুধু তোমার ঘরে—ঐ পটল ডাক্তার; তার কথায় যেন কান দিও না কখনো।

হর—তোর ঐ এক কথা। তা শোন, তোর এই ছুগ্গাপিসি কিন্তু আমাদের সঙ্গে যাবে।

নন্দ—( একটু চিন্তিতভাবে ) থাকবে গিয়ে কোথায়?

হর—সে যা হর হয়ে যাবে, তা নিয়ে তোর ভাবতে হবে না।

নন্দ—বাধারামও ত সেজেছে, সে তার বউ নিয়ে যাবে ।

হর—ঐ আরেক বিপদ জুটল ; ছ'টোতে দিনরাত ঠোকরা-ঠুকরি—  
আমার হাড জালিয়ে ছাড়বে । ইয়ারে নন্দ, সকলেই তবে চলল,  
বাকি রইল আমার অতসী ।

নন্দ—অতসীকেও তাহ'লে নিয়ে চল না মা ।

হর—আমার কি কিছু অনিচ্ছা ? কত দিন ত তোকে বলেছি,  
অতসীকে আমি ঘরে আনি, তা তুই বাজি-হ'লি কই ?—

নন্দ—এমনি তুমি সঙ্গে নিয়ে চল না ।

হর—তাকি কখনও হয় ? তার বাপ-মা রাজি হবে কেন ?

নন্দ—তুমি বললে রাজি হতেও পারে ।

হর—এসব তুই বুঝবি নে নন্দ ! এত শহরতলী নয়—পাড়া গাঁ ! অত  
বড় বয়স্কা মেয়েকে কেউ কখনো দেয় পরের সঙ্গে ? আমিই  
বা সে কথা বলি কি ক'রে ? বলেছিলুম ত ওকে আমি ঘরে  
আনি ।

নন্দ—আচ্ছা সে যা হয় হবে । [ নন্দের প্রস্থান ]

[ পট-পরিবর্তন ]

## দ্বিতীয় দৃশ্য

পটলডাক্তারের বাড়ি। পটলডাক্তার ও তাহার স্ত্রী উষা।

উষা—আবার এইসব কি হচ্ছে শুনি? আমার এসব ভাল লাগছে না।

পটল—স্ত্রীলোকের ভাল লাগে, 'আমসি, কোঁচল, কাঁচুনি; তেঁতুল, লঙ্কার  
রাধুনি'; তাই ব'লে তা ছাড়া কি আর জগতে ভাল নাই  
কিছু?

উষা—কানাইর সঙ্গে নাকি আবার অন্তরীক বিয়ের কথা হচ্ছে?

পটল—সে ত হচ্ছেই—হবারই ত কথা।

উষা—কেন? মেয়ে ফেলবার আর আস্তাকুড়ে নেই?

পটল—আস্তাকুড়ে আর থাকবে না কেন? সংপাত্র আর নেই।

উষা—সংপাত্র হ'ল কানাই?

পটল—আমার বুদ্ধি বিবেচনায় ত তাই মনে হচ্ছে; এখন তোমার  
পাঁতি-পত্র কি রকম হবে তা তুমি বলতে পার।

উষা—কানাই ত এই বয়সে পাঁচবার জেলে গেল—

পটল—খদ্দেশী ক'রে জেলে গেছে—সে ত যতবার যেতে পারে ততই  
ভাল।

উষা—সেদিনও ত দিদি বলল, এখনও রোজ পুলিশ ঘোরে ওর পেছনে।

পটল—সেই জন্তেই ত বিয়ে করা দরকার। সেই সোজা কথাটাই ত  
তোমার মত মেয়েলোকের মাথায় কিছুতে ঢুকছে না দেখছি।  
ষতদিন বিয়ে-খা ক'রে ঘর-সংসারে মন না দেবে ততদিন ও  
বনব্রহ্ম হ'য়ে মানুষকে শুধু গুঁতোবে। ওর আলায় ত মূর্খকে  
বাস করা দায় হ'ল। আজকে ও এই সভা করে, কালকে তাই  
করে,—একে মারতে চায়, ওকে ধরতে চায়। সাথে কি আর

ঐ মণ্ডাটাকে এত আদর করি ? ওয়ে আমার পেছনে লেগেই আছে ।

উষা—তাই বুদ্ধি আজ এত খাতির ! অতসীকে ঘুষ দিয়ে কানাইকে খুশী করতে হবে ?

পটল—এত সব পাকা পাকা কথা আজকাল কে তোমাদের শেখায় বল দেখি । এত খাতিরটা কোথায় হল ?

উষা—খাতির নয় ত কি ? আমি অতসীর মাকে ডেকে এ-বিয়ে বারণ ক'রে দেব ।

পটল—কেন ?

উষা—নিজের কাজ হাসিল করার জন্য তুমি অমন ভাল মেয়েটাকে ভাসিয়ে দেবার মতলবে আছে ।

পটল—শোন, সব কথা ত চেষ্টিয়ে বলা যায় না ! রহিমগঞ্জের ফুড কমিটির প্রেসিডেন্ট আর আমাকে জড়িয়ে এই কানাইটা নাকি পুলিশের সঙ্গে কি একটা যোগ-সাজসের চেষ্টায় আছে । অবশ্য ফুড কমিটির মাল যে এ-হাত ও-হাত একটু হয় না তা আমি বলছি না ; তবে এই কলির শেষে পুণ্যাঙ্গীটা আবার কে ? অষ্টতিরিশ টাকা চালের বাজারে এ-হাত ও-হাত না ক'রেই বা খেয়ে বাচতে পারে কে ? আর রহিমগঞ্জের ফুড কমিটিতে চুরি হয় তার পটলডাক্তার কে ? আমার উপরে এ আক্রোশ কেন ? সকলের এক কথা, মোহন মিত্রাকে বুদ্ধি যোগায় পটল ডাক্তার, — মোহন মিত্রার পেটে যেন আর বুদ্ধি নেই ।

উষা—কেন তুমি গেলে সেদিন আবার মোহন মিত্রার কাছ থেকে কাণ্ড আনতে ?

পটল—কি করতে গুনি, মা-কালী হ'য়ে থাকতে ?

উষা—যা ছেঁড়া কাপড় আছে তা-ই পড়তুম।

পটল—বলি খেতে কি? বাঁচতে কি ক'রে? ডাক্তারিতে কোন শালার পরমা আছে আঙ্গকাল? কোথাও এক ছিঁটে ওষুধ পাওয়া যায়? ধম্মাত্মা ত চট করে সেজে গেলে, বাঁচতে কি ক'রে সেটাও বল।

[ কানাইর প্রবেশ ]

কানাই—বেশ মানুষ ত আপনি মশাই! জোর ক'রে বাড়িতে বসিয়ে রেখে নিজে কোথায় চ'লে গেলেন। আমার সব দিনটা একেবারে মাটি।

পটল—( কানাইর হাত দু'টি ধরিয়া ) অত চট কেন দাদা? একটু ধৈর্য ধর। সব দিনটা মাটি হবে কেন, —সব দিনটাই আজ হবে খাঁটি। বস দাদা, এই মোড়াটা টেনে একবার বস।

কানাই—আর বসতে পারব না, বসি অনেক হয়েছে।

পটল—এটা দাদা তোমাদের একটা রোগ, আমি ডাক্তার মানুষ, এ কথাটা আমাকে বলতেই হ'ল। যে বাঁধে সে কি আর চুল বাঁধে না? যারা কাজের মানুষ তারা সারাটা জীবন হৈ চৈ করেই কাটাবে? এক-আধ দিনের জন্তেও কি একটু স্থস্থ হ'য়ে বসবে না?

কানাই—আচ্ছা আমি দাঁড়াচ্ছি, বলে ফেলুন আপনার কথাটা।

পটল—দাঁড়াচ্ছি নারে দাদা, তাহ'লে একটু বসতে হয়; ঐভাবে ক'রে কথা হয় না। পটলডাক্তারের মাথার দিব্যিতে একটা বেলা যখন রয়েছে গেলে তখন আর পাঁচ-দশ মিনিট তোমাকে বসতেই হচ্ছে। ( কানাইর হাত ধরিয়া জোর করিয়া বসাইয়া দিল। )

কানাই—মতলবটা কি চট ক'রে বলে ফেলুন দেখি নি।

পটল - ( মুছহাশ্বে ) ঠিকই ধরেছ দাদা, মতলব একটা আছে, কিন্তু সেটাত অমন চট করে বলে ফেলবার জিনিস নয় ! ( আরও কাছে আগাইয়া ) তোমাকে কিন্তু দাদা এরকম উড়নচণ্ডী হ'য়ে আমি আর ঘুরতে দেব না ।

কানাই - কি করতে হবে বলুন ।

পটল - তোমার দাদা নেই, আমি এখন তোমার দাদা । আমার কথা তুমি পায় ঠেলতে পারবে না কিচ্ছুতে ।

কানাই - এত ভূমিকায় কাজ কি ? মনোভাবটা সোজাই বলে ফেলুন ।

পটল - তোমাকে এবারে বিয়ে করতে হবে । আর দেখ, তোমার বোঠানের শরীরের অবস্থা ত তুমি ত নিজেই দেখতে পাচ্ছ, তোমার নিজেরই ত অগ্রবর্তী হ'য়ে এবিষয়ে এখন ব্যবস্থা করা উচিত ।

[ উষার প্রশ্নান ]

কানাই - ডাক্তারি, ফুড-কমিটি - সে সব ছেড়ে আবার ঘটকালি ব্যবসা কবে থেকে আরম্ভ করলেন ?

পটল - ( হাসিয়া ) ডাক্তারি ব্যবসায় কি এখন আর দিন চলে দাদা ? বুঝতেই ত পাচ্ছ । তাই এসবও একটু একটু আরম্ভ করতে হয়েছে । এটা হ'ল কি জান ? যাকে তোমরা বল 'সাইড্, বিজনেস্' - !

কানাই - কিন্তু একটু বে মুসকিল আছে ।

পটল - কি ?

কানাই - আমার মতন উড়নচণ্ডী ছেলে বিয়ে করবার মেয়ে ত পাওয়া যাবে না কোথাও ।

পটল - সে ভাব ত আমার উপরে । মেয়ের কথা ত সেদিন আমি

তোমাকে ব'লেই রেখেছি। মেয়ে দেখবার কথাও ত হলো !  
এখন তোমার ঐ চালবাজি রাখ দাদা। মেয়ে আমার হাতে  
আছে ; আছে ব'লেই তোমাকে জোর ক'রে বলছি।

কানাই—চট্ ক'রে বিশ্বাস করতে পারলুম না।

পটল—চট্ ক'রে বিশ্বাস করবেই বা কেন ? সব কথা একটু ধৈর্য ধ'রে  
শোন, তারপরে বিশ্বাস আর অবিশ্বাস—

কানাই—আচ্ছা বলুন।

পটল—তাহ'লে খুলেই বলছি সব কথা। আজকালকার কথা দাদা  
আমাদের চেয়ে তোমরাই ভাল জান। এই আমাদের ব্রজহরি  
ঘোষালের মেয়ে অতসী—তার কথাই ত সেদিন বলে এলুম।  
দেখতে শুনতে দাদা নিখুঁত—নাকটিও অতসীর মত—বর্ণটিও  
অতসীর মত। কিন্তু সে সব কথা তোমাকে বলব না, সে-  
কথা বললেই তুমি হয়ত চেঁচিয়ে উঠবে, সন্দরী মেয়ে আমি  
বিয়ে করব না !

কানাই—( হাসিয়া ) তা কি কেউ বলে ?

পটল—আমরা ত বলতুম না, এখন তোমাদের কি সব মতিগতি কি  
ক'রে বুঝব ? যাক্ সে সব কথা। সেই অতসী—সে আবার  
ঠিক তোমার ধাতের। চাল-চলন, কথা-বাতী সব ঠিক এক ;  
যেন ঘটটি বুঝে সরটি।

কানাই—খুব ঘটকালি শিখেছেন ! এ ব্যবসাতেও আপনার বেশ পণ্ডার  
হবে দেখতে পাচ্ছি।

পটল—তোমার সঙ্গে ঘটকালি নয় দাদা, গুপ্ত কথাটিই তোমাকে বলছি।  
ঐ মেয়ে ইন্সুলে কলেজে না পড়লে কি হবে, লেখা-পড়া বেশ  
জানে। তোমাদের এই—আজকালকার কি সব বই, ঘরে বাসে

লুকিয়ে লুকিয়ে সব পড়েছে। পড়ে শুনে ওর গেছে চোখে ফুটে !  
কানাই—সেত ভালই হয়েছে।

পটল—শেষ পর্যন্ত ভাল হ'লে তবে ত হয় ! ও মেয়ে কি ক'রে শুনেছে  
তোমার কথা—তোমার বক্তৃতা।

কানাই—তাই শুনে বুঝি ক্ষেপেছে আমাকে বিয়ে করতে ?

পটল—কথাটা হেসে উড়িয়ে দিও না একেবারে। মেয়েকে এখন  
সামলান দায়।

কানাই—সামলানই দায় হ'রে পড়েছে ?

পটল—দায় বই কি ? সে ত বেঁকে বসেছে, তোমাকে ছাড়া বিয়ে  
করবে না। এখন তুমি যদি মুখ তুলে না চাওত—

কানাই—ছাড়ুন মশাই, এবারে বাড়ি যাই।

পটল—কিন্তু দাদা ভেবে দেখ, তোমারও একটা দায়িত্ব আছে। আমার  
উপরে চ'টে গিয়ে—

কানাই—দেখুন, অনেক কথা বাড়িয়ে লাভ নেই, গোলাখুলি বলছি।  
বিয়ে এখন আমি করব, তার কারণটিত অতি স্পষ্ট, বিয়ে না  
করলে দেখছি আর কপালে ভাতই জুটবে না ! কিন্তু আপনার  
কোনো কথায়ও আমার বিশ্বাস নেই। যদি সত্যি বিয়ে করতে  
হয়, আমি নিজেকে মেয়ে না দেখে, কথাবার্তা না ব'লে কিছু  
বলতে পারব না।

পটল—আমিওত তা-ই বলছি ; মেয়েই ত তোমাকে দেখাতে চাই।

কানাই—বেশ, তাই হবে !

পটল—হবে নারে দাদা—এখন চল—আমার সঙ্গেই।

কানাই—তবেই ত আবার সন্দেহ আনলেন। আপনার এত তাড়াহুড়ো  
দেখলেই ত আমার মনে সন্দেহ আসে।



পটল—এখনই ভাল দাদা। আমি তাদের সঙ্গে সব কথা ব'লে এসেছি।

কানাই—এখনই কোথায় যাব? আপনি কৈপেছেন মশাই?

পটল—কেন, তোমার আপত্তিটাই বা কি? এসেছ যখন এদিকে তখন কাজটা মেরেই যাও না।

কানাই—আবার বিয়েটাও আজকেই মেরে যেতে বলবেন নাকি?

পটল—ঐ ত আবার ঠাট্টা করা। নাও—আর কথা নয়—ওঠ—

কানাই—কিন্তু আপনার কথায় যে আমার বিশ্বাস হয় না!

পটল—একদিন একটা কথায় না হয় বিশ্বাস ক'রেই দেখ! তারপরে যদি এর ভেতরে 'বেহুদা' পাও কোন কথা ত এই পটল ডাক্তারের কান দু'টো কেটে তোমাদের রহিমগঞ্জের হাটের রামছাগলটার গলায় ঝুলিয়ে দিও। চল—চল—। (কানাইর হাত ধরিয়৷ টানিয়া লইয়া প্রস্থান।)

### ( দৃশ্যান্তর )

[ ব্রজহরির বাড়ি। ব্রজহরি ও কেমকরী ]

ব্রজ—একমুঠ গেতে যদি দিতে হয় ত দাও—নইলে আমি যেদিকে পারি চলি। আমার যা বলবার তা আমি ব'লে দিয়েছি; এখন সারা দিন এই নিয়ে খ্যাচ্ খ্যাচ্ করলে লাভ হবে কিছু?

কেমকরী—খেতে দেব না পরতে দেব না, মেয়েটার দিকেও ত একবার তাকাতে হয়!

ব্রজ—তাই বলে শহরে কোন্ একছোঁড়া এসে আমার মেয়ে চাইল  
আর আমি সোমন্ত মেয়েটাকে তার সঙ্গে শহরে পাঠিয়ে দিলুম ?  
হ'ক গে সে বড় লোক, আমি তা পারব না ।

ক্লেম—কোন্ এক ছোঁড়া আর হ'তে যাবে কেন ? রায়বাড়ির ছেলে ।  
শহরে ফচকে ছোঁড়া নয় নন্দ । চলে যাচ্ছে আজ, দেখা করতে  
এসেছিল ; ঘরে আমাদের না দেখে চ'লেই যাচ্ছিল, ঘাটের পথে  
আমার সঙ্গে দেখা । পায়ের ধুলো নিয়ে আশীর্বাদ চাইল ;  
যাবার সময় হাসতে হাসতে বলল, 'অতসীও চলুক না জেঠি  
মায়ের সঙ্গে ।

ব্রজ—আহা—বোঝ না তুমি । সব ব্যাপারেরই একটা দস্তুর চাই,  
একটা সমাজ আছেত ? যাক্ গে, ভাত দু'টি পাব কি না শুনি,  
নইলে চলি একদিকে ।

ক্লেম—এত হ'ল খালি গা-ঠেলা কথা । রায়দের সঙ্গে কাজ করতে  
পেলে ত বস্ত্রে যেতে জানতুম ।

ব্রজ—ঐ সেই ঘ্যানরু, ঘ্যানরু ! এক কথা পাঁচ শ' বার ! রায়দের  
সঙ্গে কাজ করতে কি এখনও আমার আপত্তি ? আমুক না  
বিষ্টু রায়, বলুক—তার ছেলের জন্তে আমার মেয়ে চাই,—  
বিয়ে না করিয়েই আমি দিয়ে দেব তার সঙ্গে আমার মেয়ে ।  
কেন, রায় গিন্নি নিজে এসে একবার বলতে পারতেন না  
তোমাকে ?

ক্লেম—তা হ'লে আমিও বলে রাখছি, সকাল বেলা পটলু ডাক্তারের  
সঙ্গে যে সন্ধ্যার পরামিশ হয়েছে সেখানেও আমি মেয়ে দেব  
না কিছুতে ।

ব্রজ—কেন ?

কেম—পটল ডাক্তার ষার ভিতরে আছে, আমি তার ছরহদে নেই।

ও কি মুনিষ্টি ?

ব্রজ—কেন সকাল বেলা না এই পটল ডাক্তারের কত গুণ-কেন্দ্রন হয়েছিল ? ( মুখ খিঁচাইয়া ) তখন বুঝি আমাকে ঠামবার দরকার হ'য়ে পড়েছিল—?

[ ব্রজহরির প্রতি কটমট করিয়া তাকাইয়া কেমকরীর প্রস্থান ]

ঐ-ই শিখেছিলে, বাপ-মা ঐ-ই শিখিয়েছিল ; ছোটবেলা-থেকে খালি চোখ-কটমটানি ।

[ হর সুন্দরীর প্রবেশ ]

কে—আপনি—

হরসুন্দরী—হ্যা—আমিই একটু এসেছি । মুখ ফুটে কখনো কারো কাছে চাই নি কিছু—আজ একটু চাইতে এসেছি ।

ব্রজ—কি—কি— ?

হর—অতসীকে কিন্তু আমাকে দিতে হবে, আমি ওকে আমার ঘরের লক্ষী করব ।

ব্রজ—তা—তা—আপনি যদি বলেন—( বাড়ির দিকে মুখ করিয়া )

ওগো—কোথায় গেলে গো—একটু এস না, রায়গিরি এসেছেন ।

[ কেমকরীর প্রবেশ ]

হর—অতসীকে চাইতে এসেছি দিদি—ওকে আমার ঘরে নেব ।

কেম—স্নত অদেষ্ট কি আমরা করে এসেছি ?

হর—আর কথা বাড়াব না দিদি, কথা বলতে আজ আমার চোখ ফেটে জল আসে । ( চোখের জল মুছিয়া ) আমার কত আশা ছিল দিদি—জীবনে একদিনের জগুও সুখ হ'ল না । নন্দকে

বিয়ে করিয়ে কত সুখ করব ভেবেছিলুম—তা আমার কপালে নেই। পাঁচটা কাঁচানন্দকে ধরেছি; মেয়ে দু'টো বিয়ে দিয়ে দিয়েছি, নন্দের বিয়েতে গিয়ে আমি কত ঘটনা করব—কত আমোদ-আহ্লাদ করব—বিধাতা বাদী দিদি! আজ আমি বড় দুঃখে চোরের মতন নন্দের বউ ঘরে নিতে এসেছি—

ক্ষেম—চোপের জল ফেলো না রায়গিনি, কপালে থাকলে আবার সুখ হবে। এই ছাই দিনই কি চিরকাল থাকবে? তুমি এখন নিজে নিতে এসেছ—

ব্রজ—হ্যাঁ—তখন ত কোন আপত্তির কথাই উঠতে পারে না। নিজে আসবার দরকার ছিল কি—আমাদের ডাকলেই হত।

হর—কই, আমার অতসী মা কোথায় —?

ক্ষেম—ও অতসী—

[ অতসীর প্রবেশ ]

হর—নন্দের সঙ্গে কলকাতায় যাচ্ছি আজ, তুই বাবি আমার সঙ্গে অতসী? ( অতসী নীরবে মাথা নীচু করিয়া রহিল; হরসুন্দরী অতসীকে জড়াইয়া ধরিয়া ) তোর হাতেই এখন ঘর-সংসার তুলে দেব সব—চল অতসী—। মাকে বাবাকে প্রণাম কর ( অতসী সকলকে প্রণাম করিল ) চল এইবারে; আর দেয়ী করব না ঘোষাল মশাই—চলি।

ব্রজ—আজই যাচ্ছেন তা হলে?

হর—ব্যবস্থা ত সেই রকমই হয়েছে—এখন নারায়ণের ইচ্ছা। কিছু ভারনা নেই ঘোষাল মশাই, মান-মর্দান সব আমার হাতে। আমার সঙ্গে এইভাবেই চলুক অতসী—আমার ঘরের লক্ষী আমি ঘরে নিয়ে সাজিয়ে নেব।

[ কানাই ও পটল ডাক্তারের প্রবেশ ]

এই যে পটল ঠাকুর পোও এসে পড়েছ, ধন্য জুটিয়ে দেয়।  
অতসীকে নন্দের বউ করব বলে চেয়ে নিয়ে গেলুম। ও বাড়ি  
যেও—বলব সব কথা। এখন আর দাঁড়াব না—চল অতসী—  
চল—( অতসীকে লইয়া প্রস্থান; পটল ডাক্তার ও কানাই  
পরস্পর পরস্পরের প্রতি চাহিয়া রহিল। )

[ পটপরিবর্তন ]

## তৃতীয় দৃশ্য

বাঞ্ছারামের বাড়ি। খড়ের ঘরের দাওয়ার একখানা ছোট্ট চৌকির উপরে বসে  
ফটিক, ঘরের ভিতরে ছয়্যারের আড়ালে দাঁড়ান বাঞ্ছারামের স্ত্রী চপলা।

ফটিক—পান দাও দেখি দিদিমা—

চপলা—আ মর! দিদি, খুড়ী, মাসি-পিসি কিছুই বাদ রইল না, এখন  
আবার দিদিমা!

ফটিক—ফেলনা সম্বন্ধ নয় দিদিমা, একটু হিসাব করলেই ব্যাপারটা টের  
পাবা। আমার ঠাকুরদাদা আর বাঞ্ছারাম কলতরুর বাবা—  
তেনারা ছিলেন মালাবদল করা বন্ধু।

চপলা—এইবারে হিসাব খামা। বন্দুর হইছে তা-ই ভাল, মোস্তুন  
কুটুমিতায় আর কাজ নাই।

ফটিক—তাইতে কি হয়? নিত্য নোতুন সম্পর্ক চাই, নইলে কি আর  
রস জমে?

চপলা—আর রস জমানে কাজ নাই, তুই শীগ্গির পাল।

ফটিক—কেন, কেন?

চপলা—নন্দ ভূঁইয়া আসবে একখুনি, বুড়ায় খবর দিছে।

ফটিক—কেন, তুমিও কি চললা নাকি নন্দরায়ের সঙ্গে?

চপলা—মর পোড়ামুগা, নন্দরায়ের সঙ্গে মরতে গেলাম কেন, নিজের  
সোয়ামী নাই?

ফটিক—তবেই হইল, সেই এক কথাই গিয়া দাঁড়াইল। কইতেছে  
ফটিকচাঁদ এই হক কথা, নন্দরায়ের চোখ পড়ছে এই চপলা-  
সুন্দরীর উপর। নইলে কি আর এত গরজ? আর তা  
হইবেই বা না কেন? তালুকদারের রক্ত আছে গায়ে। ঐ  
নন্দের ঠাকুরদা ঈশানরায়ের গরর রাখ? চিনামাটির মদের  
জ্বালা এখনও আছে একটা আধমণি। আর তোমার মতন বুঝলা  
কি না—

চপলা—( ধমক দিয়া ) ফটিক তুই বড় বাড়ছিস, যা এপান থিকা—

ফটিক—এত চট কেন দিদিয়া? খাউক এ-সব কথায়। একটা পান  
দাও—তারপর বাড়ি যাই।

চপলা—বেলা দুফার হালতে চলল, এখন পানে কাজ নাই, বাড়ি যা,  
বাড়ি গিয়া ভাত খা।

ফটিক—বাড়িতে ভাত থাকলে এখানে বৈসা শুধু শুধু কি তোমার মুখ খাই?

চপলা—ভাত না থাকলে দড়ি-কলসী নিয়া গিয়া ডুব দে।

ফটিক—বেশ মনে করা'য়া দিলা দিদিয়া সেদিনের সেই চপ্, গান—(চাপা  
কণ্ঠে গুর করিয়া)

লজ্জা নাইরে নিলাজ কানাই লজ্জা নাইরে তোর ।

গলায় কলসী বান্ধি গিয়া জলে ডুব্যা মর ॥

চপলা—ঠিকই ত বলছে ।

ফটিক—ঠিকই ত বলছে ? পরের জবাবটিও তা হইলে শোন,—

কোথায় পাব কলসী রাধে কোথায় পাব দড়ি ।

তোমার কাঁপের কলসী দাও (আর) খোঁপা বান্ধা দড়ি ॥

চপলা—কত চপই যে তুই শেখছস্ ফটিক ! সর সর,—এখন পালা ।

নন্দ ভূঁইয়া আইল কিন্তু ।

ফটিক—তুমিও যে দেখি বড় ব্যস্ত মমন্ত—

চপলা—ব্যস্ত না ত কি, আমারও ত যাবার একটা যোগাড়-যন্ত্র চাই ।

ফটিক—তার লক্ষণ ত দেখতেছি না কিছুই ।

চপলা—কি করতে বলস্ তুই—নাচতে ?

ফটিক—নাচবা কেন ? রান্ধন-বাড়নও ত দেখতেছি না কিছু ।

চপলা—নিত্য নিত্য একটা রান্ধন-বাড়ন দেখবি কি ?

ফটিক—কেন, ব্যাপার কি ?

চপলা—তুই আর জালাতন করিস না, বাড়ি যা ।

ফটিক—শুনিই না কথাটা ।

চপলা—শুনবি কি ? হাঁড়ি চড়ে না আইজ তিন দিন । দিন-রাত্রির

দেখি কেবল কৈলকাতা যাবার সাজ-সরঞ্জাম । দেখি এইভাবে

কয়দিন চলে ।

ফটিক—বুদ্ধিটি কি ঠিক করছ কও ত দেখি ।

চপলা—বুদ্ধি ? আর দু'চাইর দিন দেখি, তারপরে ঘর-ছন্নারে আগুন

দিয়া একদিকে উধাউ ।

ফটিক—তার চাইয়া আমার বুদ্ধি লও ।

চপলা—সোয়ামী খুঁটয়া তোর সঙ্গে পালান ?

ফটিক—তাতে দোষটা কি ?

চপলা—তুই খাওয়াবি কি ? তোর নিজেরই ত ভাত জোড়ে না।

ফটিক—কল্পতরুর ঘরেই বা তুমি নিত্য এমন কি মচ্ছ-মুলা খাও ?

[ দূর হইতে বাহ্যারামের প্রবেশ, ফটিক না দেখিতে পায় এমন ভাবে আবার গাছের আড়ালে পলায়ন। ]

চপলা—তোর সঙ্গে গেলে তুই আমাকে শেষ পর্যন্ত কি করবি তা আমি জানি।

ফটিক—ঐ সব কথা ছাড় ; শেখছ ত এসব কথা কল্পতরু দাদার কাছে !

ঐ বুড়া কুঁজা তোমাকে খাইতে দিবে না, পরতে দিবে না, কত আর ঐ ভূতের খিঁচুনি স'বা ?

চপলা—(ধমক দিয়া) তুই কিন্তু আইজ ঝ্যাটা খাবি ফটিক, ভাল চাস ত বাড়ি যা—

ফটিক—বোঝা গেছে, বোঝা গেছে—নন্দরায়ের কাঁচা বয়েস—।

বাহ্য—(গাছের আড়াল হইতে বাহির হইয়া) ফৈটকা—ওরে নিব্বুংশার পো, তুই কি যাবার দিনে একটা খুনাখুনি হবি রে ?

ফটিক—( হাসিয়া ) আরে দাদা, ঐ তোমার এক রোগ ! দেখা হইতেই একটু কেন ?

বাহ্য—চটছি কেন ? তুই আসলি কেন আমার বাড়ি ? পাঁচ শ' বার বারণ করি নাই ? রাজ্যের লোক না খাইয়া মরে, তুই মরসু না কেন হারামজাদা ?

ফটিক—না আইজ আর তোমার মেজাজ ভাল নাই, এইবারে প্রাণ লইয়া মরি।

বাহ্য—মরি ? আইজ তোর মিটার হইবে—খাড়া—



ফটিক—কে করবে বিচার? নন্দ রায়? নন্দ রায়ের বিচারের ভয়

গিয়া তুমি কর, ফটিক তাতে কাঁপে না। ( উঠিয়া দাঁড়াইল )

বাহা—উঠিস্ না ফৈটকা—উঠিস্ না—

ফটিক—কেন? করবা কি শুনি?

বাহা—কি করি দেখবি? ( দৌড়াইয়া গিয়া ঘরে ঢুকিয়া একখানি

কুড়াল লইয়া বাহির হইল )

ফটিক—( কুড়াল দেখিয়া ভড়কাইয়া গিয়া, কিন্তু মুখে হাসিয়া ) তুমি দাদা

বুড়া হইয়া সতাই একেবারে ক্ষেপছ।

[ নন্দলালের প্রবেশ; চপলা ঘোমটা টানিয়া সরিয়া দাঁড়াইল। ]

নন্দ—কিরে বাহা, ব্যাপার কি আবার?

বাহা—এইবারে নিজের চৌক্ষে দেখ—দেখ সব কাণ্ড-কারখানা। কি

সব বুদ্ধি দিতেছিল বউরে।

নন্দ—কিরে ফটকে, দিনরাত তোর এবাড়িতে কিরে? খেতে পাস না,

বাপ-মা উপোস ক'রে মরে, আর তুই নিজে যে টেড়ি কেটে বিড়ি

ফুঁকে এখানে ব'সে আড্ডা জমাচ্ছিস্? সারা দিন তোর কাজ

কম নেই কিছু?

ফটিক—কাজ-কম না করলে আর ঘরে বস'য়া খাওয়ায় কে?

নন্দ—খুব ত লম্বা লম্বা কথা শিখেছিস! খাওয়ায় কে! খাস ত চুরি-

ছিঁচরেমি ক'রে। হাতে বাজারে গেলেইত লোকের পকেট

কাটিস্। বউকে কি বুদ্ধি দিচ্ছিলি?

ফটিক—তা-বউকে জিজ্ঞাস্ করলেই হয়।

বাহা—কেন, তুই কইতে পারস না ফুজিরপো—

ফটিক—বাপ মা তুইলা গাল দিও না কিন্তু দাদা—

বাহা—এক শ'বার দিলাম, একশ'বার।

ফটিক—( একটু দূরে সরিয়া ) ভাত-কাশড দিয়া নিজেই ইস্তিরি  
 ঘাব রাখতে পার না, বুড়া বয়সে বিয়া কবছিলা কেন? এখন  
 দোষ যত গ্রামের মানুষের ।

নন্দ—ফটিকে —( আগাইয়া ফটিকে ধরিয়া ফেলিয়া ঠাস করিয়া গালে  
 এক চড বসাইয়া দিল । )

ফটিক—( আবও দূরে সরিয়া ) অত চোখ-রাঙানির ভয় করি না এখন  
 আর । তালুকদারি, খরবাডি সব কি'না নিচে আইজদি, সে  
 সব আমাদের অজানা নাই । ঘোষাল ষাড়ির অতসীরে লইয়া  
 অত ঢলাঢলি কিসেব—গ্রামের লোক তা দেখে শোনে না ?

[ বলিয়া ফটিক চলিয়া যাইতেছিল, বাঞ্জাবাম সহসা ভাঙ্গা কুড়াল  
 খানা ছুঁড়িয়া মারিল ফটিকেব প্রতি, কুড়াল গায়ে লাগিল না,  
 পায়ে বাঁটের আঘাত পাইয়া 'মাগো' বলিয়া ফটিক বসিয়া পড়িল ।  
 চপলা ঘোমটা খুলিয়া দ্রুত ফটিকের কাছে দৌড়াইয়া গেল । ]

চপলা—( ফটিকেব পায়ে হাত বুলাইয়া ) কি হইল রে ফটিক, কি হইল ?  
 চল ফটিক, আমি তোমার সঙ্গেই যাই, চণ—দেখি আমারে কে  
 আটকায় ।—

[ চপলা ও ফটিকের প্রস্থানোত্তম, নন্দ ও বাঞ্জাবাম হতভম্ব  
 হইয়া চুপ করিয়া দাঁড়াইয়া রহিল । ]

[ পট-পরিবর্তন । ]

## চতুর্থ দৃশ্য

বেঙ্গু কুলুর বাড়ি। বাড়ির সামনের চাতলে একদল বার-চৌদ্দ বৎসরের ছেলে  
গান-সহকারে নৃত্য করিতেছে, বেঙ্গু তত্ত্বাবধান করিতেছে।

( গান )

আগে খেছু মধ্যে কাহু পাছে বলরাম।

( আহা নেচে নেচে যায় — )

( আহা মরি মরি রে— )

নেচে নেচে গোষ্ঠলীলা বৃন্দাবন-ধাম ॥

কেহ ছোটে কেহ লোটে কেহ দেয় ফাল।

( কিবা ছলাছলি করে— )

( আহা মরি মরিরে— )

রামকৃষ্ণ ল'য়ে চলে যতক রাখাল ॥

পিঠে চড়ে কাঁধে চড়ে—চড়ে গাছে গাছে।

( পথে জড়াজড়ি করে— )

( আহা মরি মরিরে— )

পাচন হাতে বাঁশীর সুরে হেলে দুগে নাচে ॥

চলতে পথে ছ'দিক হ'তে ফুলের মধু খায়।

( তারা মধু খেয়ে নাচে— )

( আহা মরি মরিরে— )

বাহতুলে নেচে কৃষ্ণ-নামের গুণ গায় ॥

কোন্ দেশেতে ছিল কাশু কোথায় বলরাম ।

( তারা নাচতে কেন এল—)

( আহা গরি মধিরে—)

হবি হরি প্রীতে বল বামকৃষ্ণ নাথ ॥

[ কিনারাম, ঈশান তুলী ও জগত্তাবণেব প্রবেশ ]

কিনা—কি দাদা, হোমাব বাড়িতে আবার মোচ্ছব কিসেব । কও  
নাইত কিছ ।

বেঙ্গু—মোচ্ছব কোথায়, এত সভার গান ।

ঈশান—এত বড নাচ-গান—কিসের সভা, একবার খোলসা কৈরা কও  
দেখি ।

বেঙ্গু—সেই কক্ষারেন্স—তপশিগী-কক্ষাবেঙ্গ—।

ঈশান—তাই কও ; আমরা ত একেবারে ভ্যাবাচ্যাকা থাইয়া গেছিলাম ।

বেঙ্গু—দেশ-বিদেশের মানুষ-আসবে, সেই জন্তেই ত কয়েকদিন  
একটু চটা করাই । যাবে এখন কেট্ট, তিনকডি, মাইনকা,  
উপিন—এখন যাব যার বাড়ি যা—কাল আবার অসিস্ সকালে ।  
( বালকগণের প্রস্থান ) বস সবাই—এই বেঞ্চিতে বস ।

কিনা—হোগলা ছাইড়া যে আবাব বেঞ্চি ধরছ ভায়া, ব্যাপাব কি ?

ঈশান—তা গোডলগিবি কবতে হইলে একটু বেঞ্চির—দবকার বই কি ।

জগৎ—কিন্তু ভায়া বস, বিশেষ পরামিশ্ আছে । এই যে ভদোর  
লোকেরা সব চৈলা যাইতেছে, আমরাও তাদের পিছে লাগি ;  
শেষ পদন্ত নিজেদের অবস্থাটা গিয়া যে কি দাঁড়াইবে সেটা  
একবার ভাবছ ?

বেঙ্গু—ভদোর লোকেরা চৈলা গেলে আমরাও বাইচা বাই ।

জগৎ—তাই কি একটা কথা হইল ? কি কও কিনারাম ভাই ?

হাজার হোক, একটা বড় ব্রেকের আবডালে আছি। এ সব  
সৈরা গেলে নিজেরা যে পিপড়ার সামিল হইয়া যামু!

বেঙ্গু—সেইটা দাদা আগাগোড়া ভুল বললা! দিনে রাত্তিরে গায়ের  
সব রক্ত শুইষা খাইছে এই ভদোর লোকরা—এথ ?

জগৎ—তবু ত তারা হিন্দু।

বেঙ্গু—ঐ সব হিন্দু-মোছলমান রাখ দাদা। নিজে বাচলে ধম্ম। ঐ  
চম্মচোষারগো জালায় দুইমুঠা ভাত কেউ খাইছ স্নেহে? একখানা  
কাপড় দিতে পারছ পরণে?

জগৎ—কিন্তু সব্বাই যে বিষ্টুরায়ের পিছে লাগতে চাও—তার ভাত না  
আছে কার পেটে?

বেঙ্গু—থাকুক গিয়া ভাত। আমাদের মুখের ভাত কাইড়া নিয়া আবার  
দয়াঘেন্না কৈরা এক মুঠ ভাত ভিক্ষা দিছে—কুকুর-বিড়ালরে  
যেমন দেয়—তেমনি কৈরা।

জগৎ—এ-কথা কি আর ধম্মত বললা দাদা?

বেঙ্গু—ধম্মত না ত কি? এখন যে সব ভদোর লোকের এত ভাই  
ভাই—গলায় গলায় খাতির—পাঁচ-দশ বছর আগে এ-সব ছিল  
কোথায়? তখন ত শালার ব্যাটা টাড়াল ছাড়া কেউ কথাই  
কইত না।

ঈশান—আরে দাদা, সে কথাই যদি বললা, তবে শোন একটা দুঃখের  
কাহিনী। বছর তিনেক আগের কথা। লক্ষ্মী পূজার বাজাইতে  
গেছি রায়দের বাড়ি। ঘরের মধ্যে পূজা হয়—আমি বারান্দায়  
বসা। পূজার শেষে পুরুতঠাকুর লক্ষ্মী-নারায়ণ লইয়া বাইর  
হইবেন—বারান্দায় পা দিতে সব্বাই একসঙ্গে খিচা'য়া শুঠল—  
ওরে ঢুলী, নাম—শীগ্গির নাম; আমি ভাই একটু চক্ষু বুইলা

ঝিমাইতেছিলাম,—চ্যাচানিৰ চোটে ঢোলটা লইয়া একেবারে  
হুমড়ি ধাইয়া পড়লাম বারান্দাথিকা উঠানে। চোট লাগল  
মাজায়, আইল রস—এখনও জোয়ে জোয়ে টেব পাই তার  
কনকনানি।

বেঙ্গু—তবেইত দেখ।

ঈশান—হুঃখের আরো আছে দাদা, সেই যে উঠানে পড়লাম, বারান্দায়  
আবার টইঠা দেখি, আমার পিড়িব পাশে শুইয়া আছে কতাদের  
কুড়াটা, কই তাবে ত কেউ তাডাইল নাই—সে ত শোয়াই রইল!

বেঙ্গু—তবেই এখন বোঝ জগন্তারণ। আমরা কি কুকুরেরো অধম  
হইয়া ভদ্রাব লোকের পাও চাটুতে বাস করুম?

কিনা—মনের চাপা হুঃখ যদি বলতে শুরুই কবলা দাদা, তবে আমিও  
কিছু বলি। এই কিছুদিন আগে। বসা আজি রায়দের  
আটচালা ঘরে, কথা বলছি নায়েব মশাইর সঙ্গে। খানিক ক্ষণ  
বাদে দেখি সেই ভুলু কায়েতের বিধবা বৃইন, দাঁড়া'য়া আছে  
আটচালার বাটরে ভরা কলসী কাঁধে। দেখতেই নায়েব-মুহুরী  
আমারে বলল, এই রে কিনারাম, একটু নাইমা খাড়া, বাড়িব  
খাবার জল লইয়া যাইবে। কেনরে দাদা, আমরা বন্ধনের তলে  
ধাকলেই কি জল মার যায়?

[ বিপিন ঠাকুরের প্রবেশ ]

ঈশান—পেন্নাম ঠাকুর মশাই।

বেঙ্গু—একি, মাথা যে একেবারে শ্যাড়া দেখতেছি ঠাকুর মশাই, ব্যাপার  
কি?

বিপিন—ব্যাপার আর কি, বুড়া কালে আর কি কাজ একবোঝা  
হুলে!

বেঙ্গু—উহঁ—ঠিক ত সেই কথাই মনে হইতেছে না। উয়াবাই  
কানাকানি শুনছিলাম একটা কথা, তাই সত্য নাকি ?

বিপিন—কি কথা ?

বেঙ্গু—পেরাচিত্তির করা হইছে নাকি ?

ঈশান—তাত হইতেই পারে ; বড়াকালের পেরাচিত্তির—

বেঙ্গু—বড়াকালের পেরাচিত্তির না রে দাদা, এ বেঙ্গু কুলুর বাড়ি মনসা  
পূজা করাবার পেরাচিত্তির। ঠিক কিনা সত্য কথা কন দেখি  
ঠাকুর।

বিপিন—তাতে এত চটাচটি কিমের ?

বেঙ্গু—চটাচটি ককম না ? আবার মিষ্টি মিষ্টি কথা ? নৈবিছের চাউল  
খাইয়া ত গুণী শুদ্ধা দাইচা গেলেন, এখন আবার পেরাচিত্তির !  
চিনছি আপনারগো সব ঠাকুর-ঠাকুর, পথ দেখেন অম্ম দিকে।  
আইজ আবার আসছেন ত ধার-উদ্ধারের আশায় ? কিছু  
মেলবে না ! কুলুর চাউল খাইলে জাইত যায় না ?

[ বিপিন ঠাকুরের প্রশ্নান ]

কেমন, দেপলাত ব্যাপারটা। উপাসে উপাসে চনাচনি ;  
চাউল চাইতে আসছিল একদিন। কইলাম, ঠাকুর  
তুমি চাউল ধার নেবা, আবার শোধ দেবা কেমনে ?  
তার চাইতে আমার মনসা পূজাটা করাইয়া যাও—চাউল পাবা  
পাঁচ সের। তারই এই পেরাচিত্তির !

ঈশান—এইতেই মরবে দেখবা মর।

বেঙ্গু—এরপরে তাই রাখ তোমার হিন্দু-মোছলমান। এমন হিন্দুর  
ধার ধারে না বেঙ্গু কুলু। দেখি এবার একবার বার্ডনের  
চোট।

জগৎ—সে সব না হয় বোঝালাম কুলু ভাই, কিছু আইজদি যে প্রস্তাব করে সে সম্বন্ধে কি মত কও।

[ মোস্তাজ, এক্রাম ও গোপালের প্রবেশ ]

বেঙ্গু—এই যে মেঞারা—ঠিক সময়েই আইসা পডছ, আইস—বস গোপাল মেঞা।

মোস্তাজ— এখন আব গোপাল মেঞায় চলবে না কুলু।

বেঙ্গু—কেন ?

মোস্তাজ—নিযুধ হইয়া গেছে—হিন্দু নাম আব মোছলমানের চলবে না।

বেঙ্গু—কেন, মোছলমানের নাম ত হিন্দুব চলে এখনও। সুরেন পিপ্লাইর মাইঘার নাম বাথছে দেখি নুবজাহান।

মোস্তাজ—তা চলুক, আগাদের সমাজে আর চলবে না।

বেঙ্গু—এখন তবে ডাকি কি নামে ?

মোস্তাজ—নোতুন নাম হইয়া গেছে সমসের গাজি।

বেঙ্গু—দূর মেঞা—নুব নাই কিছু নাই—আবার গাজি।

মোস্তাজ—নুব ত রাখতেই হইবে—নইলে ত সোমাজে চলবে না।

গোপাল—রাগ মেঞা তোমার সোমাজ। ছোটকালেখন বাজানে নাম দিল গোপাল, এখন বুড়া বয়সে আবার কোন্ গাজি ?

জগৎ—যাক্, এখন কাজের কথা কও। আইজদির মতলব বোঝ কি ?

মোস্তাজ—মতলব-টতলব কি, খানায়ও খবর গেছে।

জগৎ—ক্যান্, ক্যান্ ? ঐ বাঞ্জারামের বউ লইয়া ?

মোস্তাজ—আর কি ? ঐ ঘটনার আইজদির ত একেবারে হাতে স্বগ্গ।

জগৎ—ব্যাপারটা আইজদি শেষ পধ্যস্তে কিভাবে দাঁড়া করাইল কও দেখি।



মোস্তাজ—ব্যাপারটা অতি সোজা। নন্দরায় গেছিল বাহারামের বউ ফুললাইতে।

জগৎ—এসব কথার কি বর্ণ-বিসর্গগু সত্য মেত্রা ?

মোস্তাজ—ব্যাপারটা বোঝা না? এটা হইল আইজদির পুলিশ ডাকবার ছুতা।

জগৎ—এখন আইজদির আসল প্রস্তাবের কথা ভাব।

মোস্তাজ—ভাবলাম কথাটা অনেক; কিন্তু সাচা কইলে, মন উঠছে না। এত বড় একটা মিথ্যা কথা—একি ধম্মে সড়বে।

বেঙ্গু—একেবারে মিছা কথাই বা বল কেন? নন্দরায়ের সঙ্গে আইজদিরই ত প্রথম কথা হইল—এগার শ' টাকা কাণি দরে সব জমাজমি কিনা নিবে আইজদি।

মোস্তাজ—কিন্তু এখন যে আইজদির এক পয়সাও না দেবার মতলব।

বেঙ্গু—জমাজমি হাত হইয়া গেলে সে আর নিজেই সব খাইবে না, সকলেই কিছু কিছু তার ভাগ পাবা।

গোপাল—সে বিষয়ে আমার সন্দেহ আছে। এসব কথায় তোমরা বিশ্বাস কর দাদা, আগরা করি না। ধান পাট বেইচ্যা হাজার হাজার টাকা পাইছে এবারে—কাউরে দিছে কখনো হাং পয়সা? এখনো তার গোলাভরা ধান, কিন্তু দাদা আমারগো যে অস্থিচন্ম সার হইল,—চাইরটি ভাতের অভাবে আড়শী পড়শী যে আমরা সব মইরা যাই! এক সের চাউল কখনো ধার দিছে কাউরে, না এক পয়সা কম দরে ধান বেচে আমাদের কাছে? গরিবের শত্রুর সব সমান,—এর মধ্যে আর হিন্দু-মোছলমান নাই।

গোপাল—সে কথা একশত বার। আইজদির ভূঁই নিড়াইতে এবারে

আমাদের বদলা নিচে দশ আনা হিসাবে, নাস্তা দেবার কথা ছিল, কাইজ্ঞ কালে তাও অস্বীকার !

বেঙ্গু—কিছু উপস্থিত এখন কি বুদ্ধি করবা তাই কও।

মোস্তাজ—সেই কথাই ভাবলাম কুলু ভাই। জায়গা-জমি আইজ্ঞদ্বিয় হাতে আসে আসুক, কিন্তু তাব যোগসাজ্জে এমন একটা মিছা কথা দিন ছুপুরে কি কৈরা কই ? নীচে কাচা বাচ্চার ঘর—উপুরে একটা খোদাতাল্লা।

বেঙ্গু—মিছা কথাটা কি হইল মেঞা ?

মোস্তাজ—মিছা বৈলা মিছা—একবারে চাবি-চৌকি মিছা। পটল ভাস্কারেব বুদ্ধি নিছে আইজ্ঞদি। সে এখন আর নগদ টাকায় জমি রাগতে স্বীকার যায় না ! নন্দবায় চায় নগদ টাকা, তার বুদ্ধি বিজ্ঞাশে গিয়া নোতুন বাড়ি-ঘর করবাব। সে তাই লাল-চরের মেঞাদের ডাকাইছে, তাবগো কাছে হাজার টাকা কাণি দরেই জমি বিক্রি কৈবা যা পারে টাকা লইয়া যাইবে।

এক্রাম—এতে নন্দবায়েরই বা দোষ কি ?

মোস্তাজ—আইজ্ঞদিব কাছে এখন নন্দবায় আর কিছুতেই জমি বেচবে না—নগদ টাকাতেও না, বেশী টাকাতেও না। হাজার হোক, তালুকদারের বক্ত ত, জেদ যাইবে কোথায় ?

বেঙ্গু—রাখ তোমার তালুকদারি। ঢাল নাই, তবোয়াল নাই—নিধুরাম সর্দার। এ ব্যাটারা বগ্গা ভাগে জমি চষল এই তিনপুরুষ, এখন তার হাতেখিকা ছো মাইবা জমি নিয়া যাইবে লাগচরের মেঞাবা ? এই একটা কথা হইল ?

মোস্তাজ—আইজ্ঞদিও আইজ্ঞ ছাডবে না শুনছি কোনো মতে।  
( ছুপে ছুপে ) সেই জন্তেই ত পুলিশে পর্বন্ত খবর গেছে।

আইজদির ফুফাত ভাই আছে খানার কোন দারোগা না জমদার।

গোপাল—এখন আমারগো সে কি করতে কয় ?

মোস্তাজ—এখন আইজদি কয়, বড় কত্বারে সে কইবে, নন্দরায় তার কাছে জমি বিক্রি ঠিক কৈরা বায়না নিছে নগদ পাঁচ শ' টাকা।  
আমারগো সকলরে সে সাক্ষী মানতে চায়।

জগৎ—সে ই বা কেমন কথা ? আমি ভাই তার মধ্যে নাই।

বেঙ্গু—না থাক তুমি মৈরা পড় ; আমি এর মধ্যে আছি। তবে অবশ্য একা জমি ভোগ-দখল করতে পারবে না কেউ—ভাগ দিতে হইবে সকলরে।

গোপাল—সে ব্যাপারে দাদা সন্দে অনেক। জমা-জমি দগলের কালে আমরা, মিথ্যা জোচ্চুরি, মাথা ফাটাফাটির কালেও আমরা ; তার পরে ভাগ-বাটরার কালে আমরা কিছু টেরও পামু না,—কার পেটের ভিতরে সব ঢোকবে সে আর বাইর করবার সাধ্য হইবে না !

মোস্তাজ—আমরা খালি কুলুর বলদ।

এক্রাম—এই বোঝা না দাদা, তোমার ঘানির গাছের আস্তা বলদ !

বেঙ্গু—মস্করা রাগ মেঞা। আইজদির উপরে তোমরাই বা এমন ক্যাপা কেন ?

গোপাল—তুমি যাই কও, লোকটি তেমন সুবিধার না।

জগৎ—হাতে নোটুন টাকা পড়ায় মাথা গেছে ঘুইরা। ওর এখন ইচ্ছা, দেখ-না-দেখ একটা বিষ্টুরায় হইয়া বসে। চাল-চলন কথা-বাতী এখন সবই সেই ধরণের।

কিনা—কথাটা যে একেবারে মিথ্যা তাও নয়। কিনারামের চক্ষু এড়ায়

না বাপ কিছুই । এবারে পৌষের তেহায়ে ওরে দেখছি আমি  
সিঁকেব লুঙ্গি পৈরা টেডি কাইট্যা জুয়ার আড্ডায়—একদিন না,  
দুইদিন না, পাঁচ-সাত দিন ।

মোস্তাজ—ঐ ত দাদা, তোমারগো শাস্তোর না আছে—লক্ষী চঞ্চলা ?  
এ ও তাই ।

[ অতিশয় ব্যস্তভাবে কাছেমের প্রবেশ ]

বেঙ্গু—কি গো প্যাঁদা, এত ব্যস্ত কিসেব ? খবর কি ?

কাছেম—আইজদি মেঞা ডাকল সকলরে একথুনি ।

বেঙ্গু—কোথায় ?

কাছেম—মেঞাব বাড়িতে ।

বেঙ্গু—কেন ?

কাছেম—জমাজমি লইয়া ভীষণ গোলমাল হইবে, পরামিশ আছে  
অনেক ।

বেঙ্গু—চল দেখি সকলে— দেখি কি ব্যাপাব হয় আবার ।

[ সকলের প্রস্থান ]

## পঞ্চম দৃশ্য

বিষ্ণুবাঘের ভিতর বাড়ি । বেলা দুপুরের কিছু বেশী ।

হরসুন্দরী ও দুর্গা ।

দুর্গা—আজকে তা-হ'লে যাওয়াটা স্থগিত রাখাই ভাল বোঠান ।

চারদিকেই ত কেবল বিপদ বাধাব খবর আসছে ।

হরসুন্দরী—ভাল-মন্দ কি ঠাকুরঝি, আজ আমি কিছুতেই যাব না ।

কত্না নাইতে গেছেন, খেয়ে উঠলেই কত্নাকে বলব, আজ কেউ

আমাকে খুন ক'রেও নিতে পারবে না । এত বাধা আমি পায়ে

ঠেলতে পারব না ।

[ ব্রজহবিব প্রবেশ ]

আসুন ঘোষাল মশাই আসুন । আপনার মেয়েকে সঙ্গে নিয়ে  
যাব বলে ত নিয়ে এসেছি, কিন্তু ঘোষাল মশাই, আমার  
সবচাতেই বিধাতা যদি আজ আর আমাদের যাওয়া হবে না  
কিছুতে ।

ব্রজ—সেইটেই ভাল, আমিও তাই বলতেই এলাম । দিনকাল বড়  
খাবাপ । চারদিকে এত গোলমাল বাধিয়ে —

হর—হ্যাঁ, একটু র'য়ে স'য়ে কাজ করাই ভাল । তবে দেখুন, স্তম্ভসীকে  
যখন নিয়ে এসেছি আমি—

ব্রজ—সে সব কথা আব তুলবেন না কিছু, সে সব কিছু আমি বলতেও  
আসি নি, শুনতেও আসি নি । আমি চলে যাচ্ছি কেন্দুপাড়া,  
একটু শনিব পাঁচালী আর সত্য-নারায়ণের শিবি আছে ।

ফিরতে রাত হবে ; তাই একবার দেখা ক'রে সঠিক খবরটা একটু নিয়ে গেলুম ; যাওয়া হবে না আজ তা বেশ বুঝতে পেরেছি, তবু বুঝলেন না, আপনার সঙ্গে কথাটা ব'লে—মনটা এখন একটু নিশ্চিত হ'ল। আচ্ছা আমি তা হ'লে আসি।

[ প্রস্থান ]

হর—তুইও বাঁড়ি যা ঠাকুরঝি ; আমি থাকতে তোর ভয় নেই, যেদিন যাব তোকেও নিয়ে যাব।

দুর্গা—সে সব কথাও বলতে হবে না বৌঠান, আমার তা জানা আছে।

[ নন্দের প্রবেশ ]

হর—নন্দ, একটা কথা শোন। তুই আমাকে পেটে ধরিস্ নি, আমি তোকে পেটে ধরেছি ; আমার একটা কথা তোকে আজ শুনতেই হবে।

নন্দ—আজ যাবে না তাই-ত ?

হর—হ্যাঁ, আজ আমি কিচ্ছুতে যাব না।

নন্দ—কিন্তু আমাকে ত আজ না গেলেই চলবে না।

হর—কেন, আর একটি দিনও তোর তর সহিছে না ?

নন্দ—আমি আর একটি দিনও ছাতিমপুরে থাকব না।

হর—তা হ'লে বাবা, রাগ করিস্ নি, তুই আজ চলে যা, আমরা দু'চার দিন পরে ব্যবস্থা ক'রে যাব।

নন্দ—( একটু ভাবিয়া ) আচ্ছা, তবে তাই হবে।

হর—কতটা বুঝি নেয়ে খেতে এলেন—একবার যাই দেখি।

[ হরসুন্দরী ও দুর্গার প্রস্থান। নন্দ ছোট্ট একটা চৌকির উপরে আস্ত ভাবে শুইয়া পড়িল। একটু পরে অতর্কিত প্রবেশ। ]

অতসী—ও কি, এ সময়ে শুয়ে পড়েছ যে ?

নন্দ—( উঠিয়া বসিয়া ) না এমনি। অতসী, এক কাজ কর। বাড়ির ভিতরে লোকজন যে থাকে তাকে দিয়ে আগার বাস-বিছানাটা পৃথক্ ক'রে ফেলতে বল দেখি নি।

অতসী—কেন ?

নন্দ—আজ আর কারোর যাওয়া হবে না ; শুধু আমি চলে যাচ্ছি।

অতসী—তার মানে ?

নন্দ--কেবল 'মানে' 'মানে' তোরা আর করিস্নি অতসী—  
কয়েকদিন পরে যাবি।

অতসী—এখন আর তা হয় না।

নন্দ—মা যে আজ কিছুতেই যেতে চাচ্ছেন না।

অতসী—সে কথাটা কি তুমি এতক্ষণে বুঝতে পারলে ? আমিত সকাল থেকেই সে-কথা বলছি,—তুমি ত তাতে একবারও কান দেওয়া দরকার মনে কর নি।

নন্দ—( ক্রুদ্ধিত করিয়া ) অতসী, ভাল ক'রে থাকলে করেছি, মন্দ ক'রে থাকলে করেছি, এখন আর তাই নিয়ে কারোর কোন কথা শুনতে ইচ্ছা করছে না।

অতসী—আমিও ত তা-ই বলছি, ভালই ক'রে থাক আর মন্দই ক'রে থাক, যা করার করেছ ; তবে এখন যেখানে এগিয়েছ, সেখান থেকে আর পেছনো যায় না।

নন্দ—তুই তা-ই বলে কি-করতে বলিস্ন ?

অতসী—আমি আজ যাব।

নন্দ—তুই কোথায় যাবি ?

অতসী—তোমার সঙ্গে, ক'লকাতায়।

নন্দ—তা কি ক'রে হয়? মা যে যাবেন না।

অতসী—( অগ্নি দিকে মুখ ফিরাইয়া দৃঢ় কণ্ঠে ) কেউ না যাক আমি যাব। ( অতসী কিছুক্ষণ চুপ করিয়া থাকিয়া চলিয়া গেল।  
নন্দ আবার হাতের উপরে মাথা রাখিয়া শুইয়া পড়িল।  
আবার হব-সুন্দবীর প্রবেশ। )

হর—তুই-ও তা হ'লে এইবারে স্নান ক'রে চারটি খা নন্দ।

নন্দ—( চিন্তাশ্রিত ভাবে )—যাই।

হর—যাই কি, ওঠ এইভাবে। অত ভাবিস্ না, মধুসূদন আছেন মাথার উপরে, তিনিই সব বাবস্থা করবেন।

নন্দ—( অগ্নিদিকে তাকাইয়া ) অতসী যে আজই যেতে চাচ্ছে মা!

হর—তা কি করে হয়?

নন্দ—তাকে তা হ'লে বোঝাও।

হর—(খানিকক্ষণ চুপ করিয়া ভাবিয়া ) হ্যাঁ, তাকে যখন আজই যাব ক'রে নিয়ে এসেছি,—এত ভাবনা আব ভাবতে পারি না নন্দ; কাজ নেই আর দো-মনায়, আজই যাব তা হ'লে সবাই—চল—আজই চল।

[ পট-পরিবর্তন ]



## ( দৃশ্যাস্তর )

বিকুরায়ের বৈঠকখানা। ছুখানা খাট এক সঙ্গে জড়ান, তাহার উপরে  
ফরাস বিছান, একটা তাকিয়ায় হেলান দিয়া বিকুরায় গড়গড়া  
টানিতেছে। মেছেরের প্রবেশ।

বিষ্ণু—কেরে মেছের নাকি ? আয় আয় ভিতরে আয়। তোর বউ-  
ছেলেকে একবার দেখতে যাব বলেছিলুম, বস।

মেছের—তারাও আসছে বাড়ির ভিতরে।

বিষ্ণু—একেবারে ছেলে-বউ নিয়েই এসেছিস ? বউমাকে কেন  
নিয়ে এলি ? আমাকে ডেকে নিলেইত হ'ত।

মেছের—বউই আসতে চাইল।

বিষ্ণু—তা বেশ বেশ, ভালই করেছিস ; এসেছিস ভালই হয়েছে।  
সকালে তোর মাথায় লাগে নি ত বেশী ? দেখি—না, অল্প  
একটু কেটে গেছিল,—কি বলিস ? অমন তোদের কতই যায়,  
না রে ?

মেছের—ষে।

বিষ্ণু—শোন, ষাবার দিনে আর হাঙ্গামা করলুম না। করিম চাচা  
এসে হাত জোড় ক'রে দাঁড়াল। তারপরে ব্যাপারটা চেপেই  
গেলুম। আজ ষাবার দিনে আর ইচ্ছা করল না কিছু।

মেছের—আর কি, যথেষ্ট হইছে।

বিষ্ণু—না রে, যথেষ্ট ঠিক হয় নি ; তবু দেখ, আজকে আর খোঁচাতে  
ইচ্ছা করল না।

মেছের—থাকুক সে সব কথা।

বিষ্ণু—ঠিকই বলেছি, আজকে থাক সে সব। তার চেয়ে চল আমার বউমার সঙ্গে, আমার দাদুভাইর সঙ্গে দু'টো কথা বলি।

মেহের—আইজ ত বউর সারাদিন চৌক্ফের পানি।

বিষ্ণু—কেন? কেন?

মেহের—আপনাদের যাবার খবর কানে গ্যাছে।

বিষ্ণু—( একটু কাল চুপ করিয়া থাকিয়া আবার শুক হাসি হাসিয়া )  
ক্ফেপেছি নাকি তোরা সব? কোথায় যাব আমি? কোন্ চুলোয়? নন্দটা বারবার বলছে, তাই একবার ক'দিনের জন্য একটু ঘুরে আসব ভাবছি। এই আবার ফিরে এলুম ব'লে।  
হয়ত শেষ পর্যন্ত—গেলুমই না। কিছু ঠিক নেই—

[ নন্দলালের প্রবেশ ]

নন্দ—বাবা, একটু বিশেষ দরকার ছিল।

বিষ্ণু—একখুনি?

নন্দ—একখুনি হ'লেই ভাল হয়, নইলে আর কখন হবে?

বিষ্ণু—( অনিচ্ছা সহকারে ) তা-হ'লে আয়। যা মেহের, বৌমাকে আর দাদুভাইকে নিয়ে বাড়ির ভিতরে থাক, আমি একটু পরে আসছি। [ মেহেরের প্রস্থান ]

নন্দ—লালচরের মিশ্রণ এমছে, তারা সব জমিজমা কিনবে। আদ্বেক টাকা বায়না-পত্রের সঙ্গে দিয়ে যাবে—বাকি টাকা পাকা লেখাপড়া হ'য়ে গেলে দেবে।

বিষ্ণু—এই সব কথা ভিতরে আজকে আর তুই আমাকে টানিস না বাবা। যেমন ব্যবস্থা করতে পারিস তাই কর, আমাকে আর বলিস নি কিছু! তুই নিজেও ত উকিল মানুষ, বুঝে বুঝে ব্যবস্থা কর।

নন্দ—আমারও আর ভাল লাগছে না বাবা ; তবে ওরা যে চায়,  
আপনার সামনে বসে সব কথা হবে। যখন এসেই পড়েছে,  
একবার ডাকতুম।

বিষ্ণু—( অনিচ্ছায় ) ত'বে তা-ই ডাক।

নন্দ—( বাহিরের দিকে ) এই যে মিঞা সাহেবরা, এদিকে আসুন।

[ লালচরের দুই মিঞার প্রবেশ ]

১ম—আদাব কত্তা আদাব।

২য়—কত্তার নাম শুনছি অনেক কাল, দেখা-সাক্ষাৎ আল্লাপ-পরিচয়  
নাই।

১ম—ছাতিমপুরের রায়—এক ডাকের নাম, না চেনে এমন লোক নাই।

নন্দ—এরা হাজার টাকা কানি দরে আমাদের খাসের বাইশ কানি জমি  
কিনতে চায়। কেমন মিঞা, তাইত ?

২য়—যে হয়।

বিষ্ণু—বেশ।

[ আইজদ্দি, মোস্তাজ, এক্রাম, গোপাল, কাচেম, বেঙ্গু-কুলু,  
কিনারাম, ঈশান ঢুলী প্রভৃতির প্রবেশ। ]

কিহে—সব দেখি এক সঙ্গে, ব্যাপারখানা আবার কি ?

আইজদ্দি—আইনাম আপনি যাবার আগে জায়গা-জমির একটা পাকা  
বন্দোবস্ত করতে।

বিষ্ণু—ঐ সব কাঁচা-পাকা কথায় আর কাজ নেই, নন্দের যখন ইচ্ছা  
জায়গা-জমি বিক্রি করেই যাবে, তাই সে যাক, আমি আর এতে  
বাধা দেব না।

আইজদ্দি—আমিও ত বিক্রির কথাই কইতেছি।

বিষ্ণু—সে ত এই লালচরের মিঞাদের সঙ্গেই ঠিক হয়ে গেল।

আইজদ্দি—লালচরের মিল্লা আবার আইল কোথিকা ? জমি কিছুম

আমি, কথা হইল আমার সঙ্গে—

নন্দ—তোমার সঙ্গে আবার কথা কিসের ? তুমি ত স্পষ্টই ব'লে দিবেছ, তোমার টাকা নেই—তুমি জমি কিনবে না। বিনি-পয়সায় জমি দপল করে খাবার বুদ্ধি, সে আমি টের পেয়েছি, সে আমি হ'তে দেব না।

আইজদ্দি—বিনা পয়সার কোনো কথা নয় ভূঁইয়া, এই নগদ টাকা নিয়া আসছি, নগদ টাকায় লেখাপড়ি কৈরা জমি নিমু।

নন্দ—কালকে এ বুদ্ধি কোথায় ছিল ? কালকে 'না' করলে কেন ?

আইজদ্দি—কে না করছে ? আমি ? কখন ? কার কাছে ?

নন্দ—কিরে কাছেম, তুই বলিস্ নি, আইজদ্দি বলেছে তার টাকা নেই, সে জমি কিনবে না ?

কাছেম—কই কত্না, আমি এ-কথা কইতে যামু কেন ?

নন্দ—এখন কিছুই স্মরণ হচ্ছে না ? তবে লালচরের মিল্লাদের ডাকতে গেছিলি কেন ?

কাছেম—আপনি হুকুম দিছেন, আমি কত্নার চাকর, তা মিল করছি।

নন্দ—তোমার পেটেও এত দুৰ্ব্বুদ্ধি ঢুকেছেরে কাছেম ? নেমক-হারাম—

আইজদ্দি—কথায় কথায় অত চক্ষু রাঙাইলে চলবে কেন কত্না ? এই নগদ টাকা, জমি আমার চাই। জমি পামু না, তাইলে আপনারে পাঁচ শ' টাকা বায়না দিলাম কিসের ? ওটা কি নজরানা ?

নন্দ—পাঁচ শ' টাকা বায়নার মানে ?

লালচরের প্রথম মিল্লা—এইবারে বোঝা গেছে মশাই ; আজকাল দেখছি সব জায়গায় ভদ্রদের লোকদের ঐ একতাল। এক জায়গায়

কথা হয়, বায়না নেয়, তাবপবে আবার অধিক লাভের আশায়  
অপরের কাছে জমি বিক্রি ।

২য়—কাজ নাই আব জমি কেনায় । আদাব মশাইবা, আদাব মেঞারা—  
এইবাবে বাড়ি চলি । চল মেঞা— চল—

[ উভায়র প্রশ্নান ]

বিষ্ণু—মাথাটা ঘুবছে,—চোখে আবছা দেখছি,—কিছুই বুঝতে পারছি  
না !

নন্দ—আপনি বুঝতে পাবছেন না বাবা, আমি বেশ বুঝতে পাবছি ।  
জমিজমা সব গায়েব জোরে দখল করবার ফন্দি ।

বিষ্ণু—দাঁড়া—এত বড় কথাটা এত চট ক'রে বুঝতে পারলুম না, ভাল  
ক'রে একটু বুঝতে দে । আইজুদি, আমার দিকে তাকা,—  
বল দেখি তুই জমি কিনতে নন্দের কাছে বায়নার টাকা  
দিয়েছিস ?

আইজুদি—না দিয়া কি মিথ্যা জুচ্চুরি করতে আসছি ?

বিষ্ণু—তুই বলছিস্ নন্দ, এক পয়সা ও তুই নিস নি আইজুদির কাছ  
থেকে—

নন্দ—আপনার কি সন্দেহ হচ্ছে ?

বিষ্ণু—না, সন্দেহ ঠিক নয়, তবে কিনা, কথাটা বড় গুরুতর দাঁড়াল ।  
হয় বিষ্টুরায়ের ছেলে নন্দবায় জোচ্চোব, নয় কবিম সর্দারের  
ছেলে আইজুদি জোচ্চোর । কে জোচ্চোর আমাকে আজ বের  
করতে হবে—বের করতেই হবে, ছাড়াছাড়ি নেই—।

আইজুদি—এই ত, এরা আমার সব সাকী আছে—জিজ্ঞাস কৈরা  
দেখলেই পারেন ।

বিষ্ণু—এত সাকী ! ঘরভরা সাকী ! বিষ্টুরায়ের ছেলে নন্দবায়

জোচোর—পাঁচ শ' টাকার জন্তু জোচোর—তাই প্রমাণ করতে এত সাক্ষী ! ঠিক বুঝতে পারছি না, মাথাটা কেমন এলোমেলো হ'য়ে যাচ্ছে । সাক্ষীর দরকার নেই—। আমি বুঝতে পেরেছি সব, আমি যেনে নিচ্ছি সব । নন্দ, এই চাবি নিয়ে যা, আমার বাক্স খুলে গুণে গুণে পাঁচ শ' টাকা একখুনি নিয়ে আসবি । কেউ কোন কথা বলতে পারবি নে, যা বলব তাই শুনবি—যা ।

আইজদ্দি—আমি টাকা ফেবৎ লইতে আসি নাই, জমি চাই ।

বিষ্ণু—জমি চাই ! তাই এত সাক্ষী ! মনেব কথা খুলে বলেছিস আইজদ্দি, জমি চাই । আজ ছাত্তিমপুব গ্রাম শ্মশান হ'য়ে গেছে—তাই সাক্ষী এসেছে মোস্তাজ, এক্রাম, বেঙ্গু, কিনারাম । আইজদ্দি,—তুই জমি পাবি না ।

আইজদ্দি—কেন ?

বিষ্ণু—আব কেন জিজ্ঞেস কবিস নি । এক কথা, পাবি না । টাকা দিলেও পাবি না । তোব পাঁচ শ' টাকা আমি একখুনি ফেলে দিচ্ছি, আমার ঘর-বাড়ি জমি-জমা ষাকে খুশি দিয়ে যাব—বিনি-পয়সায় লিখে দিয়ে যাব —

[ পটল ডাক্তারের প্রবেশ ]

পটল—কি গো রায় মশাই, এত চটাচটি কিসের ? ব্যাপার কি ?

বিষ্ণু—ব্যাপার ভয়ানক, ব্যাপার ভীষণ ! হয় বিষ্টুরায়ের ছেলে নন্দ মিথ্যাবাদী—জোচোর—নয় করিম চাচার ছেলে আইজদ্দি মিথ্যাবাদী জোচোর ।

পটল—কেন ? কি নিয়ে ?

বিষ্ণু—কি, নিয়ে ? তাত ঠিক এ গলা দিয়ে বেরোচ্ছে না ! আইজদ্দি

বলছে আমার জমি কিনতে নন্দের কাছে সে পাঁচশ' টাকা  
বায়না দিয়েছে—

পটল—তাত দিয়েইছে—আমার সামনে ব'সে দিয়েছে।

বিষ্ণু—তুমিও সাক্ষী? বেশ বেশ, —তুমিও দেখেছ?

পটল—দেখেছি বই কি—?

নন্দ—রাস্কেলকে আমি খুন করব— ( হঠাৎ আগাইয়া গিয়া পটল  
ডাক্তারের বুকে এক ঘুষি মারিল; পটল ডাক্তার 'মাগো' বলিয়া  
অজ্ঞানের মত পড়িয়া গেল। সকলে আগাইয়া পটলকে ধরিল। )

আইজদি—খুন—খুন—শীগ্গির পুলিশে খবর দে—

[ কাছেম দোড়াইয়া বাহির হইয়া গেল ]

নন্দ—খুন হ'লে আপদ যেত—ও আপদ মরবার নয়।

[ নন্দের বেগে বাড়ির ভিতরে প্রস্থান; কেহ বদনা হইতে  
পটল ডাক্তারের মাথায় জল দিতে লাগিল, কেহ কাপড়ের আঁচল  
দিয়া মাথায় হাওয়া করিতে লাগিল। ]

বিষ্ণু—( খানিকক্ষণ শুদ্ধ থাকিয়া ভিড় ঠেলিয়া পটল ডাক্তারের দিকে  
আগাইয়া ) দেখি দেখি—কি হয়েছে—

আইজদি—হইছে খুন, আর দেখতে হইবে না,—এই যে পুলিশ আইদা  
গেছে।

[ চৌকিদার ও কন্ঠবল সহ এক জন দারোগার প্রবেশ ]

বিষ্ণু—এঁয়া—এরই ভেতরে পুলিশ! এরই ভেতরে খুন, আর এরি  
ভেতরে পুলিশ! খাসা চাল চলেছিন্ আইজদি! এস—এস,—  
বাধ—হাতে কড়া লাগাও। বেশ বুঝতে পারছি, তোর চাকা  
ঘুরছে নারে আইজদি, ঐ আশমানের চাকা ঘুরছে! নইলে  
তোকে এখনও টিপে মেরে ফেলতে পারতুম—পিঁপড়ার মত

টিপে মারতে পারতুম ;—কিন্তু বুঝতে পেরেছি—তুই নস্—  
তুই নস্—তোব পিছনে রয়েছে বিধাতার চাকা ! আমার এ ঘর-  
বাড়ি সব আগুনে পুড়ে যাবে আমি জানি, আমি কোণে কোণে  
আগুন দেখতে পাচ্ছি, তোর আগুন নয়, আশমানের আগুন !  
ঠিক হয়েছে—বাধ—বাধ—

দারোগা—আপনাকে কেন ? আমরা আসামী চাই ।

বিষ্ণু—আসামী চাই ? ডেকে দিচ্ছি, দাঁড়াও । ( ভিতর-বাড়ির মুখী  
আগাইয়া ) নন্দ, ও নন্দ—একখুনি চ'লে আয় । নন্দ,  
ওরে নন্দ—

[ নন্দের প্রবেশ ]

এই যে দারোগা,—এই যে আসামী, বাধ, বাধ—

নন্দ—কে বাধবে আমাকে ?

বিষ্ণু—নন্দ—চুপ । আমি বলছি—আমি দেখেছি—এই আসামী—  
বাধ একে—বাধ—

[ কন্ঠবল নন্দকে বাধিতে আসিল । নন্দ বাধা দিল ]

নন্দ—সাবধান ! অগ্নি হাতকড়া ? কিসের অগ্নি হাতকড়া ?  
ওয়ারেন্ট কোথায় ?

দারোগা—খুনের অগ্নি অত ওয়ারেন্ট লাগে না মশাই,— ( কন্ঠবলের  
প্রতি ) বাধ—

[ কন্ঠবল জোর করিয়া নন্দের হাতে কড়া দিল ]

নন্দ—এ সব ছিব্লামো আপনি আপনার নিজের দায়িত্বে করছেন  
মশাই,—এর ফলের অগ্নি প্রস্তুত থাকবেন ।

দারোগা—অত ওকালতি চাল চালতে হবে না । ( কন্ঠবলের প্রতি )  
নিরে চল এইবার খানায় ।



[ নন্দকে লইয়া প্রস্থানোত্তম—সহসা করিম সর্দারের প্রবেশ।

করিম সর্দারকে দেখিয়া বিষ্ণুরায় মাথা নীচু করিয়া রহিল। ]

করিম—এসব কি? এত লোক কেন? পুলিশ কেন? হাতে কড়া  
কেন?

আইজদ্দি—আইজ এখানে আর আপনি কোন কথা কইতে পারবেন না  
বাজান—

করিম—কেন, কি হইল? ব্যাপার কি?

আইজদ্দি—নন্দরায় পটল ডাক্তারকে ঘুষি মাইরা খুন করছে।

করিম—ঘুষি মাইরা খুন করছে? দেখি—দেগি—(পটল ডাক্তারের  
কাছে গিয়া পটল ডাক্তারের হাত ধরিয়া টানিয়া) কি গো  
ডাক্তার, তোমার হঠাৎ কি হইল?

পটল—উ-হঁ-হঁ—

করিম—এই ত দিবিয়া গেয়ান আছে। একটি বার উইঠা খাড়াও দেখি  
দাদা—(হাত ধরিয়া দাঁড় করাইয়া দিল) এইত, দিবিয়া ত  
দাঁড়াইলা।

পটল—দিবিয়া দাঁড়ালুম কোথায়? মরেই গেছিলুম—বুকের উপরে এক  
ঘুষি!

করিম—একেবারেত মর নাই দেখি। এতে আবার পুলিশ আইল  
কোথাখনে? (দারোগার প্রতি) তোমরা দাদা কোথিকা  
আইসা জুটলা?

দারোগা—আমাদের আজকাল গ্রামে গ্রামে ঘুরবারই হুকুম।

করিম—কই, দেখি নাই ত শীগ্গিরও এদিকে! দেখি, চেনা চেনা  
মুখ লাগছে যেন, একটু ফর্সায় আস দেখি দারোগা। (নিরীক্ষণ  
করিয়া) লতিফ হালদারের পোলা না তুমি?

দাবোগা—হ্যা—।

করিম—দাবগগরি আবার কবে আরম্ভ কবলা ? তা বেশ । এইভাবে  
হাতেব কড়াটি খুইলা একটু সইয়া দাঁড়াও দেখি ।

আইজদি—তা হয় কেমনে বাজান ?

করিম—( সহসা সোজা হইয়া দাঁড়াইয়া ) আইজদি, তুই ভাবছস,  
আমি মইরা গেছি । হাতী মবলেও লাখ টাকা । এই ডানায়  
এখনো যা জোর আছে, তোবে ছিঁড়া টুকবা টুকবা করতে  
পারি । ছাড দারোগা ছাড,—আমি করিম সর্দার কইতেছি—  
ছাড । তোমার দারোগগিবি কববার অম্ম জায়গা দেখ—  
ছাতিমপুবে না , ছাতিমপুরেব দাবোগা এখনো বিষ্টুরায় আব  
করিম সর্দার । ছাড—( কন্ঠবল দাবোগার ইঞ্জিতে নন্দকে  
ছাডিয়া দিল, করিম সর্দারেব ইঞ্জিতে বিষ্ণুবার ও নন্দ ছাড়া  
সকলে বাহির হইয়া গেল—করিম সর্দার ছঁকাটিব খোঁজে  
এদিক ওদিক ঘুরিয়া )—এবাডির ছঁকা-কলকিই বা কি  
হইল ? একটু তামুকও খাইতে পারলাম না !

[ পট-পরিবর্তন ]

## তৃতীয় অঙ্ক

### প্রথম দৃশ্য

সন্ধ্যা রাত্রি । বিষ্ণুরায়ের বাড়ির ভিতরকার বড় ঘরের সম্মুখ । সমস্ত বাড়ি অন্ধকার,  
দুয়ার জানালা বন্ধ । সাদা-কালো-লাল রঙের একটা লম্বা আলখাল্লা গায়ে এক  
'গাজির ফকিরের' প্রবেশ । তাহার এক হাতে একটা নারিকেলের মালার  
করক, অগ্ৰহাতে লম্বা একখানা কালো বাঁকা লাঠি ; লাঠির মাথাঘ একটা  
পিতলের চাঁদ, মাঝখানে একটি ত্রিকোণ মূর্তি । সেই হাতেই  
একটা ধূসুচি হইতে ধূপের ধোঁওয়া উঠিতেছে ।

ফকির—মাগো—রায় বাড়ির লম্বী মাগো—কাণা-খোড়া গাজির ফকির  
—দুইটি ভিক্ষা চায় ।

### গান

আহা মুস্কিল আসান কর দয়াল সত্যপীর । (ধূয়া)  
লায়-লাল্লা-হিলাল্লা মন করিও স্মরণ ।  
বিফলে কাটিল তোমার মনুষ্য-জনম ॥  
সালাম দিও ইমানদারে আক্কেলে সব কাম ।  
মুস্কিলে পড়িলে লইও গাজিসাইবের নাম ॥  
গোদার রহিম দয়াল গাজি—দোয়ার অস্ত নাই ।  
গাজির দোয়ায় পুত্রুর কণ্ঠা—ধনদৌলত পাই ॥  
আশমানে প্রতাপ গাজির—গাজি জমিন পর ।  
গাজির রহমে জাগে দরিয়ায় চর ॥  
ওক্কে ওক্কে লইও আগার দয়াল গাজির নাম ।  
ধনে জনে দয়াল গাজি পুরাউক মনস্কাম ॥

মাগো—লক্ষ্মী মা, রায় বাড়ির লক্ষ্মীব হাতের পরখাই—চাইরটি  
ভিক্ষা পাই মা। (খানিকক্ষণ নীরব থাকিয়া) কই, কেউ  
দেখি কথা কয় না। গেল কই সব। রায় বাড়ির লক্ষ্মী মাগো—

গান

দেব ভজে স্বামী সেবে অতিথ রাখে ঘরে ।  
ধনে জনে পূর্ণ হয় লক্ষ্মী দেবীর বরে ॥  
দুঃখীরে না করে ঘেন্না, মানীরে দেয় মান ।  
প্রসন্ন হইয়া লক্ষ্মী তার ঘরে যান ॥  
কুকুর-মেকুর আইটা পায়—কাকের মুখে কুচি ।  
ইহলোকের পবলোকের দুঃখ ঘাইবে ঘুচি ॥  
দুয়ারে দাঁড়া'য়া যার ফকিরে পায় দান ।  
অটালন্ত হইয়া থাকে তার গোলার ধান ॥  
লক্ষ্মী ঘরের সোনারূপা—লক্ষ্মী চাউলের হাঁড়ি ।  
সবার চাইতে অধিক লক্ষ্মী হাস্যমুখী নারী ॥  
কাজালে করুণা কর—লক্ষ্মী দিউন বর ।  
ধনে জনে পূর্ণ হোক সোনালক্ষ্মীর ঘব ॥

মাগো লক্ষ্মী মা—কাজাল-খোড়া চাইরটি ভিক্ষা চায় মা—

[ কাছেমের প্রবেশ ]

কাছেম—আইজ আর এবাড়ি ভিক্ষা হইবে না ফকির, অশ্রু বাড়ি যাও ।

ফকির—ক্যান্—ক্যান্—

কাছেম—কতারা সব দেশ ছাইড়া গেছে ।

ফকির—কবে—কবে ?

কাছেম—এইত আইজ—সন্ধ্যার আগে ।

ফকির—আজ্ঞা ( দীর্ঘশ্বাস )—

কাছেম—ফাং ফাং দীর্ঘ নিঃশ্বাস ছাড়তে আরম্ভ করল। যে—

ফকির—না, যাই যাই—। আন্না— ( দীর্ঘ নিঃশ্বাস ছাড়িয়া প্রশ্বাস । )

### ( দৃশ্যান্তর )

পূর্ব দৃশ্যের কিছু পর । বিষ্ণুরায়ের ভিতর বাড়ি । বড়ঘরের ছয়ার খোলা ; একখানা ভাঙ্গা গোল চৌকিতে ছয়ারের বাহিরে বসে ভ্যাপা, অল্প পাশে বসিয়া বেত তোলাইতেছে স্ত্রীপা । এক পাশে একটা কেরোসিনের ডিবি জ্বলিতেছে ।

ভ্যাপা—কি শীতই আইজ পড়ছেরে দাদা, ছয়ার খুইলা বসনেরও আর সাধ্য নাই, ছয়ার বন্ধ কৈরা এ ঘম-পুরীতে বসতেও আইজ আর সাহস নাই । কি ঘুরকুটি অন্ধকার ! কে কইবে এইটা ছাতিম-পুরের বিষ্ণুরায়ের বাড়ি ? এ বাড়িতে কোনদিন মানুষ থাকত একথা কেউ আর ভাবতে পারে ? এ যেন ছাড়া ভূতের বাড়ি !

স্ত্রীপা—গেরামও হইল ভূতের গেরাম ! চাইর দণ্ড রাত্তির হয় নাই—  
এর মধ্যেই ঝাপ-দরজা দিয়া সব ঘরের মধ্যে চকু বুইজা  
টানটান !

[ পাশের একটা গাছে একটা পাখী পাখা ঝাপটাইল ]

ভ্যাপা—( শিহরিয়া উঠিয়া ) এইরে দাদা, আবার যেন কি ! পিলা  
চমকা'য়া মরুম নাকি আইজ ? কোন্ দেশী বেত তোলাইতে  
আরম্ভ করল ?

স্ত্রীপা—ত করতে কস্ কি তুই ?

ভ্যাপা—করতে কই কি,—ভয়তে যে মরি। খানিকক্ষণ পরে তুমিও

চৈলা যাবা; তারপর? আমার উপায়টি কি হইবে?

ম্মাপা—তুই রাজি হইতে গেলি ক্যান্ ভুঁইয়ার কাছে বাড়ি পরি দিতে?

ভ্যাপা—চটো ক্যান্ দাদা? আমি কি আর আগে এই সব বুঝছি?

আমিত জানতাম, বাইর বাড়িতে নাইব-মুছরি থাকবে—কাছেম

প্যাাদা থাকবে—আমি ভিতরে একখানা ঘরে শুইয়া থাকুম।

এখন দেখি সব শালারা পালাইছে। তুমি আসবার আগে

দাদা—এত বড় বাড়ি—সব বন্ধ—সব চুপচাপ! এমন ভূতের

বাড়ি আমি জন্মে দেখি নাই!

ম্মাপা—আইজ্ঞ ত তুই থাক ভ্যাপা, তারপরে কাইল দেখা যাইবে।

ভ্যাপা—( অস্থানের স্বরে ) তোমার হাতে-পায় ধরি দাদা, আইজ্ঞের

রাস্তিরটা তুমিও থাক এখানে। ( বাহিরের দিকে তাকাইয়া )

ওসব কালা কালা আবার কি? অনেক যে দেখতেছি! কে—

কে? [ অন্ধকারের ভিতরে কাছেম পিয়াদা ও আরও অনেকের

প্রবেশ ]

কাছেম—ভয় নাই দাদু, আমি কাছেম প্যাাদা।

ভ্যাপা—এতক্ষণ কোথায় ছিলি মেঞা? এ সব কি হইতেছে বল দেখি।

তোমার নায়েব-মুছরিও সব আগেই পালাইছে, তুমিও ত

ভেড়তেছ না! ব্যাপারটা কি বল দেখি।

কাছেম—চটো কেন ভ্যাপা দাদু, আমি একখুনি আসতেছি। দেখছ ত

সারাটা দিন কি ঘোরাঘুরি আর কামেলা!

ম্মাপা—তোমার সঙ্গে ও সব কারা?

কাছেম—আছে অনেকে। আমি একটি বার দাদু বাড়ি যাই, দুইটি

মুখে দিয়াই আসতেছি।

ভ্যাপা—তোমার কথায় আমার পেত্য' নাই প্যাঁদা, বাড়িভরা খাট-পালক, বাসন-কোসন, জিনিস-পত্তর, একা একা এসব আগলাইতে পারুম না আমি। তুমি যদি একদণ্ডের বেশী দেবী কর ত এই সব ঘর-দুয়ার খোলা রাইখাই আমরা পালামু।

কাছেম—এক দণ্ডও লাগবে না,—আমি এই গেলাম আর আইলাম।

[ কাছেম প্রভৃতির প্রস্থান। ]

ভ্যাপা—ব্যাপারটা দাদা বোঝাতে পারতেছ কিছু? কাছেম প্যাঁদার সঙ্গে এত লোক-জন ঘোরতেছে কেন?

শ্যাপা—ব্যাপারটা কিছুই ত বোঝলাম না।

ভ্যাপা—তুমি আসবার আগে দাদা চারিদিকে কেমন পুটপাট্, ফুম্ফাম্ শব্দ শোনতে পাইতেছিলাম—কেমন যেন পায়ে শব্দ—শলা-পরামিশ। আমার কেমন ভয় লাগে দাদা। এত বড় বাড়ি—এতগুলো ঘর—এত জিনিস-পত্তর!

[ ব্রজহরির প্রবেশ ]

ব্রজ—কিরে শ্যাপা, এ বাড়ির ব্যাপার কিরে? সব বাড়ি যে অন্ধকার, লোক-জনের টের পাচ্ছি নে যে কিছু?

শ্যাপা—জানেন না ঠাকুর গোসাঁই—কত্তারা যে আইজ বাড়ি ছাইড়া চৈলা গেছেন?

ব্রজ—বলিস্ কিরে শ্যাপা?

শ্যাপা—আপনি গেরামে ছিলেন না? কত দেখি হৈ চৈ তোলাপাড়।

ব্রজ—আমিত জানি না কিছু। আমার মেয়ের খবর জানিস্ কিছু?

ভ্যাপা—তিনিও গেছেন,—তানারেও ত নায়ে উঠতে দেখলাম।

ব্রজ—অতসীও গেছে?

ভ্যাপা—হয়, গেছেন তিনিও । নাও-মাছুষ লইয়া ঘাটে গিয়া যা গোলমাল!

ব্রজ—কি গোলমাল ?

ভ্যাপা—ভূঁইয়ারা যোগাড় করলেন নমো মাঝি, মেঞারা দিল আবার  
বাঁধা !

ব্রজ—তবুও সব গেল ?

ভ্যাপা—যাইবে না ? নন্দ ভূঁইয়ায় আরম্ভ করল পাগলের মতন !

ব্রজ—সব পাগলই হ'য়ে গেছে—পাগলই হয়েছে । আমাকেও ভীম-  
রতিতে ধরেছে—নইলে আগিই বা কেন দিতে গেলুম অত বড়  
মেয়েটা । তা আমাকে একটু খবর না দিয়েই চলে গেল !

ভ্যাপা—যেভাবে গেছেন সব, যেন একটা ছড়াছড়ি পাড়াপাড়ি ! এর  
মধ্যে আর কে দেয় কারে খবর ।

ব্রজ—কম পথ ত নয়, ইষ্টিমার ষ্টেশনও ত কমসে কম আট মাইল পথ ।  
গাঙের পথ—অন্ধকার রাত্তির—তাতে আবার চারদিকে  
গোলযোগ ।

ভ্যাপা—চিন্তারই ত কথা ।

ব্রজ—শ্রীলোকের বুদ্ধি নিয়ে এবার আগিও পাগল হব । ( যাইতে  
যাইতে ফিরিয়া আসিয়া ) হ্যাঁরে চণ্ডীমণ্ডপের পিছন দিয়ে অত  
লোকজন কারা গেল রে ?

ভ্যাপা—গেল ত কাছেম প্যাঁদা—

ব্রজ—সঙ্গে আর সব কারা ?

ভ্যাপা—অন্ধকারে ত দেখতে পাইলাম না সব ।

ব্রজ—কাড়ির ভিতর থেকেই বেরোচ্ছিল, আমাকে দেখেই আবার মোড়  
ঘুরে ছাঁচ দিয়ে চলে গেল । ব্যাপারটা ত আগিও বুঝতে  
পারলুম না রে ।



ভ্যাপা—ব্যাপারটা ত আমরাও বুঝতে পারলাম না।

ব্রজ—মহাচিন্তায়ই পড়লুম! [ প্রস্থান ]

ভ্যাপা—চল দাদা বাড়ি যাই, এ বাড়ি পাহারায় কাজ নাই।

শ্যাপা—নাহে ভ্যাপা, বুড়া কতী যখন নিজে কাঁধের উপর হাত দু'খানি দিয়া বৈলা গেলেন তখন ব্যবস্থা একটা করতেই হইবে। তুই একটু বস,—আমি একবার বাড়িতে বৈলা আসি; আমিও থাকুম এখানেই।

ভ্যাপা—অত গজ-গমনে যাবা না দাদা, একটু রাগ পায় যাবা—আবার তাড়াতাড়ি আসবা। ( শ্যাপার প্রস্থান ) আবার কাল-কাল দেখায় নাকি কিছু? ( কেরোসিনের ডিবিটা বাহিরে ধরিয়া দেখিবার চেষ্টা করিল, একটা দমকা হাওয়ায় বাতিটা নিভিয়া গেল; ভ্যাপা ক্রন্দনের সুরে ) ও দাদা—তুমি ফের।

( নেপথ্যে শ্যাপা )—কিরে ভ্যাপা—আবার কি?

ভ্যাপা—অন্ধকারে মরুম দাদা?

শ্যাপা—কেন, বাতি জ্বালা'য়া রাখলাম যে?

ভ্যাপা—তুমি জ্বালা'য়া রাখলা, কে যেন আবার নিভা'য়া রাখল। কাজ নাই বাড়ি যাওনে, তুমি ফের দাদা।

[ দৌড়াইতে দৌড়াইতে শ্যাপার প্রবেশ ]

শ্যাপা—এরে ভ্যাপা, চুপ চুপ—একেবারে চুপ—

ভ্যাপা—( ভয় পাইয়া ) কেন—কেন দাদা? ব্যাপার কি?

শ্যাপা—আগে চুপ লক্ষীছাড়া, নইলে মরবি।

ভ্যাপা—আমার যে বুকটা ধরফর করে দাদা, ব্যাপার কি?

শ্যাপা—ব্যাপার ভীষণরে ভ্যাপা—বাড়ির সামনের দিকে দেখি একদল লোক—হাতে লেজা লাঠি—

ভাষা—( শ্রীপাকে জড়াইয়া ) তবে রে দাদা ?

শ্রীপা—হতভাগা চূপ চূপ—।

ভাষা—এই দিকেই আসতেছে নাকি ?

শ্রীপা—চল ভাষা শীগ্গির বাড়ি চল—

ভাষা—কোন্ পথে যাবা দাদা, কোন্ পথে ?

শ্রীপা—চল এই পিছনের পথ দিয়া— [ বেগে প্রশ্বাস ]

[ পট-পরিবর্তন ]

### দ্বিতীয় দৃশ্য

রাত সাড়ে আটটা। অন্ধকার কুরাসা। খালপাড়ের একটা ঘাটলা। ঘাটলায়

বসা বিষ্ণুরায়, এক পাশে নন্দ, এক পাশে অতসী। অতসী হাতের

আঙ্গুল দিয়া বিষ্ণুরায়ের মাথার চুলগুলি নাড়িয়া দিতেছে।

পাশে একটা হারিকেনের বাতি জলিতেছে।

বিষ্ণু—( আধবোজা চোখে ) এমন ক'রে চুলগুলোর ভেতরে

হাত চালালে আমি কিন্তু ঘুমিয়ে পড়ব অতসী।

অতসী—ভালই ত, একটু ঘুমোন না।

বিষ্ণু—( সচকিতভাবে চোখ মেলিয়া ) নারে অতসী, না নন্দ, এখানে

এমন ক'রে আর ব'সে থাকব না; তোদের শীতে কষ্ট হচ্ছে,

ঠাণ্ডা লেগে যাবে। চল নৌকাতেই এখন আবার উঠি—

আমি ঠিক হ'য়ে গেছি।

অতসী—আর একটু বসুন, আমাদের কিছু হবে না।

বিষ্ণু—তা—হ্যাঁ, পাড়ে উঠে আমার কিছু লাগছে বেশ। শীতে

তোদের একটু কষ্ট হচ্ছে,—আমার কিছু লাগছিল বেশ! এই

নৌকোর ভেতরে কেমন যেন খাসটা বন্ধ হয়ে যাচ্ছিল, মাথাটা ঘুবছিল—সমস্ত শরীরটা কেমন আনচান করছিল। ভাগ্যে ঘাট দেখে জোরা পাড়ে তুললি—নইলে যেন গরেই যাচ্ছিলুম।

অতসী—আর একটু তাহ'লে বসুন, আরও স্নস্ন হবেন।

বিষ্ণু—আজই যে হঠাৎ অস্নস্ন হয়ে পড়েছি তা নয়রে কিন্তু অতসী ; আমার দেখেছি বরাবরই এমনটা হয়। এক একজনের থাকে তাই,—নৌকাপথ সামলাতে পারে না ; • আমিও ঠিক তাই। এ নোতুন কিছু নয়—আজকে হঠাৎ কিছু নয়। নন্দ, রাত কটা বাজল বলতে পারিন ?

নন্দ—( হাতের ঘড়ি দেখিয়া ) সাড়ে আটটা।

বিষ্ণু—গোটে! গোটে সাড়ে আটটা! সেই কখন নৌকায় উঠেছি, চলছিট চলছি—সেই কখন থেকে চলছি, এখনও মোটে রাত সাড়ে আটটা? চাবদিকে যে সব একেবারে চুপচাপ! তা হবে—তা হবে,—শীতের রাত—তা হবে!

( নেপথ্যে অনতিদূর হইতে মাঝি )—বাবু, আর কত দেবী করবেন ?  
এর পরে যে আরও উজান!

নন্দ—অত উতলা হ'লে চলবে কেন, একটু সবুজ স।

মাঝি—( নেপথ্যে ) আমাদের যে দুই কেয়ায় নষ্ট করতেছেন।

নন্দ—দু' কেয়ায় নষ্ট করলে দু' কেয়ারই ভাড়া দেব, তার জগে তুই অত চেঁচাস কেন ?

মাঝি—( নেপথ্যে ) চেঁচাই বাবু শীতে।

বিষ্ণু—নারে নন্দ চল, এদের শীতে কষ্ট হচ্ছে—।

নন্দ—কষ্ট হ'লে ভাড়া না হয় দু'বাবের দেব।

বিষ্ণু—দু'বাবের ভাড়া কেন দিতে মাঝি ? শোন নন্দ, এখন আর অত

চটপট্ টাক্কা খরচ করিস নি, র'য়ে স'য়ে টাকা খরচ করতে হবে। ভেবে দেখলুম নন্দ, আবার ত নোতুন ক'রে গিয়ে জায়গা-জমি কিনতে হবে, ঘর-বাড়ি বাঁধতে হবে। এখন থেকেই তুই একটু হিসেব মতন চল।

নন্দ—অত ভাবনা এখন আর আপনাকে ভাবতে হবে না।

বিষ্ণু—তা আর ভাবতে যাব কেন? এতদিন ব'সে ভেবেছি, অনেক ভেবেছি। এখন তুই বড় হয়েছিস—এখন আবার অত ভাবনা চিন্তার ধার ধারতে যাব কেন? দেখলুম ভালই করেছি নন্দ, এসে ভালই করেছি; শরীর মন এখন বেশ কেমন হালকা লাগছে। আগে ভাবতুম ছেড়ে আসতে খুব বুদ্ধি কষ্ট হবে। কই না,—এখন ত দেখছি, খুব ত কষ্ট হচ্ছে না। ভালই ত লাগছে।

নন্দ—যা কষ্ট লাগছে ও বিদেশে কিছুদিন গিয়ে থাকলেই আবার ভুলে যাবেন।

বিষ্ণু—ভুলে যেতে হবে না; এমনিতেই ঠিক আছি। নৌকোয় একটু কষ্ট হয়—নইলে ঠিক আছি। অত পাগল আমি নই; ভালমন্দ কি আর বুঝতে পারি না? এসেই ভাল হয়েছে, তা এখন বেশ বুঝতে পারছি। আগেও বুঝতে পারতুম; তবে কি জানিস্ নন্দ? —না, কিছু না কিছু না। শোন নন্দ, অনেক কথাই এর ভেতর আবার ভেবে ফেলেছি। (খানিকটা যেন উৎসাহের সঙ্গে) এবারে গিয়ে যে নোতুন বাড়ি করব তা কিন্তু বাবা আর একেবারে অজ-পাড়াগাঁয়ে নয়। ঠিক শহর না হলেও অন্ততঃ শহরের কাছে। কি বলিস অতসী? (অতসী নিরুত্তর) কথা বলছিস্ না যে—

অন্তর্গী—ই্যা।

বিষ্ণু—মেটা কেন বলছি তার কারণটা ত জিজ্ঞেস করলি নে! শোন, পাড়াগাঁয়ে ভাল ডাক্তারের বড় অভাব। ঐ সেই পটলডাক্তার আর দিল্লু কবরেজ! একটা অস্থখে বিস্থখে কি যে বিভ্রাটে পড়তে হয়! তোর মনে নেই নন্দ, তোর ছেলেবেলায় একবার হঠাৎ হ'ল নিমোনিয়া, ভাল ডাক্তার আর পাই-ই না; শেষে শহর থেকে গিয়ে ডাক্তার আনতে হ'ল দিন একশ' টাকা ভিজিটে, তাও কি কেউ আসতে চায়!

নন্দ—সে সব পরে হবে; আগে ত গিয়ে পৌঁছে একটু স্থির হ'য়ে নি।

বিষ্ণু-- পরে নয়রে নন্দ, আগের কথা আগেই ভাবতে হয়। তুই ভাবতে শিখেছিস্ বেশ, বুঝিসও বেশ! কেন পারবি নে? এত লেখা-পড়া শিখলি—এত দেশ-বিদেশ করলি—তোদের চোখ ফুটে গেছে। আমাদের দেখ এখনও আছে—ঐযে তুই সকাল বেলা বলেছিলি—ঠিকই বলেছিলি—আমাদের একটু পাগলামি আছে! ও সেরে যাবে নন্দ—ক'দিনেই সেরে যাবে।

অন্তর্গী—এখন একটু চুপ করে বসুন।

বিষ্ণু—না, চুপ ক'রে নয়, একটু কথা বলি,—তাতে বেশ ভাল লাগছে। শরীর মন অনেকটা হালকা লাগছে কি না, তাই একটু কথা বলতেও ভাল লাগছে। তোর কাছে মন খুলে বলছি নন্দ, এখন ভালই লাগছে। হাজার মণ ভার যেন পিঠের থেকে নেমে গেছে। শোন নন্দ, এবারে কিন্তু আর অনেক বিষয়-সম্পত্তি জায়গা-জমি নয়; ছোট্ট একটু জমি—দেড় কাঠা কি দু কাঠা,

তার উপরে ছোট্ট দোতলা একটি বাড়ি—বাস্। কেমন অতসী,  
তাই ভাল হবে না ?

অতসী—হঁ।

বিষ্ণু—আর ঝামেলা চাই না। নায়েব-মুহুরি, পাইক-প্যাঁদা, অর্থি-প্রার্থী,  
আত্মীয়-স্বজন—আড়ালী-পড়ালী,— নারে বাবা—এত সব এখন আর  
ভাল লাগে না। ছোট্ট ছোট্ট দু'তিনটি পায়রার খোপ, বাস্! তারপরে  
আর কাকের মুখে কুচি দেবারও হাঙ্গামা নেই! শান্তি চাই—শান্তি!

অতসী—সে শান্তি কি আর আপনার কপালে আছে? আপনার সঙ্গেই  
ত কত লোক এসেছি; দুগ্গা পিসি, আমি, বাঞ্ছারাম—আরও  
কত এসে জুটবে।

বিষ্ণু—তুই অতসী এখনো ভাবছিস্, এত লোক-জন বিষয়-সম্পত্তি  
ফেলে এসে আমার গন আনচান কচ্ছে! সত্যি ও সব  
আর ভাল লাগে না। জীবনে অনেক দেখেছি—অনেক করেছি।  
এখন—এখন আর সে সব হেঁচৈ ভাল লাগছে না, এখন চাই  
একটু নিরামা—একটু শান্তি!

অতসী—আমরাই আবার কত হেঁচৈ ক'রে তুগব।

বিষ্ণু—কোথেকে করবি? কি ক'রে করবি? আমি জানি, সব  
শান্ত হ'য়ে আসবে। মাঠে মাঠে আর ফসল ছড়াবার ব্যবস্থা  
করতে হবে না, মরাই বেঁধে দান তুলবার ব্যবস্থা করতে হবে না;  
ঢেঁকিতে ঢেঁকিতে চাল কুটে খাবার ব্যবস্থা করতে হবে না।  
হালের জন্তু বলদ চাই না, গাছের জন্তু পুকুর চাই না, ফল-ফলাদি  
ভরি-ভরকারির বাগান চাই না। লাইনে কাড়িয়ে মপ্তাহের  
চালটি ধর, সকালবেলা বাজারটি কর—খাও দাও—আপিস  
বাও। শান্তি—মহাশান্তি অতসী— আমি সে সব জানি!

অতসী—এদেশ ছাড়া অন্য কোথাও কি লোক আর ঘর-গেরস্ত হ'য়ে বাস করে না ?

বিষ্ণু—নারে অতসী—আবার ঘর-গেরস্ত নয়। বড় ঝামেলা—এক জবড়জঙ্গ। পাল-পার্বণ, দোল-দুর্গোৎসব, দান-ধ্যান—ইপ ধরিয়ে দেয়। একটু স্বস্তিতে থাকতে দেয় না! (খানিকক্ষণ চুপ করিয়া অতসীর কানের কাছে মুখ আগাইয়া আস্তে আস্তে) এক সময়ে অতসী ঐ সবই লাগত বেশ, বয়স ছিল কি না ?

[ সবাই খানিকক্ষণ চুপ করিয়া রহিল। ]

অতসী—আপনি ত আর দেশ-গাঁ বাড়ি-ঘর একেবারে ছাড়ছেন না, এ সবও বন্ধ ক'রে দেওয়া হবে না। আপনি মাঝে মাঝেই বাড়িতে ফিরতে পারবেন।

বিষ্ণু—( একটু হাসিয়া ) এইটে তুই বোকার মতন বললি অতসী কেন বললি জানিস্ ? ই্যা—ফিরতে আবার পারি, কিন্তু সেই বিষ্টুরায় আর সেই ছাতিমপুরে ফিরবে না !

[ তিনজনেই আবার খানিকক্ষণ চুপ করিয়া রহিল ]

নন্দ—যুগের পরিবর্তনকে কি আর গায়ের জোরে ঠেকান যায় বাবা ?

বিষ্ণু—সে কি আমি বুঝি নি ? নইলে পালালুম কেন ? গায়ের জোরে যদি কিছু হবার হত, তবে আর পালালুম কেন ? আমি ঠিক দেখতে পেয়েছিলুম নন্দ, তোর আগেই দেখতে পেয়েছিলুম। ঐ ছাতিমপুরের রাগবাড়ির খোলা দীঘির পাড়ে সন্ধ্যার অন্ধকারে বসে বসে আমি একএকদিন দেখতে পেয়েছিলুম, মাটির নীচের বাসুকি নাগটা মাথা নাড়ছে, আর পায়ের নীচের পৃথিবীটা ঘুরছে, তার সঙ্গে সব জিনিস কেমন ওলট-পালট হয়ে যাচ্ছে। ওপরের জিনিস নীচে চলে যাচ্ছে, নীচের জিনিস

উপরে জেগে উঠেছে। মাঝে মাঝে শুধু ভেবেছি, কেন এমন হ'ল। হয়ত পাপ ছিল—সাতপুকমের পাপ—এক পুকষে তাব প্রায়শ্চিত্ত! (আবান সকলে নীবব)

অতসী—শুনুন, আপনি যা ভেবেছেন তাই শুধু বলছেন, আমরাও ত কত ভেবেছি, তা ত কিছুই শুনছেন না।

বিষ্ণু—(আগ্রহ সহকারে) শুনব বই কি মা, শুনব বই কি; তুইত বলছিস না কিছুই।

অতসী—আমি ভেবেছি, আপনি আব বিষয়-সম্পত্তির বাগেলানা করতে চান ভাল; কিন্তু বাড়ি একটা বড় করতে হবে। তাতে মাঠ খাটনা থাকে—আমরা বাগান কবব অনেক,—ফলের বাগান—ফুলের বাগান—তরি তবকারিব বাগান।

বিষ্ণু—সে ভাবী স্তন্দর হবে!

অতসী—ঐ সব দীঘি টিঘি আব নয়, কিন্তু ঘাটলা দেওয়া ছোট্ট একটা পুকুর বাধতে হবে। তাতে অনেক বকমের মাছ থাকবে, আর আপনার বড়শী বাওয়াব সখ—আপনি বড়শী বেয়ে মাছ ধববেন।

বিষ্ণু—বাঃ বাঃ বেশত তুই ভেবেছিস মা। আবও বল দেখি।

অতসী—আটচালা ঘব দিয়ে দরজা ভ'রে রাখব না,—

বিষ্ণু—হ্যাঁ—ঠিকই বলেছিস,—ওটাও একটা জ্বডজ্ব ব্যাপার।

অতসী—ওটা দরকার মতন সামিযানা টানিযে নিলেই চলবে, কিন্তু চণ্ডীমণ্ডপ একটা চা-ই।

বিষ্ণু—হ্যাঁ হ্যাঁ, হিন্দু বাড়িতে চণ্ডীমণ্ডপ একটা থাকবে বই কি।

অতসী—তাবপাশেই আপনার বৈঠকখানা ঘর।

বিষ্ণু—(গম্ভীর ভাবে) ওটার আবার কাজ কি, দরকার কি আর অস্ত্র-ব্যয়-বাহুল্য!



অতমী—না, ওটা না হ'লে হয় না। আপনি যেখানেই যাবেন সেখানেই দেখবেন কত লোকজন আসবে আপনার সঙ্গে দিনরাত দেখা করতে, আবার দেখবেন নাওয়া-খাওয়ারও সময় পাবেন না।

বিষ্ণু—ঐ সব কি আবার ভাল লাগবে এই বয়সে।

অতমী—লাগবে—খুব ভাল লাগবে দেখবেন। নোতুন নোতুন সব লোক আসবে, নোতুন নোতুন সব কাজের কথা, বেশ ভাল লাগবে।

বিষ্ণু—কত সব নোতুন লোক—নোতুন কথা—আমি যে মা অনেক দিনের পুরোণো লোক!

অতমী—( উৎসাহিত হইয়া ) ওতে চলবে না—আমরা সব ঠিক ক'রে নেব।

বিষ্ণু—তাই হবে অতমী,—তোরাই একটু শিথিয়ে বুঝিয়ে নিবি তবেই দেখিস্ আবার ঠিক পারব সব। না,—আমারও এখন তাই মনে হচ্ছে, অমনি সব ব্যবস্থা ক'রে নিলে ভালই লাগবে। সেই রাত পোয়ালৈই করিম চাচা আর আইজর্দি, মেছের আর মোস্তাজ—সেই শামু চক্কোভি, পটল ডাক্তার আর কিনারাম-বেচারাম—ভাল লাগে না! তুই যা বললি, আমারও মনে হয়। তা-ই ভাল লাগবে।

[ ঘাটে পা ধুইতে তিনজন যাত্রীর প্রবেশ, একজনের কাঁধে একটা ঢোল, একজনের হাতে মন্দিরা, অন্য জনের হাতে একটা বড় বাণের লাঠি। ]

তোমরা কারা?

১ম—আমরা যাই হরিব লুটের কে হুনে।

বিষ্ণু—হাতে এত বড় লাঠি নিয়ে—

২য়—ভয় পাইবেন না। অবশ্য যে দিনকাল পড়ছে—রাত্তিরে একটু ভয় পাবারই কথা। অন্ধকার পথে চলতে ফিরতে একটু লাঠি লইয়া চলি।

বিষ্ণু—আমরা এ কোন্ গ্রামে পৌঁছেছি ?

১ম—কতারা বুঝি বিদেশী ?

বিষ্ণু—না, ঠিক বিদেশী নয়,—এই শীতের রাত্তিরে কেমন কুয়াসা পড়েছে—ঠিক যেন দিশে পাচ্ছি না।

১ম—এটা কেন্দুপাড়া।

বিষ্ণু—কেন্দুপাড়া ? এতক্ষণ বসে মোটে কেন্দুপাড়া ? মাঝিগুলো এতক্ষণ কি করলবে নন্দ ? আন্ধক পথও ত আমি নি তাহ'লে।

২য়—কতাকে যেন চিনি চিনি,—নিবাস কোথায় ?

[ বিষ্ণুরায় নিরুত্তর ]

নন্দ—নিবাস এই ছাতিমপুরে।

২য়—তাট মনে হইতেছিল—বায় মশায় নাকি ?

নন্দ—হ্যাঁ।

২য়—পেন্নাম কত্যা পেন্নাম ( শুইয়া বিষ্ণুরায়ের পায়ের ধূলি লইল,—  
নন্দকে হাতজোর করিয়া প্রণাম করিল ; অপর দুইজনও সেইরূপ করিল। ) আমরা কতারা পেরজা। কোথায় চললেন ?

বিষ্ণু—( বিষ্ণুরায় সতস্রা অশ্বস্তি বোধ করিয়া উঠিয়া দাঁড়াইয়া ) নন্দ, শীতের রাত্তিরে ব'সে ব'সে এসব কি ছেলেমানুষি হচ্ছে ! আমি কি পাগল ? চল—নৌকোয় চল—

[ বিষ্ণুরায় আগে আগে চলিল, নন্দ ও অতসী পিছে পিছে চলিল। যাত্রী তিনজন বিষয়ে পরস্পর পরস্পরের প্রতি চাওয়া-চাওয়ি করিতে লাগিল। ]

[ গট-পরিবর্তন ]

## তৃতীয় দৃশ্য

রাত ন'টা। বিষ্ণুরায়ের বাইর বাড়ির বৈঠকখানা ঘর। করিম সর্দার  
ছয়ারের কাছে দাঁড়াইয়া বাহিরের দিকে তাকাইয়া আছে।

করিম সর্দার—( ডাকিয়া জিজ্ঞাসার সুরে ) কাছেমের আলাপ পাইলাম  
নারে ? —ওরে কাছেম—

[ কাছেমের প্রবেশ ]

তোর বেত্ত কিরে কাছেম ? তুই ছিলি কই ? কোন্ সময়খন  
একা একা অন্ধকারে বৈসা রইছি। একফ'র রাত্তির হইল,  
সারাটা বাড়ি অন্ধকার কেন রে ? বৈঠকখানা ঘরেও তুই একটা  
আলো জালাইতে পারস্ নাই ? তুই দেখছস্ কি ? সাপের  
পাও ? ( কাছেম আস্তে আস্তে আলোটা জালাইয়া দিল। )  
ওকি, খাটের উপরের ফরাসটা কই ?

কাছেম—তুইলা রাখছি।

করিম—কেন ? ওটা কি তোর বাপের বেসাত ? শীগ'গির আবার  
পাত। ( কাছেম ফরাসটা আবার জোড়া খাটের উপরে  
বিছাইয়া দিল। ) ভুঁইয়ার তাকিয়াটাও বুঝি তুইলা রাখছিস্ ?  
তুই ত আচ্ছা মর্দ দেখতেছি ! ( কাছেম তাকিয়াটাও আবার  
ষথাস্থানে রাখিল। ) নে এখন এক ছিলুম তামুক খাওয়া।  
[ করিম সর্দার যে হাতলওয়লা বেঞ্চিটার বরাবর বসিত সেই  
বেঞ্চিটাতেই বসিয়া পড়িল। কাছেম তামুক সাজাইয়া দিল।  
করিম সর্দার তামুক টানিতে লাগিল ; কাছেম একপাশের দরজা

দিয়া বাহির হইয়া গেল। খানিক পরে মেছের প্রবেশ করিল।  
করিম সর্দার একবার মুখ তুলিয়া মেছেরকে নিরীক্ষণ করিল,  
তারপরে আবার নিজের মনে ভামাক টানিতে লাগিল। মেছের  
খানিকটা এদিক ওদিক, তাকাইয়া এবং করিম সর্দারের দিকে  
বারবার তাকাইয়া এক কোণের একটা বেঞ্চিতে গিয়া চুপ করিয়া  
বসিয়া পড়িল। খানিকক্ষণ পরে রজ্জব ও তাহের মিঞার  
প্রবেশ। ]

রজ্জব—আদাব বুড়া মেঞা, একা একা বৈসা আছেন যে? ( এদিক  
ওদিক তাকাইয়া ) না—এই যে মেছেরও আসছস্।

করিম—রজ্জবালি নাকি ?

রজ্জব—হয়।

করিম—সঙ্গে কে ?

রজ্জব—তাহের মেঞা।

তাহের—আদাব বুড়া মেঞা।

করিম—নাও, হঁকা ধর, ভামাক খাও।

রজ্জব—ভামাক ত আর মুখে আসে না মেঞা, কিষে একটা ব্যাপার  
ঘটল—বিষয়টা বোঝতেই পারলাম না।

করিম—গেছিল। কই, সারাদিন যে দেখি নাই তোমারে ?

রজ্জব—গেছিলাম রূপকাঠির হাতে; বাড়িতে ফি'রা শোনলাম ষবরটা।  
মনটার বড় দুঃখ পাইলাম মেঞা! এই নিষ্টুরায় আপনার  
কোলে পিঠে মাথুষ হইছে। ( সকলে কিছুক্ষণ নীরব। )  
চারিদিকে তাকাই আর সারা গেরাম কেমন যেন ফাঁকা ফাঁকা  
লাগে,—প্রকাণ্ড বট ব্রেক পৈড়া গেছে যেন ঝড়ে। [ করিম  
নিরন্তরে মাথা নীচু করিয়া রহিল। ]

তাহের—কি দিনকালই পড়ল মেঞা ! খালি হিন্দু—আর মোছলমান !

এতদিন যে একসঙ্গে বাস করলাম, মানুষ হইলাম—রাইত পোহাইলে চারিচৌক্কে দেখা—এতদিনের সম্পর্ক—সব মেঞা দুইদিনে ধুইয়া মুইছা গেল ?

রজ্জব—আমিও সারাটা সন্ধ্যা তাই ভাবতেছিলাম। এক মাটিতে জন্মিলাম, এক জমির দান খাইলাম, এক পুকুরের পানি খাইলাম—এক পথে-ঘাটে হাটে-বাজারে দেখাশুনা,—আজ একেবারে বাঘে-মইষের লড়াই ! দুইজনে থাকতে হইবে গিয়া দুই দেশে !

তাহের—আর হিন্দুরগোই বা আইজ কাইল কোন্ যে এক বাতিক হইছে; বুঝি না। সমস্তেরই এক কৈলকাতা ! পানেরখন চুণ খসলেই চললাম কৈলকাতা !

রজ্জব—আরে চুরি-ডাকাতি চ্যাংড়ামি ব্যাংড়ামি দেশ-গাঁয় না হইছে কবে ? আর যে কণ্ড, বাড়িঘর জোমাজমি কিছুই থাকল না ; বাড়িঘরেই যদি না থাক কেউ, তাইলে বাড়িঘরই বা থাকে কেমনে, আর জোমাজমিই বা থাকে কেমনে ?

তাহের—ছাড়াবাড়ির ফলফলাদি শূয়ারে-বান্দরে খাইত, আইজ কাইল না হয় মানুষে খায়,—তাতে দোষটাই বা কি ?

রজ্জব—তোমরা থাকবা গিয়া বিদেশে বিদেশে—বাড়ি আসবা পাচ বছরে একবার ; জমা দেখবা না, জমি দেখবা না—আর আমরা শুধু গায়ের রক্ত জল কৈরা ফসল ফলামু, তাই হাটে বাজারে বেচা-কেনা করম—আর তোমারগো কাছে নগদ নগদ টাকা পাঠা'য়া দিমু ?

তাহের—বুঝলা না মেঞা, সুপের উপর সুখ, তার উপর মাছের কাঁটা-টুক !

রজ্জব—কিন্তু যাই কও মেঞা আইজ মনটা বড় ছ্যাং ছ্যাং করে—

যেদিকে চাই ফাঁকা—প্রকাণ্ড বট ত্রেক পৈড়া গেছে যেন।

[ সকলেই আবার কিছুকাল চুপ করিয়া রহিল ]

করিম—বসবা না তোমরা মেঞারা ?

রজ্জব—না মেঞা, বসুম না ; সারাদিনের খাটনি গেছে, আন্ধারে মান্ধারে চৌক্কেও দেখি না। আইলাম একবার একটু বিষয়টা জানতে।

তাহের—আর বিষয় ! এখন আন্দাজ করি জাহাজঘাটার দরাদর।

রজ্জব—চলি তাইলে মেঞা, আর আফশোষে ফল হইবে কি ?

[ রজ্জব ও তাহেরের প্রশ্নান। করিম ও মেছের আবার কিছুক্ষণ চুপ করিয়া রহিল, তারপরে করিম মেছেরকে বলিল ]

করিম—মেছের, বাজান শোন দেখি এইদিকে। ( মেছের কাছে আসিল। করিম সর্দার চুপি চুপি ) ভুঁইয়ায় কইয়া গেল নাকি তোর কাছে কিছু ?

মেছের—না।

করিম—কিছুই কইল না ? কবে ফেরবে টেরবে—

মেছের—না।

করিম—(আবার কিছুকাল চুপ করিয়া থাকিয়া) যা বাজান, আইজ এখন বাড়ি যা ; শীতের রাস্তির।

মেছের—আপনে ?

করিম—এই দেখি। যামু আমিও বাড়ি একটু বাদে, তুই যা।

[ মেছের বার বার এদিক ওদিক তাকাইয়া আস্তে আস্তে প্রশ্নান করিল। করিম সর্দার আবার কিছুক্ষণ একা একা বসিয়া হাঁকা টানিতে লাগিল। তাহার পর উঠিয়া জোড়া খাট হইতে একটানে ফরাসটা তুলিয়া ফেলিল, এবং সেটাকে গুটাইয়া এককোণে

ছুঁড়িয়া ফেলিয়া দিল ; তাকিয়াটাকে ছুঁড়িয়া একটা মাচার উপরে তুলিয়া দিল ; তার পরে একা একা ঘরে পায়চারি করিতে লাগিল ; এদিক ওদিক তাকাইয়া কাছেগকে না দেখিতে পাইয়া ]  
—কাছেম,—আবার কোথায় গেলিরে কাছেম ? (কাছেমের প্রবেশ) তিলেকে তিলেকে কোথায় পালাস্ ? নারে মর্দ, কাম নাই বাতিতে—ওটা নিভা'য়া দে দেখি । [কাছেম বাতিটা নিভাইয়া দিয়া আবার সরিয়া পড়িল । করিম সর্দার জুকুটি করিয়া সেই অন্ধকারের দিকে তাকাইয়া রহিল । এমন সময় বাড়ীর চারিদিকে বহু লোকজনের একটা হুড়মার শব্দ শোনা গেল । ]—কিরে কাছেম, এ সব ব্যাপার কিরে ? এত লোক-জন কিসের ?—এত হুড়-হাঙ্গামার শব্দ কিসের ? দেখি দেখি—(হুয়ার হইতে মুখ বাহির করিয়া) কারা সব—কারা— ?

[ আইজ্জদ্দির প্রবেশ ]

আইজ্জদ্দি—একি বাজান, আপনি এখানে ?

করিম—তুই এখানে কেন ক দেখি আইজ্জদ্দি— । ব্যাপার কি ? এত সোরগোল কিসের ? (দূরে লেজা-লাঠি-মশাল দেখিয়া)—এ সব কিসের ক দেখি আইজ্জদ্দি—

আইজ্জদ্দি—এ বাড়ির দখল নিমু—আইজ্জই—এই রাত্তিরেই ; যদি কেউ বাধা দেয় ত খুন—

করিম—খুন ? যে বাধা দিবে তারে খুন ? বাধা দিমু আইজ্জদ্দি আমি— ! এ বাড়ি আমার !

[ করিম সর্দার ছুই হাতে আইজ্জদ্দির ঘাড় বজ্রমুষ্টিতে ধরিয়া আগুন-ভরা চোখে তাহার দিকে তাকাইয়া রহিল । ]

[ পট-পরিবর্তন ]

## চতুর্থ দৃশ্য

প্রজ্বলিত বিড়ুরায়ের বাড়ির সম্মুখস্থ প্রাঙ্গণ। শুধু বৈঠকখানা ঘর ছাড়া অল্প সব ঘর-বাড়ি পুড়িয়া গিয়া আগুন প্রায় নিভিয়া আসিতেছে। স্থানে স্থানে আগুন নিভিতে নিভিতেই আবার দগ্ধ করিয়া জ্বলিয়া উঠিতেছে। এখনও টুন্-ঠাস্-ঝুম্-ঝান্ শব্দ হইতেছে। প্রজ্বলিত মশাল ও লাঠি-লেজা হাতে মোস্তাজ, এক্রাম, বেঙ্গু কুলু, কিনারাম, ইশান ঢুলী এবং আরও অনেকের প্রবেশ।

মোস্তাজ—কই গেল আইজ্জদি সর্দার, তারে আমরা চাই—  
একখুনি চাই।

এক্রাম—কি হে কুলুর পো, সর্দারের পো কোথায় ?

গোপাল—কথা কও, চুপ থাকলে চলবে না। আইজ্জ আর ছাড়াছাড়ি নাই কারোর। আগুন যখন হাতে নিছি তখন সব পুইড়া ছাড়গার করমু। আইজ্জদি কোথায় ?

বেঙ্গু—আমি তার কি জানি ?

মোস্তাজ—তুমি তার কি জান ? তুমি সব জান। এতগুলো নগদ টাকা, পয়সা-পত্রের খালা-বাসন বাকস-ডেকস সব এক পলকের মধ্যে উধাউ হইয়া গেল ? আইজ্জদিই বা কোথায় পিটান ?

এক্রাম—যেখানে ষাউক সেইগান খন টাইনা বাইর করম, মইরা কবরের নীচে গিয়া থাকলে সেখানের খন টাইনা নিয়া আসম। আমরা টাকার ভাগ চাই, পয়সা-গাঁটি সোনা-দানার ভাগ চাই—জিনিস-পত্রের ভাগ চাই।

গোপাল—কাল সকালে পুলিশ আইসা মইরা স্ত তাইয়া হাত কড়া দিবে



আমারগো—আর টাকা-পয়সা সোনা-দানা সব যাইবে  
আইজ্জদির পেটে? তুমি পিছনে বইসা তার পা চাটবা আর  
কিছু কিছু বাইর কৈরা নেবা? সেটি হইতেছে না কুলুর পো।

এক্রাম—হালুট্যা চাষা হইয়া—কাচ্চা-বাচ্চার বাপ হইয়া আইজ্জ  
বেইমানি করছি, মিথ্যা কইছি, ডাকাতি করছি, সাতপুরুষ যাবৎ  
যে রায়গো অয়ে মাশুম—তারগো সব লুইট্যা পুইট্যা নিয়া এই  
মশালের আগুনে ঘরবাড়ি সব পুইড়া ছারখার কৈরা দিছি!  
কেন? কিসের জন্তু? শুধু আইজ্জদির পেট ভরাবার জন্তু?  
(সহসা বেঙ্গুর গলা টিপিয়া ধরিয়া) কও কুলুর পো—কও—  
আইজ্জদি কোথায়,—টাকা-পয়সা জিনিস-পত্র কোথায়—!  
কও, নইলে এখনই খুন, এই গলা টিপ্যা খুন।

বেঙ্গু—(হাত ছাড়াইয়া)—আমি তার কি জানিরে বাবা—

এক্রাম—এতক্ষণ ত তুমি সব জানতা, এখন তুমি কোন্ সাউগার! সব  
কথা ফাঁস কর—নইলে ছাড়াছাড়ি নাই। (আইজ্জদির প্রবেশ)  
এই যে আইজ্জদি সর্দার, (খপ্ করিয়া হাত ধরিয়া) কও সর্দারের  
পো, টাকা-পয়সা কোথায়—গয়না-গাঁটি জিনিস-পত্র সব  
কোথায়!

আইজ্জদি—(হাত ছাড়াইয়া) ক্ষেপেছ কেন সব? সবই ত আছে।—

গোপাল—আছে সব তোমার পেটের মধ্যে—তাতে চলবে না সর্দার।

আমরা ভাগ-বাটারা চাই—একখুনি চাই। নগদ টাকা চাই—

সোনাদানা চাই—

আইজ্জদি—এত ব্যস্ত কি, সবই পাবি—।

এক্রাম—তোমার মিষ্টি কথার গুণী কিলাই; পাবি-না-পাবির ধার  
ধারি না আমরা, একখুনি চাই—হাতে হাতে বিদায় চাই।

আইজদ্দি—এত সোনা-দানা টাকা-পয়সা নিয়া রাখবা কোথায় মেঞা ?  
 এক্রাম—আমবা পানিতে ফেলুম—তোমার পেটে যাইতে দিমু না ।  
 বেশত, সোনা-দানা টাকা-পয়সায় কাজ নাই, তোমাব গোলা  
 ভবা ধান আছে, চাউল আছে—আমারগো ধান দেও—চাউল  
 দেও— ।

আইজদ্দি—কেন একি গগেব মুল্লুক নাকি ?

এক্রাম—(আইজদ্দির কাছে আগাইয়া) গগেব মুল্লুকই পইড়া গেছে  
 সর্দারের পো । আইজ অনেক অপকন্ম কবছি তোমাব সঙ্গে,  
 হালুট্যা চাষা—জীবনে তা করি নাই । এতই যখন কবছি,  
 তখন এই লেজার ফোড় তোমারও শেষ । পেটে আগুন  
 জলছে সর্দারের পো, খাইতে দেও -নইলে টুকরা টুকরা কৈরা  
 তোমার মাংস ছিড়া খামু । পেটের আগুনের জলুই আইজ এই  
 লাঠি ধরছি—পেটের আগুনের জলুই আইজ ঘরে আগুন দিছি ।  
 এ আগুন না নিভাইলে কোনো আগুন নেভবে না, তোমার  
 ঘরবাড়িও সব লুটপাট করগ,—পুইড়া ছাৰখাব কৈবা দিমু ।

আইজদ্দি—সাবধান এক্রাম—

এক্রাম—কাব জোবে কোন মেঞা ? আইজ এখন আর কেউ  
 তোমাব পক্ষে নাই । আইজ তিন দিন কচুসেদি আর কেন  
 খাইয়া আছি, না খাইয়া না খাইয়া বক্ত হাইগা মৈরা গেল  
 সেদিন ন'বছরের ছেইলাটা । আইজ শেষ রাত্তিবে বিছানায়  
 শুইয়া ভাত ভাত কৈরা কাঁদছিল কোলেব মাইয়াটা—তার হাত  
 পা ধৈরা ওই শীতের বাস্তিবে বাইবে ফেইলা দিছি—হাত-  
 ভাইড়া সে এখনো ঘবে কোকায় । অনেক দুঃখে আইজ লেজা  
 লাঠি হাতে নিছি—অনেক দুঃখে আইজ হাতে মশাল

নিছি। এ আগুন আইজ নেভতে দিমু না, পেটের আগুন না নেভলে এই মশালের আগুন নেভতে দিমু না। তোমার গোলাভরা ধান-চাউল, আমার কিছু অজানা নাই—তোমার বাড়ির পাশে বৈশা কাচা-বাচা লইয়া না খাইয়া মৈরা যাইতেছি,—তবু এক মুঠ চাউল ধার দেও না—বদলা খাটা'য়া পয়সা দেও নাই। কথায় আর কাজ নাই—আয় মোস্তাজ—আয় গোপাল—আয় ভাই কিনারাম, ঈশান—আইজ আইজদ্বির সব লুটপাট কৈরা নিমু—এই আগুনে আইজদ্বির ঘরবাড়ি পুইড়া ছাবপার কৈরা দিমু—চল—চল—

মোস্তাজ—(আইজদ্বির চুলের মুঠি ধরিয়্যা) কও সর্দারের পো, টাকা-পয়সা কোথায়—কোথায় সব গায়েব করছ—কও—(আইজদ্বি জোরে ছাড়াইতে চেষ্টা করিলে গোপাল, এক্রাম, কিনারাম, ঈশান প্রভৃতি সকলে আইজদ্বিকে ধরিয়্যা চিং করিয়্যা ফেলিয়্যা চাপিয়্যা ধরিল)

আইজদ্বি—ছাড় ছাড়—কই—সব কই—

মোস্তাজ—না কইলে আর ছাড়তেছি না—

[ বেঙ্গু কুলু পলায়ন করিতে চেষ্টা করিলে কিনারাম থপ্ করিয়্যা তাহার হাত ধরিয়্যা ফেলিল ]

কিনা—পালাও কোথায় কুলুর পো, তোমারও আইজ নিদান—

মোস্তাজ—দাঁচতে চাওত কও—টাকা-পয়সা গয়না-গাঁটি কোথায়—?

আইজদ্বি—(হাঁপাইতে হাঁপাইতে) সরা'য়া রাখছি—ভাল জায়গায়—

অনেক দূরে—

মোস্তাজ—কোথায়? কোথায়?

আইজদ্বি—বোনাই বাড়ি—

এক্রাম—বোনাই বাড়ি ? ডাইলেই বুঝি মতলব । চল মোস্তাজ, চল  
গোপাল--চল কিনারাম ইশান—আইজ এই আগুনে আইজদির  
সব পোড়ামু—চল—চল—

[ চীৎকার করিতে করিতে সকলের প্রস্থান । ]

[ পট-পরিবর্তন ]

### পঞ্চম দৃশ্য

শেষ রাত্রি । বিষ্ণুরায়ের বাড়ির সম্মুখস্থ প্রাঙ্গণ । চারিদিক কুয়ামার ভরিয়া গিয়াছে,  
এদিক-সেদিক ছ'একটা গাছ দেখা বাইতেছে । অদূরে একটা দোলমঞ্চ । তাহার  
একপাশে সাদা-কাপড়ে সমস্ত শরীর জড়াইয়া কুকড়াইয়া শুইয়া আছে করিম  
সর্দার । বাড়ির ভিতরের দিক হইতে একে একে দুইটি লোক কিছু  
কিছু জিনিস লইয়া পলাইয়া গেল । তারপরে আর একটি  
লোক বিষ্ণুরায়ের বৈঠকখানার বাতিটি লইয়া পলাইতেছিল;  
অন্ধকারে তাহাকে ঠিক চেনা বাইতেছিল না ।  
পায়ের শব্দ পাইয়া করিম সর্দার চোখ  
মেলিয়া চাহিল তারপরে চোরের মতন  
লোকটিকে পলাইতে দেখিয়া দোড়াইয়া  
গিয়া তাহাকে ধরিয়া ফেলিল ।

করিম—এইবার—শালা ! কিছুতেই আর পেট ভরে না, কিছুতেই আর  
আশ মেটে না ? সারা রাত্রির ধৈর্য সারাটা বাড়ি লুটপাট  
করিলি, তারপরে ঘরবাড়ি জালা'য়া দিলি ; বাকি ছিল খালি

বৈঠকখানার ঘরটা—তার বাতিটা ও লইয়া চলছস্? আর শালা এই দিকে—(করিম সর্দার লোকাটির হাত ধরিয়া টান দিল, লোকটি ফস্ করিয়া হাতখানি ছাড়াইয়া বাতিটা ফেলিয়া দৌড় দিল।) যা বান্দীর পুত—যা.—গেলি আইজ বাইচা—।

[ করিম সর্দার বাতিটা তুলিয়া লইয়া দোলমঞ্চের উপরে রাখিয়া দিল; তারপরে আবার আস্তে আস্তে গিয়া একটা গাছের পিছনে দাঁড়াইল। বাড়ির ভিতর হইতে বৈঠকখানার সতরঞ্জিটা মাথায় করিয়া আর একটা লোক যাইতেছিল; করিম সর্দার পিছন হইতে গিয়া সতরঞ্জিটি ধরিয়া টান দিতে সতরঞ্জিটি লোকটির মাথা হইতে পড়িয়া গেল; লোকটি সহসা খতমত খাইয়া করিম সর্দারের মুখের দিকে চাহিল; করিম সর্দার খপ করিয়া লোকটির দাড়ি ধরিয়া টান দিতেই এক সঙ্গে গৌফ দাড়ি খসিয়া গেল। ]

করিম— কেরে— রাহা বাড়ির ফৈটকা না?

[ ফটিকের ক্ষত পলায়ন। ]

তুই-ও যোগ দিছস্ হারামজাদা? না, আর পারা যাইবে না।

[ এই বলিয়া করিম সর্দার আবার গিয়া শুইয়া পড়িল। বার বার মাথা তুলিয়া দেখিতে লাগিল, আবার কোন লোক দেখা যায় নাকি। কিছুক্ষণ পরে বাহিরের দিক হইতে একটি লোককে গুটি গুটি পা ফেলিয়া বাড়ির ভিতরের দিকে আসিতে দেখা গেল। তাহারও মাথা, নাক-মুখ সব কাপড়ে ছড়ান, কুয়াসার ভিতর দিয়া কিছুই দেখা যাইতেছিল না। করিম সর্দার মুখ তুলিয়া লোকটিকে দেখিতে পাইল; সে নড়িল

না, শুধু লোকটির গতিবিধি লক্ষ্য করিতে লাগিল।  
লোকটি এদিক ওদিক তাকাইতে তাকাইতে অল্প অল্প  
আগায়, আবাব খামিয়া দাঁড়ায়। লোকটি খানিকটা অগ্রসর  
হইলে করিম সর্দার আস্তে আস্তে উঠিয়া বসিল, আস্তে আস্তে  
দোলমঞ্চ হইতে নামিয়া লোকটির পিছে পিছে পা টিপিয়া  
আগাইতে লাগিল—খানিকটা কাছে আসিয়া করিম সর্দার  
লোকটিকে পিছন হইতে জড়াইয়া ধরিল।]

করিম—আবাব আসছস্ হারামজাদা—আবার—

( লোকটি সহসা মাথার এবং মুখের কাপড় খুলিয়া ফেলিয়া বলিল )

আবাব এসেছি করিম চাচা—আবাব! আমি—আমি বিষ্ণু  
রায়—

করিম—(ছাড়িয়া দিয়া) ভুঁইয়া—।

বিষ্ণু—হ্যাঁ চাচা, এলুম,—আবাব ফিবে এলুম। ওদের সব পাঠিয়ে  
দিয়েছি—আমি—আবার পালিয়ে এলুম।

করিম—(মাথা নীচু করিয়া) কেন আবার—

বিষ্ণু—কেন? কেন?—এই গ্রামটাকে আবাব একটু দেখতে এলুম—  
এই বাড়ি-ঘর একবার দেখতে এলুম। এই দোলমঞ্চটাই আব  
একবার একটু দেখতে এলুম,—এই—তোমাদের একবার দেখতে  
এলুম! ( করিম সর্দার অল্পদিকে মুখ ফিরাইয়া মাথা নীচু  
করিয়া নীরব রহিল। ) কথা কইচ না যে চাচা—মুগ ফিরিয়ে  
রইলে, যে—! তাইত, চাচাও যে কথা কয় না। করিম চাচাও  
কয় না! ( চঞ্চলভাবে করিম সর্দারের হাত ধরিয়া ) চল—  
চল চাচা, বাড়িঘর একটু দেখি—

করিম—(মাথা নীচু করিয়া মুখ অশ্রুদিকে ফিরাইয়া) সব গেছে ভূঁইয়া,  
কিছু রাখতে পারি নাই !

বিষ্ণু—কি গেছে ? কি গেছে ?

করিম—ঘরবাড়ি লুটপাট কৈরা সব পোড়া'য়া দিছে ।

বিষ্ণু—কার — কার — ?

করিম—তোমারও — আমাবও ।

বিষ্ণু—আমারও—তোমারও ! কে ? কে পোড়াল কিছু জ্ঞান ?

করিম—আইজদি ।

বিষ্ণু—তোমার ঘর ?

করিম—আইজদির লোকেরা ।

বিষ্ণু—ভুল চাচা—ভুল ! এ আশমানের আগুন ! এত আগুন !

আশমান থেকে নেমে এসেছে এত আগুন ! গেছে সব বেশ  
হয়েছে—বেশ হয়েছে ! ( আবও চঞ্চল ভাবে ) চল—চল চাচা—

দেখি—একটু দেখি—ঐ ছাইগুলোই একবার একটু দেখি—

[ বিষ্ণুরায় বেগে ছুটিয়া ঘাইবার উপক্রম করিলে করিম সর্দার  
তাহাকে ধরিল, বিষ্ণুরায় বিমূঢ় দৃষ্টিতে করিম সর্দারের দিকে  
ভাকাইয়া রহিল । ]

করিম—কোথায় যাও—কি দেগবা আর ? এখন আর কিছু নাই—

আছ শুধু তুমি—আর আমি !













